



Uc 8816



Biblioteka Jagiellońska

sidr0015382

Uc 8816










vHs 739060



GLORIOSISSIMO ac INVICTISSIMO

VLADISLAO IV.

REGI POLONIÆ, MAG: DV-  
CI LITHVANIÆ, RUSSIÆ, PRUS-  
SIÆ, MASOVIAE, SAMOGITIAE, LI-  
VONIAE, SMOLENSIAE, SEVERIAE,  
CZERNIOVIAEQUE:

NEC NON

SVECORUM, GOTHORUM, VANDALO-  
RUMQUE HÆREDITARIO REGI

*Domino suo Clementissimo.*

INVICTISSIME, POTENTISSIME REX

**A**B ultimis Germaniæ oris,  
qua, facto divortio, Rhenus,  
in Batavorum Insula, Schen-  
kij monumenta premit: qua medius  
felices Cliviæ terras secat, &

*In tonsus Vahalim bibit Sicamber,*

(2)

ad



## DEDICATIO.

ad Regiæ Majestatis vestræ conspectum navigo. Inter audaciam tamen & verecundiam medius, ut qui à populo Mercurij Sacris prorsus dedicato, non exoticas à Madagascare aut Moluccis merces, sed Heröica Majestatis vestræ gesta, in Poloniam veho. Sed quæ malum isthæc insolentia est? Ignosces Serenissime Rex: & quicquid hic presumptionis fuerit, eâdem, qua victis hostibus pepercisti, clementia condonabis. Tuum est quicquid hic peccatum, Tu causam & occasionem præbuiisti. Insolentibus enim tuis Victoriis Triumphisque, omnium ad insolentiam animos, qua-

## DEDICATIO.

quaqua terrarum, commovisti: adeo ut & virtutes tuas loquatur ultima Thule, quæ olim etiam, cum in flore esset Romanum Imperium ignoravit. Et quid mirum? Cœpit hæc victoriarum tuarum fama, à primo adolescentiæ tuæ crepusculo, & continuis tot annorū triumphis, ad præsentis gloriæ splendorem adolevit. Honori Magno Pompeio fuit, quod de Africa primo & Iarba Rege juvenis & nondum Senator triumpharit: Tu puer adhuc, de habitantibus Asiæ & Europæ continentem Moscis, Pompeio Magno ætate minor, gloria maior, triumphasti; adeo etiam, ut eos, tibi Domino suo



DEDICATIO.

fuo electo, tandem vertere terga cogerēs, cum flectere antea docuiffes. Inde attonitus Orbis duos adolefcētes, ætate propemodum pares, vix lanugine prima decoros, Te, & Osmanum Turcarum Imperatorem, septingentis bellatorum millibus, & quasi generis humani viribus subnixum, ad Tyram in Valachia æmulos pugilesque vidit, & anxio in utramque partem Mundo, calcata Othomannici nominis gloria, tot Te virtutibus superiorem ostendisti, quot Osmanide millibus prævalebant. Et ipse Osmanus tandem, cladibus & ignominiosa pace confusus, stolidæ præsumptioni  
exi-

DEDICATIO.

exitio suo parentavit. Nondum Regio Diademate cinctus eras, cum inita armorum societate, foedifragus à Septentrione Moscūs, à Meridie Turca, Poloniæ latera infestarent. Tu in medio positus, & erectus tamen sub quolibet pondere, tunc maxime docuisti terrarum Orbem, quid posset in summo periculo summa virtus. Et foedifragos illos à Smolēsci mæinibus, velut una manu abactos, eo tandem desperationis adegisti, ut, inaudita ab ullo sæculo felicitate, universus exercitus, qui jam nutu Tuo, aut vivebat, aut moriebatur, ter genu flexo, clementiam Tuam sollicitaret. Amurathem



DEDICATIO.

them vero Turcarum Imperatorem,  
sola (quis credat!) Adventus tui fama  
ad arbitrium tuū humiliasti; cum vi-  
ctricium armorum tuorum fulmen  
abominaretur. Borussia deniq; cum  
præliaminareris, sine sanguine & ve-  
litatione, ab hostium manibus vendi-  
cata, nominis tui terrorem ipsis litto-  
ribus Sueciæ illisisti. Adeo ut superio-  
rum Regum, & Magni Vitoldi termi-  
nos victoriarum supergressus, jam,  
Tua iterum virtute, secure Vistula,  
Berezina, Tyras, & Borysthenes navi-  
getur. Majore Tua gloria, quod nulla  
unquam felicitate corruptus, omnia  
in circuitu bella, clementia consum-  
mâris.

DEDICATIO.

mâris. Sic ut libere gloriari pos-  
sis, quod apud Senecā (*Lib. i. de clem.*)  
primo quinquennio suo, Ne-  
ro Cæsar. *In hac tanta facultate rerum non  
ira me ad iniqua supplicia compulit, non juvenilis im-  
petus, non temeritas hominum & contumacia, quæ  
sepe tranquillissimis pectoribus quoque patientiam  
extorsit: non ipsa ostentandæ per terrores potentia di-  
ra, sed frequens magnis imperiis gloria. Conditum,  
immo constrictum apud me ferrum est. Summa parsi-  
monia etiam vilissimi sanguinis. Nemo non, cui alia  
desint, hominis nomine apud me gratus est. Seve-  
ritatem abditam, clementiam in promptu habeo.*  
Et hæc tua sunt, Gloriosissime  
Rex, in limitibus Asiæ Europæ-  
que gesta, quæ utriusque ter-  
minis nescia circumscribi, ad al-  
ios vagantur Mundos, & ibi  
nominis tui gloriam famam-  
):( que



DEDICATIO.

que spargunt, ubi latent potissima Christianitatis. Quid ergo? Quæ homines, quia non capiunt, passim admirantur, ego nefas non judicavi stupere Scripto: ut quæ singuli invicem ore referebant, ego calamo loquerer omnibus, & posteritati cruda proponerem, quæ nunquam bene digerat terrarum Orbis. Quia autem, Invictissime Rex, Tua erāt, nec alibi, quem virtute Tua causaveras, generis humani stupor, nisi in animo Tuo solvi poterat, vela feci: ut Regiæ suæ Majestati offerrem, quæ  
sola

DEDICATIO.

sola capit, nec admiratur. Pande itaque nunc, Serenissime Rex, clementiæ & facilitatis tuæ portum, & sicut exotica plerumque sapiunt, non quia optima, sed peregrina; ita placeat hic, in honorem Regiæ Tuæ Majestatis, susceptus labor, non quia optimus, sed peregrinus.

*Sacra Regiæ Tuæ Majestatis*

*humillimus servus*

Everhardus Wassenbergius  
Embricensis.

*AD*



AD CLARISSIMUM VIRUM  
EVERHARDUM  
WASSENBERGIUM

Invictissimi VLADISLAI IV.  
Poloniæ Sueciæque Regis vitam  
resq; gestas describentem.

**F**elicem Macedo præcone ferebat Achillem  
Mæonide, tanta dignior ipse tuba.  
Te quoque felicem præcone, ego censeo, Regem,  
Sarmata quo gaudet, quem Sueonesque ti-  
ment.  
Nec minus ipse tamen felicem prædico te, cum  
Suadæ materies obtigit ista tuæ.  
Vivite longævi! Scribi à te digna gerat Rex;  
Tu Rege à tanto scribito digna geri.

*Surgenti ejus famæ applaudens  
ludebat*

M. R. H.

Ad

AD LECTOREM.

**N**on sum nescius, humanissime Lector, plurima  
à gloriosissimo Rege Vladislao IV. gesta, quæ  
ego non attigi: sed, ingenue fateor, neque cepi.  
Et quis, rogo, sufficiat omnibus? Extrema  
queque & vulgaria scripsi, quæ sic in partes tamen &  
libros valuerunt. Et hæc intentio mea fuit, quæ de hoc  
gloriosissimo Rege conceperam, in speculi modum hu-  
mano generi exhibere: in quibus, sicut in hoc humani  
corporis lineamenta non animus ipse apparet, externa  
tantum Regiarum virtutum lineamenta, non intima,  
tamen consiliorum, legenti repræsentarem. Neque enim fas  
est, Velle enim privatum in Persona Regia, peregri-  
num in aliena Republica, videre amplius quam intuitu  
primo apparet, sacrilegium judico. Relinquo hæc ma-  
gnis illis in Polonia viris, quos, hoc ævo, plurimos, stylo  
& doctrina, præ aliis nationibus, excellentes genuit.

Ne interim deesse aliquid historiæ completæ pu-  
tes: quantum enim tibi scire (neque enim Consiliariis  
Reipublicæ Historiam formo) tantundem & mihi scri-  
bere licuit. Nec etiã te frontale illud, Panegyricè re-  
præsentans, terreat. Candidè enim, quæ scripsi, vera  
existimo; utpote & à gravissimo Senatore Regni perle-  
cta. Sed, mi Lector, delicatum hoc sæculum nosti; cui,  
ad leniendam invidiam, è viventis gloriosissimi Re-  
gis victoriis, & conformi virtutibus ejus elogio, emer-  
gentem, hanc voculam tribuere visum est.



## AD LECTOREM.

Quantum vero ad dispositionem totius operis at-  
tinet, ut rei natura poscere videbatur, in duas partes  
distinxi: quorum altera, tribus libris, Vladislaum  
Principem: altera, totidē libris Regem representat.  
Et in prima quidem parte (secundam enim suo loco re-  
linquo) Authoribus fide dignis subnixu, censorem non  
facile, nisi iniquum, reformido: excepta perplexa illa,  
de Demetriis, historia, in qua omnes Authores fere, qui  
illam attigerunt, aut variant, aut vacillant. Ego au-  
tem (relictis illis, qui in Polonicam jugiter virtutem  
& felicitatem obliqui, affectui non parum indulserunt)  
Sarmatas potius, qui & interfuerunt, & eorum pars  
magna fuere, sequutus fui.

In bello Valachico doctissimum virum Johannem  
Innocentium Petricium, Almae Universitatis Craco-  
viensis eloquentiae Professore, Cornelium Tacitum, si  
quis unquam alius, stylo exprimentem, Authorem ha-  
bui. Cujus elegantissima dictio in eadem nonnunquam  
verba vel invitum traxit. Sed dabit veniam, hac in  
parte, gravissimus Author; & placabitur, more Cae-  
lestium, ingenua confessione.

Peregrinationem ex Diario manuscripto, erudi-  
tissimi, pie memoriae, Adolescentis, Johannis Hagenaw  
à Mazaunen (qui Alberti Stanislai Radziwillij Ducis  
Secretarius peregrinationi interfuit, & quicquid toto  
itineris singulis diebus actum, sedulo annotavit) sumpsi.

Quia

## AD LECTOREM.

Quia autem non integrum in manus meas pervenerat,  
quicquid in calce desiderabatur, à Casparo Nagot-  
(qui Vladislai Regis, tunc temporis, expensarum Prae-  
fectus, in fidelibus ejusdem Regis obsequiis porro conse-  
nescit) ore tenus hausi; quae deinde, sicut & illa quae hu-  
mana infirmitate, praesertim in obsidione Bredana, in  
Diario fuerant praetermissa, fideliter addidi.

Licet autem opportunis locis variorum Autho-  
rum, quemadmodum in Scena mea feci, sententias in-  
terferere potuissem, malui tamen unius Senecae. Quod  
enim Cosmographi de Insula Creta respectu Orbis, hoc  
ego de Seneca respectu aliorum Authorum. Videlicet  
ut, quae in aliis regionibus bene, in Creta optime nasci  
dicuntur; ita, quae in aliis Authoribus recte, meo ju-  
dicio, melius in Seneca inveniuntur.

Et haec sunt, benevole Lector, quae Te, in hac pri-  
ma parte, scire volui: atque jam valedicerem, nisi me  
Illustrissimorum virorum, qui me in hoc opere libera-  
lius animaverunt, beneficia distinerent. Famae enim  
meae interest, ne virtutem illorum, & gratitudinem  
meam, nesciat terrarum Orbis. Quippe qui abominor <sup>Seneca</sup>  
eos, qui furtive agunt gratias, & in angulo, & ad <sup>lib. 2. de</sup>  
aurem. Non est enim ista verecundia, sed infici-  
andi genus. Excelluerunt itaque, hac in parte, Caspa-  
rus & Paulus Dzialinij: quorum ille Culmenensis &  
Po-



## AD LECTOREM.

*Pomesania Episcopus, hic Pomerellia Palatinus: Georgius Princeps Oßolinus: & Gerhardus Comes à Dönhoff. Ut sunt enim hi Illustrissimi viri, Zelosissimi nominis & honoris Regij, ita, quicquid in hoc stadio studioque sudabam, benevolentia singulari recreare voluerunt. Maeste generosissimi viri, non perdidistis beneficium, quod in Serenissimi Regis gratiam collocastis. Tam diu enim studiorum Mæcenates, tam diu fautores eritis, quam diu in pretio erit gloriosissimi Vladislai Regis gesta cognosci.*  
*Valete, favete.*



IN-

## INTRODUCTIO AD VLA- DISLAUM REGEM.

**P**Oloni gentium terrarum Orbis liberrimi à Venedis Sclavisq; Originem duxere. Et quamvis sub hisce nominibus, felicia olim in circuitu arma circumtulerint, nequaquam tamen ullo tempore ad hodiernum famæ gloriæq; fastigiū accessere. Quæ enim ulla gens infantiam suam habuit, ut adolescentiâ, adolescentiâ vero ut maturitatem? Quis adolescentiæ suæ vigore puer: virile robur adolescens habuit? *Nulla non res principia* Senec. lib. 3. de ben. *sua magno gradu transit. Aspice Rhenum, aspice Euphratem, omnes demq; inclytos amnes, quid sunt, si illos unde effluunt æstimes? Quicquid est quo timentur, quo nominantur, in processu paraverunt. Principia sua semper sequens magnitudo obruit.* Romanos illos rerum Dominos, si ad incunabula sua reduxeris, ad rectas stipula culmoq; casas, & humilia pastorum tuguria revolveris. Amplissimam Carthagenensium aliquando rem ad fontem suum prosequere, bubuli olim corio circumscriptam videbis. Non mirum itaq; si, quod florentissimis Imperiis, quod passim rebus omnibus contingit, Sauromatis quoque evenisse intuearis. Paulatim, ut quicquid nascitur, crevere. Adeoq; subsequentibus sæculis, sub Polonico nomine feliciores, postquam cum Lithuanis in unam coaluere Rempublicam, Rus-

(†)

siam,



INTRODVCTIO AD VLAD: REG:

siam, Prussiam, Mazoviam, Samogitiam, Livoniam, Podoliam, Volhyniam, Smolensciam, Severiam, Czernihoviamque, rara quadam felicitate, ditiones sibi adjungere. Quod mirabitur quisquis inspexerit. Non illis famosus Chinarum adversus Tartaros murus. Non maria innumerabiles multitudine avertentia gentes. Nulli ferocissimorum populorum cohibentes impetum Pirenæi. Nulla Thermopylarum claustra. Nec propugnacula quidem (adeo Spartanis generosiores robori suo fidunt) nec munitiones, nec mœnia, nec valla. Sed toto corpore Regnoq; obnoxii, illabatam tamen, quam potiore omnibus habent, libertatem, securitatem, & in alias gentes imperium, sola magnitudine animi, fortiq; dextera paravere. Non parum tamen eos in hoc Regum, quos habuere, prudentia, virtus, & fortitudo juverit. Sed hæc ipsa in non modicam eorum laudem revolvuntur. Quia Reges, quos invictissimos, inclytos, prudentia, virtute, fortitudine, præstantissimos habuerunt, ipsi elegerunt; non electuri, nisi tot Heroas, quot Reges voluissent. Nunc autem tot Heroas, quot Reges numerant, cum non nisi omni virtutum genere absolutissimos, qui plane viris imperarent, elegerint. In hoc naturam secuti: *Natura enim est, ut potioribus deteriora submittere. Mutis quidem gregibus aut maxima corpora præsent, aut vehementissima.* Non

INTRODVCTIO AD VLAD: REG:

*Non præcedit armenta degener taurus, sed qui magnitudine ac toris ceteros mares vicit. Elephantorum gregem excelsissimus ducit. Inter homines pro summo est optimus.* Et, de aureo sæculo loquens Stoicus, pergit dicere. *Animo itaq; rector eligebatur. Ideoque summa felicitas erat gentium, in quibus non poterat potentior esse nisi melior.* Ita Poloni aurei sæculi mores secuti, ut melioribus semper sua colla submitterent, sub quibus provincias jugiter & Regna subjicerent, eos, ut rem rarissimam, & in sua Polonia, & in Transylvania, & in Gallia, & toto terrarum Orbe quæsierunt. Et quamvis semper bene, nunquã tamen quam in Jagellonica, et, quæ ex hac, Suecica familia feliciores. Quæ enim & qualia sub Sigismundo III. Catharina Jagellonia, Sigismundi Primi filia genito, non fuere tentata & felicissime consummata! Elegantissimi viri Innocentii Petricii verbis utar. *Hoc Polonorum Rege Hieremias Simeon Principes Valachorum, oblato veltigali, in tutelam accepti. Exutus Rosuana Transylvanorum Dux exercitu, palog suffixus. Livonia armis vindicata. Aditæ & fractæ, longinquitate secretæ, ac pene incognitæ gentes. Smolenscum Civitas, à Moscis ultra centum annos, non bello sed proditione nostris crepta, ædificijs aucta, & validissimo ingentis arcis præsidio munita, obsidione bienni, ab ipso vastata, & in potestatem redacta. Tota Moscovia victorijs peragrata: & captus.*



INTRODVCTIO AD VLAD: REG:

ptus Imperator Basilius Szuiscius, cum Johanne & Demetrio fratribus, ante ejus solium procubuit. Severia & Czernichovia, Moscorum Provincia, à Vladislao filio, Paterno jussu exemploq, Imperij nostri jugum acceperunt. Quin ejusdem Regis auspicio & fortuna, vastata à Cosacis Turcarum Achilles, Techinia Kozlovia, Belgradum, Theodosia, Trapezuntium: & super alia insignium Urbium excidia, Synopsis caput & Regia Ponti, dum tempus mercatus, ditem alioquin Urbem, majorum opum specie compleverat, gravi ruina concidit. Jam Præcopum expugnatum. Sed & mare tentatum; in quo Cicula Bassæ filius victus, & occisus. Alter item Bassa, Classe victa, captus, & in vinculis mortuus. Territa Constantinopolis subitis armis, suburbiorum incendijs: incussa q, sæpius Turcis Polonorum reverentia. Et hic est ille Sigismundus, sub quo hæc gesta sunt, hujus gloriosissimi Vladislai IV. Parens. Hic ille Philippus, qui Magnum hunc Alexandrum genuit. Cujus virtute cum Poloni in immensum creverint, & nominis sui fama, Terrarum Orbem impleverint, ominosam magnitudinem ejus, ab ipso vitæ exordio, deducamus.



GESTO-



G E S T O R V M

GLORIOSISSIMI ac INVICTISSIMI

VLADISLAI IV.

PARTIS PRIMÆ,

LIBER PRIMVS.

CAPVT PRIMVM.

ARGUMENTUM.

Vladislai IV. nativitas & pueritia.

SUMMARIUM.

*Omina magnitudinem VLADISLAI IV. antequam nasceretur insinuantia. Ejus nativitas, puerilis instructio, & præcox ingenium.*

Vides illum Sarmatiæ Regem, inquit Romanus Philosophus, insigni capitis decorum? si vis illum aestimare, totumq, scire qualis sit, fasciam solve. Fasciam hoc ejus consilio satis, & non fasciam tantum, sed & vestimenta, & corpus ipsum solvam, & quantum per ingenii quidem, perspicaciæ, & mediocritatis meæ modulos licebit, in ani-

1.

*Sener.  
Ep. 80.*

A

VLADISLAI



omnia  
futura  
magni-  
tudinis.

num ipsum me insinuabo, lustraturus alieno sic  
an suo magnus. Itaque licet ille maximus Sarmatiae  
Regum VLADISLAUS IV. Paterno genere, Regiis,  
Jagellonica Sueticaque familiis; materno Augustissima  
Domo Austriaca, Vitam, Sangvinem, & generosissimi  
animi domiciliū traxerit, tamen quia naturæ hoc magis  
beneficium, quam virtutis opus, ad omnia, veram nobilitatem  
ejus & rerum gestarū magnitudinem vaticinantia, venio.  
Quemadmodum enim Cyri, Alexandri Magni, & aliorum  
rarissimæ felicitatis Regum eminentiam, antequam ederet,  
signis natura prodidit; ita gloriosissimus hic VLADISLAUS  
Rex, adhuc in utero materno latens, hisce non caruit. Cum enim  
Regina mater Anna Austriaca, Caroli Archiducis filia,  
sacratissimi Ferdinandi II. Romanorum Imperatoris soror,  
ab Inviictissimo, gloriosæ memoriæ SIGISMUNDO II. concepisset,  
toto conceptionis tempore, insolita quadam majestate vultus,  
grandius aliquid utero bajulare, omnibus videbatur.  
Adeoque & Stanislaus Radzieiowski Palatinus postea  
Lenciciensis, & Maximilianus Przerebski Castellanus  
deinde Siradiensis (quibus jam animus præfagebat, illam  
Sarmatiæ lumen, totiusque Reipublicæ Christianæ decus  
alvo continere) ab actis stipatoribus Regiis & Doryphoris, aut  
ali-

alienigenis illis, quibus in more erat gravidam Reginam  
portare, id quicquid erat oneris, insperatæ Polonicæ felicitatis gratiam, ipsi subiere.  
Inde cum Anno 1595. jam tempus partus adesset non ante  
Regina Mater, quam 9. Junij, in festo Sanctorum Martyrum  
Primi & Feliciani enixa est. Quod à summis prudentissimisque  
viris in non vanum quoque omen acceptum, quasi infans  
modo genitus primus omnium Sarmatiæ Regum esset felicitate  
futurus. Aderant quoque ipsi Infanti aptissima humani  
corporis lineamenta, quod magnæ indolis signum  
Aristoteles judicavit. Nec in vanum. Vt primum enim,  
pulsæ infantili caligine, ratio usum sibi vendicavit,  
generosa pluries quam puerilia loquebatur, & in eum paulatim  
crescebat, qui ominosæ nativitati, & speratæ magnitudini  
corresponderet.

Congratulabatur interim sibi SIGISMUNDVS Pater, & tacito fortunam sensu adorans, disposuit  
illi viros doctissimos, quasi domesticum magistratum,  
sub quorum custodia contineretur, & quorum prudentia  
instrueretur. Nulla quippe res magis animos honesta induit,  
quam bonorum virorum conversatio. Paulatim enim descendit  
in pectora: vim præceptorum obtinet, frequenter audiri, aspici  
frequenter. Occursus mehercule ipse sapientium juvat.

Vladislai  
IV. nati-  
vitas An-  
no 1595,  
9. Jun.

Ejus pu-  
erili in-  
structio.

Senec. Ep.  
94.



4 GESTORVM VLADISLAI IV.

Et est aliquid, quod ex magno viro vel tacente proficiat. Nec tibi facile dixerim quemadmodum proficit, sicut illud intelligam profuisse. Minuta quaedam, ut ait Phædon, animalia, cum mordent non sentiuntur: adeo tenuis illis, Et fallens in periculum vis est. tumor indicat morsum, Et in ipso tumore nullum vulnus apparet. Idem tibi in conversatione virorum sapientum eveniet. non deprehendes quemadmodum aut quando tibi proficit; profuisse deprehendes. Quemadmodum enim qui in solem sapius venerit colorabitur, qui in vnguentaria taberna resederit, & aliquamdiu commoratus fuerit, odorem loci secum adducit: ita qui cum sapientibus viris conversati fuerint, trahant aliquid necesse est quod proficit in posterum. Præsertim cum hoc virtutes pariter & vitia habeant, quod in proximum quemque transilient, & contactu ipso proficiant aut noceant.

Sen. lib. 2  
de ira.

Hinc, alio loco Sapiens Latinus. Proximis applicatur omne quod tenerum est, Et in eorum similitudinem crescit. nutricum Et pedagogorum retulere mox in adolescentia mores. At an ille tantum? consulamus Horologium Principum. Quales Magistri sunt quos habemus, Et præcepta, quæ audimus itales Et scientiæ sunt, quas discimus, Et actiones quas exercemus. Aderat quoque efficax in exemplum absolutissimus Gemitus, in cuius quodammodo facie, Religio, Temper-

PARTIS PRIMÆ, LIBER I.

perantia, Fortitudo, Modestia, & Regiæ virtutes omnes legebantur. In hujus aula, sub hujus oculis Vladislaus crescebat. Quid ergo? Prodest sine dubio, inquit Anneus, custodem sibi imposuisse, Et habere quem respicias, quem interesse cogitationibus tuis iudices. Colligebat quippe justissimos paulatim, Regiarum virtutum Catalogos: & Religionem, temperantiam, modestiam, fortitudinem, & quasque dignissimas integerrimo Principe dotes, quia à domestico magistratu didicerat, quia in optimo parente viderat, in crepundiis æmulabatur. Quam feliciter, tum demum videbimus, cum exerentem & exercentem paulatim se Principem, per Heroica gradientem vestigia, hisce cum fœnore multo virtutibus, ad regium usque fastigium deducemus. Non poterant enim non germinare feliciter, quæ in tempore sparsa, felicissimo solo credita, in vberissimos fructus optime digerebantur. Habent enim ingenia quiddam cum semine simile, quod (ut Stoici similitudine utar) cum occupavit idoneum locum, vires suas explicat, Et ex minimo in maximos ætus diffunditur. Idem facit ratio: non latè patet, si aspicias: in opere ipso crescit. Paucæ sunt quæ dicuntur: sed si illa animus bene exceperit, convalescunt Et exurgunt. Eadem, inquam, præceptorum conditio, quæ seminum. Multum efficiunt, et si

Sen. Ep.  
27.

Sen. Ep.  
8.



6 GESTORVM VLADISLAI IV.

*angusta sunt: tantum, ut dixi, idonea mens rapiat illa,  
& in se trahat. Multum invicem & ipsa generabit,  
& plus reddet quam acceperit.*

Varia lin-  
guu in-  
struitur,  
& ejus  
præcon in-  
genium.

Ep. 95.

Inde capaciore disciplinarum, iisdem, quibus  
excelebat Sigismundus parens, Latina, Italica,  
Germanica, Polonica, linguis instruebatur: &  
quia felix illi ingenium erat, salutaria omnia qua-  
si in transitu rapuit. Nam ut *Dij Immortales*, Senecæ  
verba sunt, nullam didicere virtutem cum omni editi,  
& pars naturæ eorum est, esse bonos: ita quidam ex ho-  
minibus, egregiam sortiti indolem, in ea quæ tradi so-  
lent, perveniunt sine longo magisterio, & honesta com-  
plexi sunt, cum primum audierunt. Verum enim-  
vero hæc naturæ indulgentia, sive insolentia po-  
tius, magis omnino admirabilis est, cum insolentia  
rerum omnium pariter videamus. Immo  
Fortuna ipsa, quæ prosequi non nisi adultiores  
consequitur, non vano omine ablandiens puero,  
cepit fortissimum æq; ac felicissimum futurum  
aliquando Regem, adhuc Principi in ætate tene-  
ra ablandiri; & mox vastissimum illi imperium  
contulit, cum ante ætatem posse sufficere judi-  
cetur. Sed insolentiam hanc fortunæ, & occasi-  
onem expeditionis primæ videamus.

CAPVT

PARTIS PRIMÆ, LIBER I.

7

CAPVT SECVNDVM.

ARGUMENTVM.

Vladislaus IV. in Magnum Moscoviæ  
Ducem eligitur; & ejus, ob Moscovitarum, alium  
Ducem eligentium, levitatem, expe-  
ditio prima.

SVMMARIVM.

Moscovia Tartaris aliquando fædè tribu-  
taria, sub Iohanne Basilide in maximam potentiam  
crevit. Hujus filius junior Demetrius, à Borif-  
sio jussus interfici, arte matris evadit: sed filius alter  
Theodorus, qui Basilidi Patri successerat, ab eodem  
Borissio veneno necatur. Post cujus obitum Borissius in  
Magnum Moscoviæ Ducem eligitur, & aliquot annis  
imperat. Interim Demetrius adolescens, Polonorum  
ope paternum Regnum recuperat, Borissio conster-  
natione mortuo. Mox Demetrius à Szuisicio interfici-  
tur, qui in Magnum Moscoviæ Ducem deinde electus  
Poloniæ Regis legatos captivos detinet. Demetrius  
supposititiis exoritur; quo Moscoviam devastante,  
Sigismundus Rex Poloniæ, ob legatos suos ultra biennium  
detentos, Smolenscum obsidet: ab Hoc Zolke unus in pe-  
nitentiorē Moscoviam missus, Moscos & Svecos cedit.  
Lisso vius quoq; ab eodem Sigismundo Rege missus, latè  
Mo-



Moscoviam vastat. Quare, Demetrio suppositio circa Moscuam urbem etiam tumultuante, Szuiscius rogatus deponit imperium: quo in monasterium secedente, Zolkevius Moscuam urbem, dum à Demetrio suppositio oppugnatur, occupat & defendit. Hinc Moscoviæ Senatores Vladislaum in Magnum Moscoviæ Ducem eligunt. Smolenscum expugnatur, & Szuiscius cum fratribus in Poloniam abducitur. Moscovitæ à Vladislao desciscunt & Michaellem Fedrowicz in Magnum Moscoviæ Ducem eligunt: Moscuam Urbem recuperant, & Smolenscum obsident: sed Poloni, Magnis viribus Moscoviam ingredientibus, Mosci obsidionem solvunt. Vladislaus à Patre missus Severiam Czeremiborviamq; Provincias subjugat, & Moscos in angustias cogit. Quare Mosci supplices pacem petunt, quibus Poloni, etiam victoribus & bello fessi, quatuordecim annorum inducias, tandem concedunt.

**M**oscovia Russiæ Provincia est, quæ, devolutis ad ejus Principem Ducatibus cæteris, ad præsentis Imperii Majestatem ascendit; Tartaris alias, paulo ante, tam fœda servitute obnoxia, ut, advenientibus Tartarorum legatis in equis, Magni Moscoviæ Duces pedes obviam irent, & bibentibus, more illis gentibus consueto, lac equinum Tartaris, decadentes forte in jubam guttas

Magni

Magni Duces ore lingerent, quin imo itantes aperto capite, sedentibus legatis Tartarorum, jussa audirent. Sed fœdam hanc servitutem, Basiliius, istius famosi Iohannis Basilidis parens, fortiter à se reject, & Magnorum Moscoviæ Ducum libertatem armis procuravit. Iohannes Basilides inde in imperium Moscorum ditionibus auxit, & nō solum vicinum Czeremissis Casanenfe, & ad Caspium usque mare, Albanos, et confinia Persiæ Altrachanenfe, Regna, Tartaris vice versa eripuit, sed ad Balthicum mare Livoniam quoq; subjugavit: tam absoluti Imperij Monarcha, ut jure de illo ingeniosus aliquis Vates, hos, in persona Tyranni, versus scripserit.

*Russorum Rex & Dominus sum jure paterni  
Sanguinis: imperij titulos à nemine, quavis  
Mercatus prece, vel pretio: nec legibus ullis,  
Subditus alterius. Sed Christo credulus uni,  
Emendicatos alijs aspernor honores.*

Sed formidabilis illa etiam Turcis potentia, à nulla sepius gente, quam Polona accisa est, ad hostium usque desperationem victrix: nam sub inclyto Stephano Rege & Livoniam totam extorsit, et, cum ditionibus alijs, Polotiam Lithuaniam reddidit.

Verum-enimvero ( ut ad propositum veniamus ) post huius famosi Basilidis obitum, Theodorus



*fr̃ Theodorus filius imperatoris.*

dorus filius imperavit, qui Borissium (quem Hodunum alii vocant) nobilitatis antiquæ virum, purpuratorum Principem legit, in suam ipsius, & familiæ sętæ ruinam. Erat quippe Borissius, litterarum quidem ignarus, sed juncta comitati astutia plebi charus simul & venerandus; & qui crudelia nomine Principis machinaretur, quibus deinde palam interventu suo discussis, invidiam, odium, execrationes Principi, sibi favorem & clementiæ

*Borissius Theodoro & Demetrio fratribus ejus insidiat.*

laudem conciliaret. Et addebat gratiæ quod sororem Borissij duxisset Theodorus vxorem. Cum videret itaque technas suas ad intentum adolevisse, Demetrium vnicum Theodori fratrem, et tandem Theodorum ipsum, aut ferro, aut veneno, tollere statuit. Quod facile ipsi efficere, cum ipsius arbitrio prope omnia agerentur, & fratrum juvenculus alter, alter, qui et imperabat, fanaticus, & vel ipsius Basilidis parentis judicio, tintinabulis per templa pulsandis aptior, quam Imperio videretur. Actum erat de vastissimo prope terrarum Orbis imperio. Sed comprehendit Deus sapientes in astutia sua, & quem primo & maxime sublatum volebat, juveniculum Monarchæ fratrem Demetrium, ad tollendum tandem Borissium reservavit: tanto cum eiusdem Tyranni ludibrio, ut interfectum lætaretur, qui in perniciem eius vivebat. Quippe

Borissii

Borissii in Demetrium technas sollicita Principum Mater advertit, & consilio omnino salubri, filiolum suum periculo maturè subduxit. Cum enim sicarii ad necem Principis properarent, puerum qui Demetrium ætate & ore referret, in ipsius, callidè, strato locavit: quem immissi percussores (qui minus eum, centum à Moscua Urbe, ad Vielikam, miliaribus educatum, noverant) ibidem pro vero Demetrio jugulavere: fama deinde astu Borissii sparsa, peste Demetrium periisse, qui in exitium tamen ejus crescebat, Borissius interim de Demetrio porro securus, jam quoque paulatim Theodoro Monarchæ imminabat: quem deinde, Annos 36. natum (ut communis fama est) veneno sustulit: hoc quoque ei indulgente fortuna, quod Theodorus Gerniam conjugem suam, sororem vero Borissii, provinciarum omnium administratricem testamento scripisset.

*Demetrius in exilium.*

*Theodoro veneno non peris Anno 1698.*

Itaque Gernia mox, Borissii suasu, in monasterium sacrarum Virginum, extra arcem, intra tamen adhuc Moscua muros, secessit: experimentum factura, quid de ipsa & Borissio fratre Moscovia universa sentiret. Quid itaque? Monasticam, Mundi tædio, profiteri se simulans, administrationem imperii, in Cneios Boriariosque

*Borissius in Magnam Ducem eligitur.*



(senatus hic & nobilitas gentis est) omnino rejiciens. Populus, fucata jugiter Borissii comitate demulsus, ad Gerniam properat, & observans sacrarum Virginum septa, lamentabili Gerniam, voce precatur, ne se tempore tam periculoso deserat. Cnesiorum quippe & Boiartiorum superbiam aversati, & si quid sequioris sexus prudentia desit, esse Borissium fratrem, Theodori Imperatoris sui soterum; cuicunque oneri parē: tuto huic impetii graviora committi posse. Gernia tergiversari, instare populus universus: nec illam, nec penetralia virginum relicturus, nisi æquissimis, ut putabant, postulatis satisfaceret. Jamque res, ultra tumultum, prope seditionem erat, cum Borissius foras venit, & aptis temporis verbis, fluctuantes, ad malaciam animos revocavit: nec se à petitis illorum omnino alienum ostendit, dummodo Cnelii & Boiarii in partem sollicitudinis veniant. Et sic quidem tunc ad pauculos dies induciā. Cum vero interim Regina, omni sæcularium rerum cura à se abdicata, monasticam verè profiteretur, & pro Gernia Alexandrinæ nomen assumeret, tum populus magis moveri, & Basilio Calio Cancellario Regni, convocanti se & hortanti, ut Cnesiis Boiariisque fidem obstringeret, in faciem restitit, & concordibus

votis Borissium Reginae fratrem, Principatu dignissimum nominat: hunc esse, cui fidem addicere paratissimus sit. Borissius, qui præsens erat, ad honorificas de se voces exurgens, modeste se excusat, ignosci mediocritati suæ petit, & (quo desiderium populi irritaret, & Cnesiorum Boiartiorumque invidiam effugeret) in vicinum primo templum, mox, à populo vociferante retractus, inter excusationes subdolas, in monasterium virginum integrum cum sorore, mensem se abdidit. Augetur conatus populi, cui resistitur, & crescit, qui irritatur, affectus. Totius itaque mensis spatio, undique fugam metuens, claustrum obsidet, & sororis interim Reginae, & ipsius Borissii oportunis, importunis vocibus aures pulsatur. Et Borissii quidem, ut admitti se ad gubernacula Regni patiat, & imperii fasciam, diadema, & insigne capebat: Regina, quatenus apud meritissimum de se fratrem preces suas interponat, tandemque persuadeat, quas millies mereatur, fasces admittere. Ille sumpta modestiæ larva, tanto confidentius renuit, quanto ferventius petebatur, & subdole, quibus appetebat imperium, modis, negat: Hæc autem expugnari se tandem passa est; & hujus precibus & interventu, paulatim ille. Cum enim jam temporis mora, quodammodo detrito



livore, matura omnia viderentur, Cnensis plerisque Boiariisque, ob vulgi pertinaciam, consentientibus, populo cum sorore se sistit, & tandem, Russiae & Moscoviae Imperatorem, Casanensium, Astrachanensiumq; Regem, & variarum Regionum Principem, à voti compote populo, salutari se passus est. Inde festivi ignes, & inter millia tintinabulorum, gratulatoriae voces exceptae: & addebat confirmationi regiminis, quod Tartaros Crimenses, interregni tempore provinciam ingressos, coactis mox centum, vel, ut alii volunt, trecentis armatorum millibus, multis velitationibus secundis, retro ageret. Itaque ea fallacia, iis artibus, dolisque, Borissius, sive Hodunus, imperium Moscoviticum, fasces, & diadema, invasit, ut invasisse jure videretur.

Demetrius in Livonia liberalibus studiis operam dat.

Interim autem in ejusdem imperii spem Demetrius adolescebat, & victo paulatim duro Moscovitarum genio, laudabilem civiliorum Europae gentium humanitatem induebat. Adeoque & in Livonia liberalibus imbutus studiis, & loqui eleganter latinè, & scribere didicit. Et poterat hoc septem annorum spatio, quo Borissius imperavit. At jam, adulta, cum aetate, regnandi libidine, vindicias familiae suae, & universae Moscoviae, in uno Borillio meditabatur. Sed *vana erat*, quod dicitur,

citur, *sine viribus ira*. Quemadmodum regia vitis, sine sustentaculo, prona fatigat humum, sustentaculis autem erecta, maturescit citius, magis fructifera est, & viridantibus deinde foliis, suaveolentibus quoque botris, & aliis gratiarum generibus, ipsa sui sustentacula recreat; ita Regiae familiae Principem, flexum à fortuna deorsum, sublevamine & auxilio, citius ad consequendi imperii maturitatem, & fructus confidentiae suae convenientes progenerandos, indigere videbat; quod deinde, gratitudinis ergo, viridi semper affectu, & multi-granis gratiarum botris, reficeret, & prosequeretur. Quid itaque? Polonia in facie erat, <sup>Patribus Societatis in Polonia se de perire</sup> formidabile jam olim Moscoviae suae regnum, & ad intentum magnanimi adolescentis potentissimum: nec dubium erat hanc ipsam sollicitare, dummodo saltem desolato fides adhiberetur. Tentandum duxit. Cum esset ergo à catholica fide non alienus, potentibus in Polonia Societatis Jesu Patribus, primo personam suam aperit; & quod felix faustumque, fidem invenit. Praesertim cum altero breviori brachio, & verruca in facie, notabilis esset, quae in vero Demetrio fuisse, nemo erat qui inficiaretur. Adhuc ingenio acri, praesentia animi liberalitate, comitate, non indignum se regali prosapia proponebat. Additum efficax quoque, à



que, à prudenti adolescente promissum: fore, si patrium recuperasset imperium, cultus divini maximam rationem haberet, & Moscoviam, ad Ecclesiæ Catholicæ unionem, universam adduceret. Non spernenda visa conditio. Itaque res testata primum, monitoq; Romano Pontifice (ad quem & Demetrius ipse literas non inelegantes sua manu latinas scripserat) commedatitias ad Poloniæ Regem & proceres impetravit. Primum ad potentem in Regno Sendomiriensem Palatinū Georgium Mniscum, supplex introducitur, spe clam facta, ut, si voti compos fieret, ipsius, in quam oculos cōjecerat, filiam uxorem duceret. Igitur à Sendomiriensi & genero ipsius Visnoviczio, ad Sigismundum III. Poloniæ Regem introducitur, & quod summū votorum erat, legitimus Moscoviæ hæres apparuit. Et, ut habent hoc desolati principes, quod misericordiam facile sui similium excitent, dignus auxilio visus est: præsertim cum res tota in non modicū Ecclesiæ (cujus Sigismundus studiosissimus erat) & Regni ipsius commodum vergeret. Itaque Polonia tota delectus, & Sendomiriensi Palatino large pecunias subministrant. brevi temporis spatio, decem milliū coadunatus exercitus. Additus necessarius belli apparatus, et promissis invitata Cosacorum itidem decem millia.

Ad Sigismundum  
I. nro  
ducitur.

Polono-  
rum ope  
Regnum  
recuperat.

Hoc

Hoc exercitū Borysthenem superat: & ad Czernichoviam prima prosperitas, cum Urbs ipsa, præsentiam hæredis adorans, ipsius partes ultro sequeretur. Altera ad Putivlam fuit, cum sub Michelovitzio Soltokevio, præsidium octo Volochdensium Cosacorum millium, ad Demetrium cum ipsa acie transiret. Inde ad Novogardiam primum belli fulmen: ibi aciebus instructis acerrime dimicatum. Sed Borissio, centum millium exercitū, numero prævalente, Demetrius damnum tulit: Sed non, nisi ut irritaretur. Mox enim, cum ad Rilsicum arcem se recepisset, & Borissiani, victoria feroces, petulantius insultarent, aciem instruit: & miro fortunæ ludibrio, victus antea, equitatum victorum concidit, peditatum interneccione delevit. Hoc alterum belli fulmen: quod mox quinque vicinas arces, & inter illas Bialogrodam, centum quinquaginta majoribus machinis munitam, cum universa Severia, ad Demetrium traxit.

Sub hac scriptæ à Demetrio ad Borissium monitoriales litteræ: se respiceret legitimum, Regni hæredem, & imperio, quod injuste invaserat, mature cederet. De cætero, oblatis familiaribus, & ipsi conditionibus optimis, quod vellet monasterium ingrederetur. Has litteras cum in

Borissio  
mors an.  
1635.  
exiit  
Apr.

C

præ-



præsentia, obliquorum Polonicę Reipublicę Legatorum, Danię Suecięq; legeret, excandescens subito corruit, & magna vi sanguinis, per os, nares, & auriculas fusa, pariter animam exhalavit.

Interim Cromo arci (quam elata prima victoria pars exercitus Borisiani obsederat) subvenire placuit. Et ibi ab initio acriter certatum: sed ad Demetrium, cum exercitus parte, Petro Busmanio, à Borisianis transeunte, absoluta mox victoria Demetrius potitur. Septuaginta in castris machine reperte, & tam vastę magnitudinis alię, ut singulas bini viri brachiis circumdatas, vix complecterentur. Ut ergo in castris,

*Uxor*

*Borisii & filia inter-*

sic et Moscuę fecuta animorum mutatio. Et jam ad Demetrii nomen exultante populo, uxor Borisii vidua, cum filiolo suo et filia [post mortem Borisii, ne et illi ludibrium deesset, in mariti solium, paulo ante collocata] jam, ab eodem, in custodiam traditur. Mater, Demetrii adventum metuens, lethale poculum hausit, et liberis propinavit. Quo illa quidem et filius periit, sed filiola, contraria statim potione sumpta, supervixit.

Biduo post solutam Cromi obsidionem, magno Procerum consensu, Demetrius Moscuam petiturus, viam ingreditur, undique per vias occur-

occurren-<sup>Demetri-</sup>te, ad novi Principis spectaculum, mul-<sup>us Moscu-</sup>titudine. Ac tandem, vicesimis castris, summa<sup>via Duk.</sup> magnificentia, Regiam Urbem ingressus est. Et mox, festa omnium acclamatione, Russorum Imperator, Magnus Moscoviæ Dux, plurimum Regionum Princeps, & Astrachani Casanique Rex, salutatur. Denique, ad occasum vergente Augusto, honorificentissime accersita Mater (quæ procul à Metropoli, ad exiguum monasterium, à Borissio, ablegata fuerat) illi pedes obviam ivit. Et illa præsentis solitis solennibusque Ceremoniis, mauguratus est: Cui Nicolaus Cnemico-<sup>Legatus</sup>vius, Societatis Jesu Pater, luculenta & elegantissima Oratione congratulabatur.

Secura, ut videbatur, pace domi forisque <sup>Legatus</sup>parta, proxima, de bene meritis Polonis repen-<sup>Demetrii</sup>denda gratia, cura fuit. Itaq; trecentorum equi-<sup>in Polonia</sup>tum, sub Thesaurario Regni, Athanasio Rosclo-<sup>am, & fi-</sup>vio, ad Sigismundum Regem decreta legatio est. <sup>duccaria</sup>Tum publicæ actæ, pro auxilio, gratiæ: despon-<sup>nuptia,</sup>sata Demetrio Marina, Georgii Mnizsek Sendor-<sup>cum Sen-</sup>miriensis Palatini filia: & fiduciariæ mox Cra-<sup>domiri-</sup>coviæ contractę nuptiæ, præeunte in verba, Ber-<sup>sis Palati-</sup>nardo Maczieiowscio Cracoviensi Episcopo Car-<sup>ni filia,</sup>dinale. A Palatino deinde, Rex, Sponsa, Legatus Moscovicus, & Persarum Regis, qui tunc ad-



erat, Nuncius, convivio excepti: & dona, à Demetrio, Sponsæ, ac Parenti ejus missa, (quæ ducenta aureorum millia excessisse feruntur) iradebantur.

Demetri-  
us apud  
suos male  
audiri, &  
tandem in  
ipsum o-  
jura io.  
De Con-  
soli: ad  
Mar:

At in summo nunc erat & præcipitio Demetria felicitas: & verissimum tandem apparuit, quod Anneus, *Nulli fere & magna bona, & diuturna contingunt: Non durat, nec ad ultimum exit, nisi lenta felicitas.* Hæc ipsa, qua benefactoribus suis Polonis gratificari volebat, benevolentia in exitum cessit, & præservido prurientis voluntatis desiderio, se fortunamque suam, in exitum miser juvenis præcipitavit. Quantum enim Polonis benemeritis tribuebat, tantum apud Russos odii colligebat. Præsertim cū septuaginta familiæ nobiles, aut sanguine Borisiunæ, aut favore contingentes, extra Imperium deportatæ essent, ut eorum (sicut fama, vel invida, vel maligna sparserat) bona extraneis, & hereditariis quodammodo Moscoviæ hostibus, Polonis distribuarentur; adeoque novorum hominum in Russiam, coloniæ introducebantur. Accendebat sinistros sermones; Basilii Szuisioi, ni fallor, illius Johannis Szulscii Plescovienfis olim Præfecti, cum à Stephano Rege, & Johanne Samoſcio oppugnaretur, frater. Hic belli paulo ante,

sub

sub Borissio, Generalis, cum aliis, post Borissii mortem, fortunam Demetrii quoque respexerat. Sed novi mox iterum Imperii pertæsus, cum omnes in adulationem effusi, ad pedes Imperatoris novi prociderent, pertinaciam, spreto periculo, solus tenuavit. Insuper insigni contumelia, Magnum Ducem traducens, adveniam eum et terræ filium (quod talibus circumstantiis gravissimum erat) nominare solebat. Itaque utimur Etsæ Majestatis damnatus, cum ad supplicium duceretur, & jam jam carnificis ictum expectaret, mira Demetrii Imperatoris clementia, et vi tam, et dignitatem pristinam reciperavit. Sed, ingrato quod feceris, perdidisti. Quippe Szuisioi, Scharabæi instar, Demetrium, à quo vitam acceperat, punigere non desinebat. Et post beneficium pejor, & audacior factus, cum pluribus aliis, in Demetrii, qui ipsi Spiritum dederat, necem conjuravit. Et quod amplius, parricidii satellites & latro, premium sperabat, Imperium Domini. Ne vero putes sanguinem tantum sitisse, divitias pariter anhelabant, et adventantis Sponsæ gazam præstolabantur: quasi ejusdem sceleris esset, parricidam simul et raptorem esse.

Et jam Sendomiriensis Palatinus, cum filia

Demetri-  
us cum  
Sendom-

Sponsa, & numerosa nobilitate Polonica, Craco-

via



riensis  
Palatini  
filia nu-  
ptias ce-  
lebrat.

22 **GESTORYM VLADISLAVI IV.**  
via & à Sigismundo Rege disceserat. Sed lente  
progrediebatur, quasi non omnia prospera omi-  
naretur. Ut longinquitatem tamen itineris col-  
ligas: cum exeunte Januario abire cepissent, non  
nisi Majo mense Moscuam pervenere. Ibi die-  
bus aliquot quiete consumptis, tandem de so-  
lennibus cogitari captum. Et jam ad magnifi-  
centiam comparatis omnibus, ipso illo mense  
Majo, in Palatio Regio, verba faciente Russorum  
Patriarcha, Sacris matrimonii vinculis, Deme-  
trius & Marina, constricti sunt. Ut autem Im-  
perator quoque Imperatrice frueretur, à Palatio  
ad Templum, Attalicis vestitum auleis, eodem  
magnificentiae tenore migratum est. Ibi aurea  
corona tempora redimita, Russorum Imperatrix,  
Magna Moscoviae Dux, variarum Regionū Prin-  
ceps, Astrachanensium, Casanensiumque Regi-  
na, more solito, salutata est. Vespera deinde illa  
& nox Hymenæo pariter Comoque dicata.

*A Szuis-  
cio, &  
conjurati-  
o occide-  
tur. Anno  
1606.  
26. Kal.  
Johann.  
III.*  
Dum autem sequentes dies, hastiludiis, lu-  
dicris, tormentorū fragoribus, & similibus aliis  
lētitiæ argumentis contumuntur, interim cum  
conjuratis Szuiscius, Tragædiam suam instruit.  
Et eo confidentius, quod paulo ante, adducto-  
rum ex Polonia secum Germanorum satellites,  
Russis gratificari volens, Demetrius dimisisset.  
Itaq;

**PARTIS PRIMÆ, LIBER L.** 23

Itaq; Sabbatum, quod in 16. Kalendas Junias in-  
cidebat, cœdi destinatum: ipso etiam Demetrio  
harum rerum penitus non ignaro. Qui jam ab  
aliquot retro septimanis, ut sibi caveret moni-  
tus, quod Germanos satellites tam leviter dimi-  
sisset, serio dolebat. Hinc subitarias aliquot, & Li-  
vonibus, Gallis, Anglis, Scotis, Polonisque co-  
hortes conscripsit: sed hoc imminētis fati erat  
leve solatium. Szuiscius enim cum conjuratis  
jam summo mane aderat, fama interim per Ur-  
bem sparsa, Polonos in armis esse, & ad interne-  
cionem Russos delere constituisse. Itaque ab om-  
ni parte tumultus: & aliis ad prædam, aliis ad  
Polonorum caedem discurrentibus, Szuiscius  
cum suis in Demetrium vertitur, sub id majus  
tintinnabulum, in incendii signum, pulsari im-  
perans, ut Demetrius excitaretur, et, quod hoc  
casu solebat, extra conclave procurreret. Exci-  
tatus Demetrius, cum satellites fugisse adverte-  
ret, & majus aliquod, quam incendii, periculum  
suspicaretur, acinacem Turcicū corripit, & per  
fenestram sese dimittens, luxato, præcipiti lapsus,  
femore, à circumfusa turba capitur, & in aulam  
majorem, in qua externorum Principum Legati  
audiri solent, Szuisicii jussu, ducebatur. Non sta-  
tim tamen insitam generositatem posuit. Cum



enim è Boiariis, hoc est nobilibus, unus, prodigionem illi, vitamque sceleratam objiceret, stricto acinace, medium dissecavit. Inde conversus ad Proceres, alloqui populum petiit, ut, quicquid esset, palam confiteretur. Sed conjurati hoc illi, negaverunt, & in miserum irruentes, non uno vulnere confecerunt. Sic ut illud ibi verissimum fuerit, quod in Ruffino Claudianus,

*Es non infecto puduit mucrone reverti.*

Ne vero ultima Demetrii verba, & genuina confessio ejus, in vulgus spargeretur, Germanum, quem unicum penes se habebat satellitem, simul interfecere. Tum in vulgus sparsum, impostorem Demetrium fuisse, adeoque ultra mortem crudeles, in defuncti cadaver levierunt. Et fune, per pudenda, transmissa, per calcata viarum sterora, ad forum traxerunt. Ibi sanguine lutoque fedatum, in mensa quadriduo extensum jacuit, utrica quoque fistula, quo rustici Poloni utuntur, in os inserta, cum denario, quasi pro musici cantus auctoramento. Sendomiriensem, quod diversorium delectis firmatum haberet, infestis aditibus, claudere contenti, ad aliorum Polonorum, & miserę Sponsę gazam diripiendam discurrere, quę una cum Germanorum Polonorumque direptis opibus computata, integras viginti tonnas auri excessisse dicitur. Post

Post publicam hanc rapinam simul & lanienam, quasi re optime gesta, à Boiariis, Cneshis, & Basilio Szuiszio, in consilium itum, & de novo <sup>Szuisii</sup> <sup>in Magna</sup> <sup>Moscorie</sup> <sup>Dux.</sup> rursus Principe eligendo serio deliberatum. Sed quid multis? Tantum in Szuiszio parricidium valuit, ut hic plus quam Catilina, præ aliis omnibus eligeretur. Cujus mox in Demetrium furor re-crudit, & ut se Ducem legitimum faceret, illegitimum illum publico scripto demonstrare conabatur: hæreticum subinde, veneficum, impostorem, transfugam, & sacrilegum nominando. Postremo ad plenam imposturę fidem faciendā, cum sub id, insolito his mensibus, gelu fruges ubique adurerentur, ad divinam hoc in Demetrium iram retulit, non, nisi penitus annihilato ipsius cadavere, leniendam. Itaque mox reefferrata, ut ita dicam, plebe, Demetrii, agrè nuper, mandatum terrę, corpus eruit, & illo publicè cremato, cineres in aëra sparsit.

Cæterum ut verissimum supra, de Demetrio, Romani Sapientis dictum erat, ita & verissimum hoc, de Basilio Szuiszio, doctissimi Severini Boëtii <sup>Demetrius sup-</sup> <sup>positus</sup> <sup>in Szui-</sup> <sup>scum.</sup>

*Quicquid, præcipiti via,*

*Certum deserit ordinem,*

*Latum non habet exitum.*

Quippe vix Demetrius erat occisus, cum ilico

D

sup-



supposititius, immo nondum visus Demetrius fuit exortus, qui Szuisium persequeretur: ita adgubernante fortuna, ut qui legitimum verumque peremerat, à supposititio & nondum viso vindicaretur. Res est. Post Demetrii obitum, qui res in Moscovia turbatas malebant, Cosacis se adiunxerunt, & iterum fugisse Demetrium, aliumque pro illo interfectum dicentes, ipsius adhuc partibus militabant. Et, quod mirere, rumori ex eo fides accessit, quod eodem, quo tumultuabatur, tempore, quatuordecim vacua generosis equis loca, in hippone reperta fuerint, quos fugiens ille, ut vulgabatur, abduxerat. Itaque hi Demetrianum in Szuisium omnino feroces, terribiles, per annum & alterum, Moscoviae toti vastitates intulerunt. Ad extremum, ut fucus magis coloraretur, insigni temeritate, Demetrium, qui nullibi erat, quendam de suo corpore creaverunt.

*Sigismundus III. in Moscoviam movet.*

Interim Sigismundus III. Poloniae Rex (cuius Legati per biennium jam & amplius captivi Moscuæ detinebantur) variis injuriis irritatus, exercitum militemque legit, & mox Smolenscum versus in Moscoviam movit. Cæterum quod illud Smolenscum, quis situs, conditio, status, quia ad rem pertinere videtur, breviter aperiemus. Præsertim cum illud, quam diu erit, & fortassis etiam

iam cum non erit, VLADISLAI IV. victoriarum, illustre monumentum futurum sit.

Smolenscum ergo non exigua Russia, ad Boristhenē, natura pariter & arte munitissima Urbs est, et, quod claritudini addit, turribus & vastissima arce famosa: Hanc, allecti sæpius opportunitate loci, Magni Moscoviae Duces astu & ferro tentavere. Sed eripi Reipublicæ Polonæ non potuit, nisi Polono Duce; qui, ad magnum Sarmatiae damnum, ad propriam patriæ suæ perniciem, quod mirere, tamen inventus est. Is erat Michaël Glinski, nobili Rhutenorum Principum familia natus, cæterum virtute bellica longe famosior. Hic in Germania adolescens, sub Alberto Saxoniae Duce, tum temporis in Frisia belligerante, rebus, per omnes militiæ gradus, strenue gestis, celebre sibi nomen pepererat, tandemque, moribus Germanorum imbutus, in Patriam redux, apud Alexandrum Poloniae Regem auctoritatem adeptus, eo loco fuit, ut graviora quæque negotia ipsius arbitrio committerentur. Tartaros ea quoque clade affecerat, quali à Witoldi tempore Lithuani postea nunquam. Una illi, Regis causa, cum Johanne Zabrezinio, Palatino Trocensi, Lithuaniae Marscalco, discordia nocuit, non tam sua, quam Zabrezini ipsius culpa. Cum enim A-

*Smolenscum describitur.*



exandro Rege, componente dissidium, ac postea mortuo, Sigismundus succederet, mox Johannes Michaëlem, crimine affectati Imperij, & prodicionis Patriæ accusavit. Cujus injuriæ Glinzcius omnino impatiens, rogavit sepius Regem, quatenus communi judicio, ut tantum à se crimen depellere posset, causam discerneret. Sed, præoccupato Regis animo, petitio locum non habuit. Itaque ad Vladislaum Hungariæ Regem, Sigismundi fratrem proficiscitur. A quo litteris & Oratoribus, quibus, ad cognoscendam causam, Rex monebatur, impetratis, quod æquum videbatur non una via tentavit. Sed incassum, omnia Zabrezinio discuciente. Quid itaque? Indignitate rei permotus, tale facinus, Regi, aggressurum se dixit, quod ipsi sibiq; mærori, esset aliquando futurum. Mox iratus domum se contulit, & impetratis, clam, à Moscovi salvi conductus litteris, ulciscendi libidine flagrans, in Zabrezinium, qui in villa tum, circa Grodnam, erat, toto impetu fertur. Cumque, ne elabi posset, dispositis circum ædes militibus, immisso percussore quodam Mahometano, in lectulo dormientem interimit. Ita Zabrezinium ultus, ne, sine utilis fidei tessera, ad Moscum accederet, Lithuanica quædam castra aggreditur. Sed, superveniente

Regis

Regis exercitu, cum par non esset, Moscuam fugit. Ibi, à tum regnante Basilio, famosi istius Johannis Basilidis Patre, honorifice satis susceptus, illi author fuit, Smolenscum, à cujus obsidione, paulo ante, cum clade recesserat, denuo obsidendi; fore enim, dummodo sibi Smolensciæ Ducatus concederetur, ut Urbem tantam Imperio Moscovico, se Duce, adjiceret. Assensit Basilius, certus se nihil daturum, si vicisset. Itaq; Glinzcius Urbem, arcia iterum obsidione, pressit; & adimens omnem defendendæ arcis, præsidio, sua præsentia, spem, vi, astu, industria, corruptione, deditioem extorsit. Anno, post Christum natum 1514. et, ab hoc tempore, Smolenscum Moscoviticum fuit. Ne autem ulterius esset, Sigismundi Tertij Poloniæ Regis, prudentia, virtus, industria, effecere.

Ergo Anno Christi 1609: obsidione premi-  
ceptum & aditibus ubique interclusis, turribus,  
munimentis, propugnaculis, & multis, paulo ante,  
exoticis artibus, sollicitatum est. Adeoque  
Mosci de Scuto Imperij sui jure solliciti, ad Bialam  
numerofo exercitu congregato, solutionem à longinquo minabantur. Non tulit præsumptionem illorum Sigismundus Rex. Sed ipse Smolencensem obsidionem continuans, Stanislaum Zolkewium, felicissimum exercituum Ducem, aliquot  
militum

*A Polonis  
obsidetur.  
An. 1609*

*Mosci ca-  
duntur.*



militum millibus instructum, in hostes misit. Qui magno animo Biallam in hostes profectus, congregatum ibi Moscorum exercitum dissipans, reliquias in Zarembam (munimentum sic vocant ex arboribus terraque immodum fortalitii structum) pepulit, et, ne esset qui evaderet, statim obsedit.

Interim à tergo Smolenscum urgebatur. Et tantum Sigismundi, juncta virtuti, industria valuit, ut alia quoque, præter Moscovitas Nationes, ne caperetur, in sollicitudinem verterentur. Quid ergo? Sueci, Gothi, Wandalii, & quicquid populorum latet sub hisce nominibus, sub Carolo Suedermannia Duce, in defensivum, offensivumque, cum Moscis, foedus coäluere. Et sane horum quoque intererat, ne Urbe tam opportuna, comoda, & munita, Polonica potentia stabiliretur. Præsertim, cum jam legitimum & hereditarium Regem suum, & Principem, à quibus desciverant, timere didicissent. Ergo, sub Pontio Gardia, novus hostis, novus exercitus, et, quod mirare, in ipsa Moscovia, Et tanta quidem erat Szuisicio Duci exterorum fiducia, ut jam non tantum de reprimendo Demetrio, sed Smolenscensi obsidione levanda, cogitaret: ad quod, si ad Zarembam Zolkevium oppressisset, momentum allaturum, arbi-

*Sueci ju-  
gunt se  
Moscor.*

arbitrabatur. Quare hunc viginti quinque millium exercitum eo destinat.

Sed intellexerat jam Zolkevius propositum <sup>Zolkevi-  
us Suecos  
& Moscos  
vincit.</sup> ejus, & parum mox interesse docuit, cum Suecis dimicaret an Moscis, cum multis præliaretur an paucis. Immo tantum non æstimavit, ut, relictis duobus ad Zarembam millibus, quinque millibus ipse & centum militibus, his obviam copiis processerit. Et, absoluto quinque horarum itinere, in Clusfinensibus campis assecutus est. Res Moscis Suecisque prodigio similis & temeritati visa est, cum de fuga potius, quam pugna, Zolkevium cogitare arbitrarentur. Sed dispulit ille, præsentia sua, pravæ opinionis nebulas, nec temeritatem, sed virtutem esse, fortitudine pariter & exitu pugnae demonstravit. Eam siquidem militari arte, eaque ferocia hostes aggressus est, ut circumfusæ, & à lateribus, & à fronte, paulo ante, catervæ, quasi uno momento dissiparentur: & tam numerosus exercitus, à quinque millibus deleteretur. Pontius Gardias, exterorum Dux, inter fugientes erat: Sed, eodem fortunæ cursu, Sarmatæ & illum, & receptaculum ejus Ostrosciam arcem aggressi, benevolentia exteris facta, & abeundi facultate concessa, victoriam sequi coegere. Nec Zaremba, suorum clade audita, diu tenuit, sed Polonicam quoque felicitatem suspi-

ciens,



ciens, ad deditionem se ipsam humiliavit.

Lisso-  
vius  
Mosco-  
via  
raflat.

Histor:  
Rerum  
Poloni:

Alia parte, Lissovio Duce, Poloni, totam vi-  
ctoriis Moscoviam peragrabant. De cuius Ducis  
militiæ moribus, mira Petricius. *Mora fuit*  
*apud eum, inquit, & lassitudo formidata: in arviaq.*  
*& remota progressis, si quis obhæsisset, ne index ubi*  
*alij versarentur exstaret, necatus relinquebatur.*  
*Quære pontes vadaque illicitum: pro ut usus aut*  
*necessitas inciderat, in altum se immittere, nihil tre-*  
*pidanti animo, & transnatare profunda equo, aut co-*  
*dem amne gurgitibusque mergi necesse erat.* Hoc

Et Deme-  
trius sup-  
positus.

Lissovius modo intima Moscoviæ viscera lacera-  
bat: & citius Oppida spoliabat, quam venire nun-  
tiaretur. Demetrius quoque supposititius immi-  
nebat, immanis æque ac spurius. Non omnino ta-  
men infelix, qui plurima, etiam circa Moscuam  
Urbem, Castella occuparet.

Szuiscius  
imperio  
se abdi-  
cat.

Boiarii ergo Cnesique, à tot hostibus in an-  
gustias summas redacti, quo pax generalis impe-  
rio toti conciliaretur, Szuiscium rogavere, Titulū  
Magni Moscoviæ Ducis, Reipublicæ pacique do-  
naret. Fecit ille, tot cladibus humilior redditus,  
facilius, quam rogabatur. Et Imperii insignia, Sce-  
ptrum, cum purpura ponens, relicto quoque Pa-  
latio, privatas in ædes secessit: & mox assumpto  
cucullo, ad Zudnovam Monasterium, ultro ini-  
gravit.

Itaq;

Itaq; jam, absque Magno Duce, Moscovia  
erat: nec legitimus quisquam futurus (ita quip-  
pe inter Senatores convenerat) nisi qui suffragiis  
omnium eligeretur. Difficile fuit, cum in tres  
partes divisa nobilitas, Patriarcha cum suis Basi-  
lium, Basilii Galitchini Ducis, Primi Moscoviæ  
Senatoris, filium: Telephus vir nobilis, cum suis,  
Demetrium supposititium: Mscislavius, vir ma-  
ximæ authoritatis, & Polonis addictus, VLADISLAVUM Principem, tunc temporis quindecim  
annos natum, & Vilmæ agentem: & jam nunc  
tamen, è longinquo, virtutū & generositatis suæ  
radiis, Moscorum animos afficientem, nomina-  
ret. Et Patriarchæ quidem ratio potissima erat,  
in ipsa Provincia potius, quam extra, Magnum  
Ducem quærendum: præsertim cum non adeo  
adhuc Moscovia Prudentiorum Virorum ste-  
rilis esset, ut in illa Imperio dignus inveniri non  
posset. In oculis Basilium, Basilii Galitchini,  
primi Senatoris & prudentissimi viri, prudentis-  
simum filium esse: cui nihil, ad eminentiam  
hanc, natura negasset: adeoq; Imperio admo-  
vendum videri, cui, omnium iudicio, nihil, nisi  
inauguratio sola deesset. Sed in contrarium e-  
rat, quod remediū publicis malis, & totius Impe-  
rii salus quæreretur, quæ ex hac electione sperari

Moscorū  
de novo  
Duce de-  
liberatio.

Patriar-  
cha Basi-  
lium, Ga-  
litchini  
Ducis fi-  
lium sua-  
det.

E

posse



posse non videbatur. Quid enim Galitchini filium ad Polonorum & Demetrii vires debilitandas, momenti allaturum? Szuisium quoque in Moscovia natum fuisse, quod si suffecisset, abdicationem ejus non fuisse postulandam. Telephus, quia pro Demetrio suppositio affectum potius, quam solidas rationes adduxerat, ab initio statim non placuit: præsertim quia electionem illam plus turbarum, quam concordiam, allaturam apparebat. Mscislavius Polonorum potentiam, legitimi Demetrii cæde, & rapina publica Moscuæ irritatam, ob oculos ponebat: Insuper Legatos eorum biennio integro amplius detentos, & non una injuria Regnum ad arma provocatum. Jam à Zolkevio auxiliares copias cæsas, & Pontium Gardiam in vinculis esse. Lissovium intima Moscoviam viscera lacerare: ipsum Sigismundum Regem, Imperij quodammodo Scutum, Smolenscum obsidere. Et quid ab omnibus hisce nisi extremam ruinam metuendam? Satiùs ergo videri Vladislavum Principem, cujus virtutes Regiæ passim celebrentur, in Magnum Ducem eligere: quo uno & mala imminuentia tollerentur, & facile, pulso Demetrio, pax toti Imperio conciliaretur. Hæc sententia, etsi corda percuteret, tamen, ob ingentem fere, in Polonos,

Telephus  
Demetrii  
suppositio

Mscislavius  
Vladislavus  
Principem

lonos, odium, tum quidem locum non habuit.

Itaq; periculosa Moscoviæ scissio erat. Sed, cum salutare nihil, communibus votis statueretur, casus occasionem obtulit. Telephus enim, turbatoris ingenii vir, patefacta aliqua porta, intromittere Demetrium Moscuam statuit. Quod Mscislavius subodoratus, Zolkevio scribit, quam posset agglomeratis passibus Moscuam festinaret: in mora periculum esse. Et eam Urbem videri, quæ nec contemnenda, & si defenderetur, maximum Vladislavi partibus allatura momentum videretur. Zolkevius, occasione lætus, victricia circumagit arma, et, demonstratis, per Moscos, viarum compendiis, opportune adfuit, cum jam Urbs à Demetrio oppugnaretur. Itaq; quot Mscislavius petiit, millia Urbi immisit; quæ juncta Moscis, sub Syoltico-fio Duce, qui jam antea Regi Poloniæ fidem obstrinxerat, tam acriter resistere, ut, eodem quasi momento, & Urbem tuerentur, & magna clade Demetrium, trans fluvium Moscum, submoverent. Tum, capti centeni aliquot nobiles, quo clementiæ fama colligeretur, statim, sine Lytro, omnes dimissi.

Verissimum est, ut magnes ferrum, ita humanitatem, victoriæ junctam, mentes trahere. Sc-

Telephus  
Demetrii  
Moscuam  
vocat.

Mscislavius  
Zolkevius

Demetrius  
à Poloniis  
caditur.



Omnes in  
electione  
Vladislai  
consensi-  
unt.

cuta quippe ingens statim animorum mutatio,  
& omnes, relicto, tanquam Impostore, Deme-  
trio, favorem, ut suetum est, prosperę fortunę  
dicaverunt. Pręsertim cum Mscislavius Galit-  
chino author fieret, ne Moscoviam periculo ma-  
jori exponeret, nec onus susciperet, cui par (prę-  
sertim si rursus Szuiscius affectaret Imperium)  
futurus non videretur. Post maturam delibe-  
rationem assensit Galitchinus. Et mox omnes  
Moscovię Senatores, triumphalem Pompei vo-  
cem secuti, *Orientem potius quam Occidentem So-  
lem adoravere*. Et ut Vladislauum Principem,  
qui jam magnus virtutibus erat, magnum ti-  
tulo quoque facerent, communibus, quod æ-  
quissimum est, suffragiis, in Magnum Moscovię  
Ducem elegere.

Vladislai  
in Magnā  
Moscoviā  
Ducem  
electio.  
An. 1610  
Mense  
Septem:

Itaq; tentorio, pro more gentis, inter Ur-  
bem, & Polonorum Castra, erecto, quo pacis &  
concordię cōmodis maturius fruerentur, Mscis-  
lavius, Galitchinus, universa nobilitas, & Patri-  
archa gentis, Vladislao Sigismundo, Sigismundi  
III. Polonię Suecięque Regis, & Magni Lithuanie  
Ducis, filio, Suecorum, Gothorum, Wandalo-  
rumque hereditario Principi, tanquam Magno  
Moscovię Duci, juravere, Zolkevius autem, no-  
mine Serenissimi Vladislai Principis, conven-

tos

tos inter Gentem & Principem articulos, jure-  
jurando vicissim confirmavit. Et mox Decretum  
electionis, & litteras, Magni Moscovię Ducis  
titulum continentes, & confirmantes, ad Sigis-  
mundum III. ad Smolenscum, in castra misit.  
Tum ad lætitiā versi Procere utriusque gen-  
tis, se muneribus invicem prosequabantur. Et,  
post solennes tintinnabulorum pulsus, tormen-  
torum boatus, vulgi voliferationes, ad arcem,  
cum Zolkevio, migravere. Ibi Sexcentis, quod  
dicitur, luciniarum ferculis, opipare pasti, Salu-  
tationes invicem propinaverunt. Demetrius o-  
mnia, per Exploratores, edoctus, desertis, quas  
circa Urbem occupaverat, arcibus, cum suis prę-  
cipiti cursu fugit. Et ad Polonos suorum aliis,  
ad Moscos aliis deficientibus, ipse tandem vivus  
in manus hostium venit, & in rheda, propria ju-  
gularus est.

Demetrii  
suppositi-  
tus exitus

Maxima cum Smolensco difficultas resta-  
bat, Et quamvis ita Zolkevium inter & Moscos  
convenerat, ut illud Sarmatię restitueretur, adeo-  
que & suppetiæ nullæ illi mitterentur; tamen,  
illud, sub Præfecto suo Michaële Boriszowiciō  
Sehino, annua amplius obsidione debilitatū, ul-  
tra Moscoviam quoque pertinax, nolebat, nisi  
iisdem cum illa conditionibus, ligari. Post cen-

Smolen-  
scum sub  
Sehino,  
pertinax.

E 3

tum



tum enim annorum (quibus Moscis servierat) obsequia, ne Polonicum esset, Moscoviticum videri voluit, & deditioem quidem, sed Vladislao Principi, tanquam Magno Moscoviae Duci, non Sigismundo III. ut Poloniae Regi, facere. Contra Magnus Lithuaniae Cancellarius Sapieha nitebatur: aliamque cum illis, quam Moscis, agendi rationem esse demonstravit. In hos quippe Poloniae Regi nihil juris esse: in Smolenscum autem, tanquam in controversum, ab antiquo, Lithuaniae membrum, jus Regi, ut Magno Lithuaniae Duci, vel Moscovia ipsa concedente, omnino competere. Quare, omissis subtilioribus rationibus, ad Clementiam Regiam potius, quam inutiles distinctiones, confugerent. Secus; non aliter cum illis, quam Rebellibus, actum iri. Sed frustra omnia. Obfirmato enim Sehinus, ad omnem eventum, animo, pertinaciter resistebat, Praesertim cum diuturna, iis in locis, & pluvialis hyems immineret, et, ebulliente paulatim Borysthene, deserturos stationes Polonos opinaretur. Sin minus; Urbem esse, cum qua occumberet, non inglorium videretur. Utrumque fere accidit. Nam, intumescantibus aquis, potioem militem Sigismundus in hyberna deduxit: Sed, victa mox hyemis asperitate, non aliter ac si respirasset,

fasset, animosius, ineunte vere, iterum obsidionem aggressus est. Sed resolutio Regis intra Sehini Moscorumque pertinaciam erat, quâ, omnis conatus ejus, irritus reddebatur; adeoque Rex obsidionem solvere proponebat. Tum illud memorabile, Bartholomei Novodvorsii, Equitis Melitensis, Poloni. Hic, intellecto Regis proposito, magna fiducia illum accessit. Et, ignoscat Regia sua Majestas, inquit, quod Solus ego Regiam suam Majestatem à proposito suo dehorter. Octo dierum moram supplico, & pauculos sumptus, & hanc Urbem, per Dei gratiam, Regi suae Majestati tradam. Et, quos sumptus, inquit Rex, Centum Centenarios pulveris, respondit. Sed, ediffere rationem, ait Rex, quomodo hanc Urbem trades. Cum Regia sua Majestas, Respondit, hanc Urbem primo, ante biennium, obsidione clauderet, canalem ego, ferreis cratibus munitum, sub mœnibus animadverti. Has ego crates, toto illo biennio, varijs instrumentis ferreis, frangere & tollere penitus laboravi. Et ne Mosci (qui aliquoties me laborantem in mœnibus audierunt, & canem esse putantes, ossa rodentem, lapidibus impetivere) me animadverterent, hyeme vestem Griseum glaciei similem, aestate viridem gramina exprimentem indui. Adeoque hostes fefelli. ut sublati jam cratibus ferreis, fossaque facta, Dei gratia, salvus suae Regiae

Novodvorsius  
Regi ad  
expugnationem  
hortatur



Regiæ Majestati, frustra tentatum hætenus, ad disjicienda, subiecto pulvere, mœnia, ruinam hyatumque faciendum, occasionem offeram. Simulet itaq; aliis partibus Regia sua Majestas assultus, & divertat Barbaros, ego interim, cū minime, & qua minime hostes putabunt, parte ruinam faciam, & subito cum delectis irrumpam; adeoq; citra sanguinis effusionem, Regiæ suæ Majestati, Urbem tradam. Rex Novodvorscii Oratione letus, ipsoque collaudato, centum centenarios pulveris dari iussit, et, prout petierat Novodvorscius, oppugnationem instruit.

Smolenscum armata manu expugnatur  
Anno 1611.  
4. Non.  
Jun.

Itaque Anno, post Christum natum, 1611. 4. Non: Jun:, divisis, ad irruptionem, copiis, seorsim (quo æmulatio vires adderet) Polonis, Germanis, Hungaris, Cosacis, totidem, una vice, locis, Urbem aggreditur. Dum pugnatur, dum resistitur, Novodvorsius, accenso pulvere, stratisque immani ruina mœnibus, à tergo, & inopinantibus Moscis, cum delectis irrumpit, & facile Poloni, citra jacturam militum, Urbe potiuntur. Ad arcem vero pugna recruduit. Sed mox, ut fit, Clamor, strepitus, & consternatio; turbabant, animos: frangebant oppugnantium, ab extra virtus, ab intra, depascens armamentarium, templa, ædes, & omnia, ignis. Quæ cuncta, in

mise-

miserorum Moscorum horrorem, nimum momenti crescebant. Ad extremum ergo cessere, & Smolentcum Sigismundo III. Poloniae Regi, suo interitu, Poloniae membrum permiscere. Hoc eis genio famæ, in malis, indulgente, ut Urbem, inter paucas, sua strage, memorabilem facerent. Biennalis siquidem obsidionis spatio, amplius, quam ducēta Moscorum millia interiisse dicuntur. In expugnatione vero ipsa, octo millia, ferrū & flamma consumpsit. Michael autem Boriszowicz Schinus, Præfectus Urbis, jucundo spectaculo, vivus in Polonorum manus venit. Quem Sigismundus III, etsi ut rebellem punire potuerat, tamen, ut Moscorum animos sibi conciliaret, in Vladislai filii, electi Magni Moscoviæ Ducis, gratiam, vita denatum, captivum duxit.

Schinus capitur.

Parta hac tam insigni victoria, tempus reliquum Sigismundus, ordinandæ Provinciæ, & [quo Vladislao filio suo, electo Magno Moscoviæ Duci, magis consuleret.] Moscoviæ ipsi impendit. Ne vero in absentia filii sui, quicquam in Imperio illo innovaretur, Basilium Szuiscium, cum Johanne & Demetrio fratribus, per Zolkewium Ducem, in Poloniam abduci curavit. Qui, insigni novercantis fortunæ ludibrio, Sigismundi Regis triumphos, in comitiis ipsis Warsavien-

Sigismundus Provinciam ordinat.

Szuiscius in Poloniam abducitur.

F

fibus,



sibus, cum Sehino capto, postea nobilitavere.

Jam itaque indubie, Vladislaus Princeps, legitimus erat Magnus Moscoviæ Dux. Quippe, *virtutes.* quod æquissimum est, liberis legitimisque omnium votis, cum dignissimus omnium videretur, electus, litteris publicis, & Moscorum jurementis confirmatus. Et profecto, mira naturæ indulgentia, prudentiorum quorūq; judicio, sufficere, & illi, & quantumcunq; imponere fortuna posse videretur, oneri par existimabatur. Nihil ergo deerat, nisi Moscorum constantia. Sed quid par levitati gentis? ad perfidiam paulatim degeneravit, & publico Senatorum scelere, ex Cnevis, si-  
*Moscorū, aliū Duce, cum levitas, & in Polonos aversa.* ve Magnatibus, unum, Michaëlem Fedrowicz, Principe Vladislao relicto, in Magnum Moscoviæ Ducem elegerunt. Et successu temporis iterum Moscuæ Urbe potiti, multos per annos, vario Marte, cum Polonis dimicaverunt, ad extremum, et etiam præsumptionis progressi, ut Smolenscū, quod Alexander Gönzevius, Palatinus Smolenscensis, Romana virtute tuebatur, denuo obsidione premerent.

*Horribilis Moscovia de-  
fecto An-  
1617.* Irritari Sarmatia videbatur, & tangi generositas nobilissimæ gentis. Quid ergo? Serio tandem in ultionem excanduit, et, indulgentiis à Summo Pontifice quoque concessis, qui sacram illam mili-

militiam, contra Schismaticos, sequerentur, Anno 1617. non uno exercitu Moscoviam ingressa, omnia sursum deorsum miscuit. Mosci, quasi una manu, à Smolenscensi obsidione fugati, et, terrore deinde latius dato, Provinciæ singulæ devastata. Tum quoque Vladislaus Princeps, accepto à Patre exercitu, Moscoviam suam ingressus est; lætus quod occasionem bellandi nactus esset, quæ spargere generositatis suæ indicia posset, nec otio domi detidioso corrumpi cogeretur. Et, averfari se ejusmodi, factis ostendit, de quibus idem, quod jure de Prætorio illo Romano, Seneca: *Hic Vatia Ep. 55. situs est.* Sciebat enim, quod non palpatur, ærugine ferrum corrumpi, quod pulsatur autem & tenitur, candorem pariter & fulgorem oculis intimare. Et hominem otio saginaque sua diffluere, ignavia prorsus corrumpi; laboribus autem & strenue gestis ad gloriæ victoriarumque radios, ad laudabiles triumphorum fulgores, teri quodammodo & contrectari. Verbo. Generosus apparuit. Hoc est (ut Seneca vult) *ad virtutem à natura Ep. 44. compositus.* Itaque insigni fortitudine, & felicitate, arces & Urbes varias aggressus, quæque obviam *expeditio prima, & rursus.* subjugavit. Non Novogrodekum, non Starodubum, non Czernihovia restitit. Sed integræ Provinciæ, Severia Czernihoviaque, ad ipsos usque



Præcopensium Tartarorum fines, Vladislai imper-  
tu expugnata, jugum admiscere. Adeoque Vladis-  
laus Princeps, continuis, expeditionem primam,  
victoriis, illustravit. Post hæc nihil intactum to-  
ta Moscovia fuit. Rezania vastata, Wolodi-  
meria spoliata: Novogardiæ majoris minoris-  
que ditones populatae. Transsiliss, Tanais, Mo-  
scus, & Volga, fluvii. Astrachani & Casani Re-  
gna exhausta. Permij & Pizarri ad paupertatem,  
reducti. Populi ad cingulum terræ, & adorantes  
Auream Anum, pellibus, substantia, & divitiis suis  
exuti. Ad usq; Caspium mare, glacielem Ocea-  
num, & horridam perpetuis nivibus lappiam vi-  
ctoriis penetratum. Verbo. Tanta Polonorum per-  
tinacia & resolutione, temeraria Moscorum levitas  
castigata, ut spreto Moscoviæ gelu, multa mil-  
lia, præsertim Lissovio Duce, non ignem, non te-  
sta, non domos villasve, longo temporis spatio  
subierint, nisi ut aut exurerent, aut spoliarent.  
Itaque tot continuis cladibus Moscoviæ Imperi-  
um deformatum, cum nec in agris amplius villæ,  
nec in villis, si alicubi adhuc casu steterant, homi-  
nes reperirentur: Cum Urbes & Oppida in solitus  
dines abissent, & immania tantum, vattissimorum  
Provinciarum, cadavera superessent. Polonis  
concessis Michaëli quatuordecim annorum indu-  
ciis,

Inver Po-  
lonos &  
Moscos

ciis, dimissis quoque Johanne & Demetrio (Basi-  
lius quippe in captivitate obierat) Szuisicii, Sehi-  
noetiam & Magnatibus aliis, juramento tantien-  
prius præstito, se nunquam in Poloniam arma re-  
sumpturos, fessa etiam victoriis arma posuerunt;  
ut deinde, majori cum fructu, sub Rege Vladislao  
(cui Severia Czernihoviaque Provincia, & Magni  
Moscoviæ Ducis titulus, & ius permittebatur) re-  
sumerent, & summa, perfidæ gentis, ignominia,  
vindictam consummarent.

Etenim, si rem penitus inspiciamus, non sine  
occulto quodam fortunæ sensu, ob binas potissi-  
mum rationes ad gloriam tamen Vladislai utrâq;  
hanc perfidæ gentis, in præjudicium ejus, culpam,  
Superos permisisse videbimus. Tum ut felicitas  
ejus adversis radiaretur, & utrum prospera por-  
ro mereretur, infortunio probaretur. Sed, quod  
Sapienti in suis calamitatibus accidit, omnem for-  
tunæ iram quodammodo reverberavit, & ante se  
fregit, eandem semper faciem servavit, placidam,  
& inconcussam. Quod in non modicam Vladislai  
laudem. Ille enim qui se letis rebus non inflavit, nec  
mutatis contrahit, adversus utrumque statum in-  
etum animum tenet, explorata jam firmitatis. Ad-  
eoque hæc illi, in infelicitate quodammodo, feli-  
citas contigit, ut nosset simul & vinceret, rerum

quatuor-  
decim  
annorum  
inducia.  
eodem  
Anno  
1617.

Moscorum  
rebellio  
in gloria  
Vladislai.

Sen. Con-  
sol. ad  
Hel:



naturę alteram partem. Tum etiam ut gentem inimicam, & perfidam, cum suo Tyranno, maiori Vladislai glorię & ultioni reservarent. Nec enim triumpho, ab omnibus propemodum sæculis inaudito, famosissimus Regum postea evasisset nisi inimica gens materiam, in suam ipsius ruinam, perfidia subministrasset.

Refurgat ergo paulatim, sub Michaële suo, Moscovia; si resurgere est, ad præcipitium elevari. Refurgat, inquam, & elevetur; sed *ut lapsu*, quod Claudianus, *graviores ruat*. Interim legitimum verumque Magnum Moscovię Ducem Vladislaus agat, Michaël Scenicum & Tyrannum: quo usque eo glorię ascendentem Vladislaum videamus, ut titulum, Majestati ejus minorem, ultro projiciat: adeoque, cum Magno Pompeio, non minoris glorię, facere Magnos Duces, quam vincere, judicet.



CA-

## CAPVT TERTIVM.

## ARGUMENTVM.

Vladislaus IV. vulnerati Patris vitam servat.

## SUMMARIUM.

*A natura inditam Regum reverentiam esse: hac tamen posita, in templo Sicarius Sigismundum Regem vulnerat. Ictum ad verticem directum Opalinskius virga excipit. Vladislaus, in Patrem pius, subvenit, è periculo liberat, & Sicarium persequitur. Rex non, nisi absoluto Sacerdote, à templo discedit. Ambiguus de illo rumor, sed ubi populo se vivere ostendit, pietas Vladislai passim collaudata. Hac carmine ab Authore concepta. Sigismundi Regis clementia, Sicarii supplicium.*

Quemadmodum natura commenta est Regem; ita mortalium animis quandam, subiectam Majestati, reverentiam indidit, ut faciem eorum augustam, tacita mentium nostrarum angustia, adoremus. Et recte hoc quidem secundum Apostolum. *Omnis anima Potestatibus sublimioribus subdita sit, non est enim Potestas nisi à Deo.* Quis ergo naturę refragetur & legi? Non nisi, in hoc casu, qui naturam ipsam, & divinę legis reverentiam quo-

Reverentia erga Reges à natura.

quoque posuerit. Quamobrem tam arctam humani generis, cum fastigio regali, concordiam, consensus mortaliū voluit, ut lesæ Majestatis damnaret, qui verbo, ne dicam ferro, violaverit. Hoc tam grande, tam immane nefas, ut ut in aliis aliquando gentibus auditum fuerit, in observantissima Regum suorum Sarmatia, ante hanc diem nunquam. Et nescio quomodo tandem tam impius, in fidelissima gente, unus inventus fuerit, qui sacrosantam, hac ex parte, Poloniam, Regis parricidio primus deformare conaretur. Nos hoc nobilitati Sarmaticæ, & familiæ, dabimus, ut nomen Sicarii (nec enim nominare fas est) supprimamus: ut hac saltem ratione, quasi in Polonia, nunquam fuisse videatur. Res est.

Sigismundus III. Varsaviæ ad sacrum vadit.

Piissimus Sigismundus Rex, ut erat Catholicæ religioni addictissimus, ita ipsi laudabili more inveteratum, Sacrificio Missæ prius Deoq; vacare, quam ulli negotio Regni, se applicaret. Itaque cum Varsaviæ ad templum procederet, Sicarius: Sed quis ille? si familiam spectes, nobilis: si mores, mortaliū perditissimus. Saltem unus ex illis, de quibus recte Cordubensium decus, qui multa Principibus debent, sed multa & imputant: quibus nunquam tam plene occurrere ulla liberalitas potest, ut cupiditates illorum, quæ crescunt, dum implentur, exsa-

exsa-

exsatiatur. Satis enim constat hunc pessimum Parricidam, licet mente captum, maximis, à munificentissimo Rege, beneficiis affectum fuisse, & cui singularia, præterquam, quæ nobilibus aliis in communi præstantur, contigerant. Sed memoria minimum tribuit, quisquis spei plurimum. Lethæum fluvium biberat, & beneficiorum oblitus, in pravum omnia verterat. Vere Seneca. *Quemadmodum stomachus morbo viatiatus, & colligens bilem, quoscunque accepit cibos, mutat, & omne alimentum, in causam doloris, trahit: ita animus cæcus, quicquid illi commiseris, id onus suum, & perniciem, & occasionem miserie facit.* Talis, inquam, hic nefarius, benevolentiam & pietatem Regis, in occasionem sui maleficii vertens, foribus additus, asperatum saxo malleum, rostrato mucrone, in caput (horreo dicere) prætereuntis Regis attollit; opportuno tunc flagitio, cum Vladislaum Principem, Primoresq; sequentium, occupatos & sustinentes à tergo turbam, ipse etiam, porta paulum ad limen adducta, moraretur. Sed ictum, fallente manu, levi tantum generis vulnere, bis in humerum manubrio illisit. Tertium jam ad verticem directum, obversus Lucas Opalinskius, Marschalcus Curie, virgaretinuit, infregitque. Plures parabat, cum ad nuntium rei Princeps Vladislaus accurrit:

Lib. 1. de Ben.

Sicarius Regem vulnerat. An. 1620

G

quem



*Vladislaus Sigismundum patrem servat.* quem ut Sicarius vidit, metu nefarium subeunte pectus, relicto vulnerato Rege, fugit. Sed vindicandi Patris (cui, opportuno adventu suo, salutem, dubio procul, attulerat) piissimo studio ardens, fugientis, acinace Turcico, terga sequebatur, et, inflicto percussori vulnere, in frustra contidisset, nisi alii, non commiseratione scelesti, sed quo suspecti latius sceleris indicio reus servaretur, indignantem, & precibus, & amicabili complexu cohibuissent.

*Detestatio scelesti.* Subeunt animum, immani istius flagitii occasione, verissima, efficacissima, & prorsus quasi innuentia tam grande nefas, Romani Philosophi de verba. *Lib. 7 de ben.* Ecce nescio quæ non ex Philosophorum domo clam, sed ex medio conventu, populos gentesque damnatura vox mittitur:

*Non hospes ab hospite tutus.*

*Non socer à genero, fratrum quoque grātia rara est.*

*Imminet exātio viri conjugis, illa mariti.*

*Hoc jam amplius est.* Beneficia in scelus versa sunt: & sanguini eorum non parcitur, pro quibus sanguis fundendus est. A subdito in Regem, pro dolor! vidimus: tam herculè innocentem, ut si ingratum excipias, in cujusque subditorum suorum sinu tuto potuisse dormire videretur.

Jacebat interim ille humi (quippe interea, dum

dum Vladislaus Princeps Sicarium persequeretur, per leve lubricumque pavementum, gravi lapsu conciderat) & herentibus cunctis, cum auxilium, periculi cujusque, aut suspicionis, tardaret metus, læsa aliquamdiu Majestas attonitis spectaculo fuit. Tandem primus Johannes Kalinowski, adjuvante per manus Bonaventura Rogaschio, acceptum medium terræ adlevat. Accurrit & Johannes Zebrzydovius Ensifer Regni, simulque voce, manu, stricto gladio, detestatur scelus. Hæc autem pietas, etiam in hac miserabili facie rerum, Regis erat, ut non, nisi peracto Sacrificio, educi templo voluerit.

At jam ambiguus, sine authore, rumor, Urbem pervaserat: & aliquod grande nefas admissum quilibet sciebat, quale esset nesciebat: cum sibi quisque pro fantasia, quod non acciderat, scelus fingeret, & diversa invicem suspicarentur. Inde in publicis viis, incerta quærentium pariter & respondentium, sermones varij, Donec tandem constanti fama innotuit, esse Sarmatiæ Regem à Sarmata vulneratum. Qui, o, tum concursus! quis tumultus! Res, inaudita hætenus, prodigio similis visa est. Et, ut est gens suo affectissima Principi, ploratu omnia miscuit, cum quasi mortuum fletet, quem vivere non compe-

risset. Et quamvis ab aulicis, esse absque periculo Regem, & in melius valetudinem ire, spargeretur; tumultus tamen sedari non potuit, nisi oculis omnium probaretur. Quid itaque? Rex ipse Sigismundus, ut incredulam æque ac piam plebem absolveret, absterfo sanguine, in publicum prodiit, & aspectu mutuo, plebi, incolumitatem propriam demonstravit. Tunc, decretis per templa donis, actæ Deo publicæ, crebris orationibus, gratiæ: genus armorum, quo necem Regis parricida tentaverat, edicto publico, vetitum & abrogatum. Præmium sublevanti à Regina torques aureus, & triginta sestertium millia: à Senatu autem, bona percussoris, dono data.

*Vladislai  
pietas  
laudata.*

Vladislai interim Principem, tanquam defensorem Regis, Servatorem Patris, & publicæ pietatis exemplar, quilibet intuebatur. Et jam non adeo de vulnere Regis, quam affectu adolescentis, sermo erat: & maximum aliquando futurum, qui jam & à puero magnus omnibus erat, & Magnus Moscoviæ titulo, & maximam pietatem ostenderat, omnes ominabantur. Nec sine exemplo omen erat: quia & olim Scipio, prætextatus admodum puer, adversus Annibalis ferrum, Patrem Scipionem defenderat, & postmodum maximus, & Africanus, & Patre major evalebat.

Pro-

Profecto Sarmatia illi Sigismundum Regem, Sigismundus debebat filio vitam: non sine imminentium Paterno Sceptro filiorum dedecore: Nuper sic eecini.

*Nero quisquis erit, vel quisquis Domitianus  
More fuit servo: quem diri pectoris atrox  
Propositum cruciat, cognati sanguinis urnas  
Fundere purpureas: adeo positos pudore,  
Imperij causa, pravaque cupidine Regni  
Cedibus immitem tetrīs juvat esse Tyrannum.  
Hic (immane nefas!) natura legibus ipsis  
Ruptis, nec fratri parcat, nec utroque parenti.  
Serviet ut regnet: fluat undæ sanguis ad instar,  
Viscera scindantur matris: Pater ipse veneno  
Evomat infelicem animam: dum Sceptra Tyranni  
Auspicio infelix diris, scelerata capeffat.  
Osmanidæ faciunt: præcedunt funera fasces  
Impia sacrilegos: Immani barbarus ausu,  
Sanguinis oblitus genitricis, per mare rubrum  
(Impulsu flatu præpostero ab ambitionis)  
Navigat ad Portum Regni, Procul este maligni  
Phalarides, Scythiciq; procul discedite mores.  
Scipio Sarmaticis exortus nuper in oris,  
Prætextatus adhuc, rhomphæa jam Genitorem  
Protegit, Annibalis diro mucrone petitem:  
Gratus in exemplum. Felicem dicite gentes,*

G 3

*Quem*



*Quem non regnandi studium, de tramite legis  
Naturæ pepulit: quique expectare Parentis,  
Et fatum, & Sceptrum potuit, non precipitare,  
At Vladislauum miraculum dicite gentes:  
Ne regnet, iuvat esse pium, seruare Parentem.*

*Cæterum ut mirabitur virtutem illius sera posteritas; ita parricidæ scelus, execrabitur toties, quoties occurrer. Præsertim cum & ingratitudinem hujus, & raram Sigismundi clementiam considerabit: tum quoque in Sicarium se exerentem, cum omnes supplicium meditarentur. Seneca de apibus, inquit. Rex ipse sine aculeo est. Noluit illum Natura, nec seruum esse, nec ultionem magno constaturam petere: telumque detraxit, & iram ejus in eum reliquit. Exemplar hoc magnis Regibus ingens. Est enim illi mos, exercere se in paravis, & ingentium rerum documenta minima agere. Imitari Clementissimus Sigismundus voluit, & more optimorum Parentum, qui maledictis infantium suorum arrident, beneficia etiam in percussorem suum congerere. Itaque nec acerbum quicquam, nec indignum locutus, Parricidam in animo suo absolebat, & velut innocentia donans, pro percussore, suas apud Senatores preces interposuit. Sed aliter, ad justitiæ normam, visum Primoribus. Et quamvis nefarium palam mente captum constat,*

*Clemen-  
tia Sigis-  
mundi.*

*Lib. 7. de  
Clem.*

constaret, hoc tamen veniam illi & misericordiam omnem exemit. Quid ergo? Quæstioni subiectus, nec tortura, nec igne, nec ullis pænarum experimentis, conscius tanti sceleris aliquem nominavit. Magnum profecto innocentia Sarmaticæ experimentum, quod percussorem ejusmodi, ante hanc diem, neminem suorum habuerit: unicum hodie solum: nec hunc fortassis, nisi insanum. Quamvis tamen & sic ille, in læsa <sup>De nefario sup-  
plicium</sup> Majestate Regis nimius. Ergo judicio publico damnatus, exemplo omnibus & spectaculo destinatur. Et primo quidem arreptum lictores, in obviis viarum capitibus, noxias facinerosi carnes, candenti ferro lacerant, & deductum extra Urbem, in fastigiato, erecto ad hoc ipsum, Theatro, aptatam, malleo rostrato, dexteram, flammis adurunt, nudisque jam fluentem ossibus, cum lēva amputant. Inde, ad motis quadrigis, distentum alligant, & in diversum concitatis equis, in partes quatuor convulsere: quibus ad extrema combustis, cineres in aërem dispersi. Faxit Deus, ex illis nunquam ejusmodi Sarmaticæ Phœnix, in posterum, enascatur.

*Partis Primæ, Libri Primi Finis.*

GE-

## G E S T O R U M

## VLADISLAI IV.

## PARTIS PRIMÆ

## LIBER SECUNDUS.

## A R G U M E N T U M.

Vladislaus Osmanum Turcarum Imperatorem vincit.

## S U M M A R I U M.

**T**urcæ qui: discordia Christianorum proficiunt: Origo belli Valachici. Gratianus unde, & quis. Gratianus Valachia Princeps: ad Polonos deficit. Zolkevius in Valachiam movet: fortissime sæpius cum Turcis pugnat. Gratiani interitus. Zolkevius inter continua prælia Poloniam versus movet, & tandem, ob suorum dissidia, cum quinq; millibus occiditur. Prodigia in Polonia & metus. Sigismundi Regis circabellum sollicitudo. Hotkevicius Zolkevis successorem facit. Hotkevicius Lubomirscio in Valachia se conjungit. Osmanus Achomati succedit: adulato-ribus aurem præbet: cum septingentis millibus in Valachiam movet. Trecentorum Cosacorum fortitudo. Cosaci se Polonis jungunt. Vladislaus Princeps in templo Warsaviæ vexillum in Turcas accipit. Omnia victo-

victo-

victoriæ. Warsavia ad Tyrān proficiscitur: Exercitui de victualibus providet. Hotkevicio se jungit, ejus, in varijs oppugnationibus, virtus. Magna & horribilia prælia. Cosacorum in castra Turcica irruptiones. Hotkevicius, licet æger, ad prælium è lecto surgit, pugnat, & vincit. Karacassius Bassa in castra Turcica venit. Terribilis Polonicorum castrorum oppugnatio: Karacassius cum quatuordecim millibus interficitur. Hotkevicius moritur, cujus munda Lubomirscius obit. Generalis & ultima Polonicorum Castrorum oppugnatio. Vladislai virtus. Osmanus desperabundus à Vladislao Pacem petit. ignominiosam ipsi, gloriosam Polonis impetrat. Turcæ priores discedunt. Vladislaus cum magna gloria in Poloniam redit: Osmanus autem Constantinopoli interficitur.

**T**urcarum ignobilis Scythica gens est, & vel ab antiquo ad Caucasum Montem, à vicinis contempta, ab Europæis, admodum curiosis, vix solo nomine cognita. Et profecto omni compositione corporis ad servitium natis, nescio quo fato acciderit, imperare. Latis quippe Schapulibus ad sarcinas ferendas accomoda, pusilanimitate ad bellum inhabilis, prorsus mancipium à natura refert. Et quo uno nomine formidabilis est, abnegantium. Christi fidem, gentium robore habet. Quamvis

H

ne sic

Qui. &  
unde Tur-  
ca.



Discor-  
dia Prin-  
cipum  
Christia-  
norū pro-  
ficiunt.

Salust.  
bello Iu-  
gur:

Digressio  
ad bellum  
Valachi-  
cum.

ne sic quidem aliquando futura victrix, nisi discor-  
dia Principum Christianorum, integra prius Im-  
peria, quam ipsorum ferocia dissolvisset. Pronum  
erat nuda Provinciarum latera, mutuis sauciata  
dissidiis, ad casum, vel levi concussa motu, tandem  
perducere. Ita Armenia, Mesopotamia, Syria, Pa-  
læstina, Asia minor, sive Natolia, Trepezuntium,  
Græcia, & Ægyptus, cervices submisere. Adeo  
ut verissimum sit, quod filiis suis Micipsa: *Concor-  
diæ res parvas crescere, discordia res maximas labi.*  
Cæterum qui populi dentes, quod dicitur, osten-  
dere, vel morsu levi laceratam, abegerunt. Ca-  
striotus & Huniades, copiis non adeo numerosis,  
sexaginta sæpius, octoginta, centum, immo & tre-  
centa millia cecidere. Ad unam Hungariam, quod  
mirere, jam à sæculis fere tumultuatur. Cessit ta-  
men, post Schander-Begum Epirus, & Hungaria  
mutilata, ex parte Turcica est. Una, contermina  
gentium, & infesta Barbaris, Polonia inviolata  
persistit: non quia impugnata non fuit; sed quia  
concors, fortis, & felix. Maximum vero, quod ha-  
buit unquam, discrimen, à levibus Valachis ha-  
buit. Et discrimen capit cum dissidium. Verum-  
enim vero, ut rem penitus inspiciamus, occasio-  
nem belli, Valachiam, breviter perlustremus.

Vala-

Valachia duplex est. Qua Tyram & Poloniam <sup>Valachia</sup>  
respicit, à modico, quo irrigatur, Moldava fluvio, <sup>descrip-</sup>  
Moldavia nominatur. Qua, ab Oriente, ultra mon-  
tes est, Valachia nomen retinet: quamvis subinde  
& Transalpina vocetur. Cæterum hæc tota Regio,  
libera primum, inde plurimorum dominio va-  
cillare, ad extremum labi capit. Defuncto Ste-  
phano, primo, post Bazaradum, Principi, duo, <sup>Ejusdissi-  
dia, &  
Polonia  
vectigalis</sup>  
Stephanus & Petrus, filii fuere. Stephano ius Pri-  
mogenituræ, Petro, turbido adolescenti, vulgifa-  
vor, Imperium promittebat. At, quod in ejusmo-  
di casu fieri assolet, tumultuario plebis motu, Pe-  
trus prævaluit. Stephanus, vectigalem Casimiro  
Magno Valachiam promittens, hujus opera, ad  
fastigium paternum evasit. Cæterum Petrus, ma-  
xime post Casimiri mortem, promiori ad pacem  
Stephano infestus, tumultu sæpius omnia popula-  
ri miscuit, & occasionem Turcis, Bulgariam, Ser-  
viam, & quicquid à tergo, occupandi præbuit.  
Exterriti iterum, vicino periculo, Valachi, in Po-  
lonorum rursus clientelam concessere. Sed Post-  
liminio, ad veteres, de successione, turbas revo-  
luti, altera Provincia parte, Valachia proprie di-  
cta, à Turcis mutilati fuerunt. Et Moldavia sola  
restitit Polonorum ope. Postquam vero Maho-  
meti secundo Constantinopolis, & quicquid super-  
erat

H 2

*Hinc ve-  
tus inter  
Turcas &  
Polonos,  
de Vala-  
chia,  
quaestio.*

erat Græciæ, cessit: tunc demum & ipsa ad Turcas  
conversa est. Hinc vetus, Sauromatas inter & Tur-  
cas, de Valachia, quaestio: illis legitimi Domini  
jure repetentibus: his ferro partam, ferro defen-  
dentibus: & ad maiorem securitatem, pro suo  
arbitrio Principes, attamen Christianos, præfici-  
entibus. Poloni, etsi armis jus suum prosequi fa-  
cile sapius potuissent, tamen, & ob expertam sa-  
pius Valachorum perfidiam, & quia omnia prius,  
quam arma tentanda ducerent, cautius & lentius  
proceedebant: donec tandem Gratianus, ad extre-  
mum & ipse perfidus, ostentata occasione, recipi-  
endæ ex voto Valachia pruriginem affricuisset.

*Gratia-  
nus Polo-  
nis spem  
recipien-  
da Vala-  
chia fa-  
cit.*

Erat Gaspar Gratianus Græcii in Styria na-  
tus, mediocris ingenii vir, ad opes tamen & divi-  
tias parandas proniore. Has quia assequi, in Pa-  
trio Solo, non adeo erat proclive, cum grandiore  
natu fratre, ejusdem ingenii viro, domesticam pau-  
pertate pressus, Constantinopolim migravit. Cæ-  
terum cœmentarum gemmarum, & alibi distra-  
hendarum studio tenebantur. Quod ut felicius  
paulatim successit, lucro compendioso illecti,  
Constantinopoli sede locata, per Christiana pari-  
ter, & Mahometana Regna, ut spes lucris, animo  
concepta, impulerat, vagabantur. Ita Gratianus  
in Italiam quoque delatus, venundatis, Magnò

Hetru-

Hetruriæ Duci, mercibus, ex occasione callidus,  
ad aliud animum vertit, ex quo, præter Lenoci-  
nium lucris, gratiæ quoque publicæ plurimum, à  
Turcarum præcipuis, aucuparetur. Videbat Libur-  
ni non ignobiles domi Turcas, ad triremes, ut  
mancipia contempta, damnatos, intollerabili la-  
bore vexari. Horum ad octoginta præcipuos, ut  
plurimum Constantinopoli ortos, stipulata pecu-  
niæ summas, redemptos, ad propria revehit. Ob-  
stupuit Constantinopolis Christiani factum, &  
quod avaritia erat, misericordiam interpretaba-  
tur. Igitur ad insolentiam rei commota Urbe,  
quasi momento portus & littora complebantur.  
Et dum inter mutuas natorum & consanguineo-  
rum congratulationes tumultuatur, rumor ad A-  
chomatem Cæsarem deferabatur: qui, accersitum  
Gratianum, cum fidum sibi putaret virum, Du-  
catu Naxiæ & Bissacensi donavit. Inde, imperata  
ad Matthiam Christianorum Imperatorem, lega-  
tione, quia ex voto perfecerat, redeuntem Vala-  
chia auxit. At Gratianus originis suæ memor,  
ut tacito præsentem fortunam sensu mirabatur &  
adorabat, ita inconstantiam ejus & ludibria ve-  
rebat & metuebat. Et poterat hoc meritissimo  
jure, ut qui infestos Turcarum, & breves in Chri-  
stianum favores, & infida, levia, & novos subin-

*Ejus cal-  
iditas.*

*Valachia  
Princeps  
constitu-  
itur.*



*Ad Polono-  
nos defe-  
ctianem  
parat.*

de anhelantia Dominos, Valachorum suorum ingenia nosceret. Quapropter, perinde Turcarum favori, quam fidei Valachorum diffusus, ut alias vires potentię Turcarum opponeret, eodem, quo ante subfuerat, jure, & se, & Valachiam, Polonis subicere statuit. Quod ut eo commodius faceret, de Turcis identidem oblique loquendo, & Polonos veteres elevando Dominos, nobiliores Valachorum & mobiliiores, in partem traxit; & per hos Valachiam prope universam. Prasertim cum veterum Dominorum memoria nondum evulvisset, & æquitatem tributi, Polonis olim pensitare soliti, & Turcarum immodicas exhausiones perpenderent. Quid ergo? Gratiano Valachia aderat, Gratianus Polonis, dummodo recipere-  
*Cause  
quib⁹ Po-  
loni ad  
recipiendū  
Gratianū  
movebā-  
tur.*

tur. Quod ut fieret, alia gravis causa & fere necessitas Polonos urgebat: Sed quæ originem traxerat ex eadem Valachia. Quamvis enim publice, ante Gratianum adhuc, quasi neglecta fuisset, tamen privati nobiles, indignabundi quod non asfereretur publico sumptu, privato repetierant. Et inter alios tam feliciter Dux Corecius Samuel, ut victis, non uno prælio, Turcis, gravi rabie Achomatis Cæsaris animum commoveret. Ad extremum tandem, cum publice defereretur, casus, in manus hostium venit. Cum vero, paulo post, alius,

alius, collectus quoque privatim exercitus, in Valachiam introduceretur, & iniquitate fortunæ, ad Dziezam fluvium circumventus, paludibus, sylvis, insidiisque, clausus, ad internecionem, die tota concideretur; ita animus Mahometanis crevit, ut, quasi Poloniam, in tantillo exercitu, delevissent, ad debellandam, si ita visum Superis, omnino animarentur. Cæterum quia, restincto privatorum bello, causa illis in publicum minus suppetebat, ad antiqua revoluti, Zaporovienfium Cosacorum incursiones obtendebant. Sunt autem Zaporovienfes Cosaci, ad Borysthenem, vagus, infra Kyoviam, populus: qui, postquam, pulsus Tartaris, Tomakowkam, & alias Borysthenis Insulas occupavit, opportunitate prædaque allectus, Ponto Euxino se credidit, & Pyratice ad divitias crevit. Hos compesci, à Polonię Rege, Turcæ volebant. Et interim ipsi Tartaros in fertilia Podolię & Volhyniæ loca immittebant. Itaque utrinque querimonię. Ad extremum, ut controversiæ dirimerentur, à Turca Skinder Bassa, à Polonis exercituum Generalis Stanislaus Zolkevius, Commissarii constituantur. Tum illud insigne Georgii Sbaravii Ducis, qui Barsada Oppidum publicæ paci donavit. Cum enim prolatis Skinder Bassa, Imperatoris sui litteris, quibus, nisi Barsada, cis Axiacen, hoc est,

est, parvum Borysthenem, Oppidum dirueretur, re infecta discedere jubebatur, ostenderet. *Ne*  
*Expotri-* *tio.* *Dij si verint*, Georgius inquit, *ut per me vestra &*  
*Reipublica Pax distineatur. Deferam mox in planum*  
*Bersadam. Patria illie causa & cura vacabit.* Et  
 subiecto, per Piascovium, igne, delevit. Sed pa-  
 tuit per postulata ejusmodi, tentari Sarmaticam  
*Semel &*  
*iterum,*  
*inter Po-*  
*lonos &*  
*Turcas,*  
*frustra*  
*pax ten-*  
*tata.*  
 patientiam potius, quam pacem peti. Quippe jam  
 Turcæ nihilo mitiores, injurias Cosacorum, Po-  
 loni ut persequerentur, instabant: callido dolo-  
 soq; consilio; ut illos, cū Poloni exasperavissent,  
 præmiis & libertate promissa, per defectionem,  
 in eosdem averterent. Sed patuit dolus, et, re in-  
 fecta, ab invicem discessum. Cosaci vero, vulga-  
 ta de suo excidio fama, in Mohometanos atrocio-  
 res, non jam proxima mari littora vastare contem-  
 ti, interiora Turcarum exscindere sunt aggressi:  
 tanta audacia; ut Constantinopolim ipsam sug-  
 gressi, Imperatorem Venationi vacantem, in-  
 tra mœnia trepidum paventemque compellerent.  
 Capi & abduci potuisse, si festinassent, argumen-  
 to est, quod, incendio deletis suburbiis, Thracica  
 præda graves, ad naves & propria impune migra-  
 rint: Tartari cum has clades vindicare velle præ-  
 sumerent, Podoliam & florentissima Russiæ late-  
 ra, urebant, vastabantque: sed tot cladibus fere,  
 quot

quot incursionibus, ad sua rejecti. Itaque cum  
 vetera utrinque redirent. Zolkevii iterum &  
 Skinder-Bassæ conventus. Sed omnia vafrities  
 Turcæ, & mutatio rerum discussit. Quippe jam,  
 pro Achimate Cæsare, Osmanus filius imperabat, *Osmanus.*  
 ferocis ingenii adolescens, & pro ætate incaurus, *Achoma-*  
*resucce-*  
*dens, fe-*  
*rocor in*  
*Polonos.*  
 qui vix vigesimum annum attingeret. Insuper  
 improvidi adolescentis animus, à Legatis rebel-  
 lium Ferdinandi Secundi Imperatoris Romani,  
 propria causa, in Sarmatas accendebatur. Haud  
 perinde formidoloso sibi futuro Germanorum  
 Cæsare, si Poloni per acies distinerentur. Quid  
 ergo? Orsinovium, super firmanda fœdera, Con-  
 stantinopolim, à Sigismundo Rege missum, ab  
 aula Osmanus, à conspectu, ab Urbe repulit; &  
 juseatenus gentium, & legationis Sacra violavit.  
 Hoc in Annum, post Christum natum, 1620 inci-  
 dit, cum spem inter & metum Gratianus tumul-  
 tuaretur.

Cum ergo Polonis Bellum præforibus esset,  
 an in tutelam Valachia cum Gratiano recipi-  
 enda, supervacuum videbatur discutere. *Gratia-*  
*nus à Po-*  
 Conditionibus certis admissus est, & in Pa-  
 trocinium ille libens concessit. At jam Skinder-  
 Bassa, non Commissarius amplius, sed belli Dux,  
 Osmani jussu, militem colligebat. Et tanquam  
 I non



non cum Polonia tantum, sed Valachia quoque bellum gesturus, extra suspectæ Provinciæ limites, attamen in propinquo, delectus habebat. Omnia à vicino anxius speculabatur Gratianus: & jam spe, fiducia, metu, ratione, subinde fluctuans, non uno modo distrahebatur. Aliquando, alio translatis opibus, circumspicere fugam; aliquando, conscripto exercitu, & Polonis juncto, Mahometanis cuspidem ferrumque obvertere: quandoq; etiam, cum nondum omnem veniæ spem, apud Osmanum, præcisam crederet, ad obedientiam ipsius, proditis Polonis, redire meditabatur. Præsertim cum Turcas (quos honoris quodammodo gratia, sed revera ut secretiora ejus rimarentur consilia, circa se habebat) nondum, ulla contumelia affectos, abegisset.

*Skinder  
Bassa in  
Valachiâ  
mover.*

Dum hæret, dum incipit, dum desistit, dum mutat, dum affectus varij, tractum in diversa animum, lancinant, jam, accito Dialet Gereogalga, Chami Reguli Scytharum fratre, & Kantimiro, cum numerosis Tartarorum copiis, ingenti exercitu Skinder Bassa appropinquabat. Tum vero Gratianus, vicino incendio magis sollicitus, cum metuere, quibus consilia jam ejus patebant, Turcas nimium quantum inciperet, necessario (nisi quidem perire omnino vellet) Polonos

lonos respexit. Et hi quidem jam septem millia congregati, Stanislaum Zolkevium, Generalem exercituum Ducem, & Cancellarium Regni, non conditionibus, ut ante, cum Skinder Bassa, sed armis discéptaturum; quoquo duceret, sequebantur. Cæterum apud Sarmatas dubium erat, an in limitibus Regni hostem opperirentur, an superato Tyra, in Valachiam & aliena transirent. Sed cum Gratianus, viginti millium stipulato exercitu, insuper Turcicas extenuando copias, quæ centum millium erant, paucorum millium faceret, prior Sententia sedit, & posterior locum, cum applausu omnium, habuit.

Itaq; Zolkevius, cum prius se, cum Johanne <sup>Et Zol-</sup> filio Rubiescovienfi Capitano, Sigismundo Re- <sup>kevius in</sup> gi, si ita visum Superis, & Sarmatiæ piamen- <sup>Valachiâ</sup> tū ob- <sup>mover.</sup> tulisset, Tyram copias, in signi militum alacritate, traducit. Illico Valachiam universam, prona in majus semper & mendacium fama, perambulavit, Polonos jam terra potiri, & numerofo exercitu, armorum quodam diluvio, Moldaviam inundavisse. Fecit, verbo suo, Gratianus callide, famæ & mendacio fidem. Et præcipites, in temeraria arma, Valachi, Turcas, qui circa Gratianum adhuc, opprimentes, subito trucidavere. Verum enim-vero non detestabilis omnino audacia Va-

*Lactio in Valachiâ*

lachorum fuisset, si idem ad perseverandum, qui ad incipiendum, animus hæssisset. Sed mox, paucitate Polonorum cognita, pænitentia ducti, cum ipso Gratiano suo, fluctuavere. Nam & ipsi paulatim Polonos deferere, & hic, Chocimum, conterminam Russiæ arcem, flectens, quomodo, per Pokuce, in Germaniam fugeret, circumspicere cæpit. Sed præoccupavit Zolkeuius ea consilia, & vana, inter inutiles moras, respondentem, severioribus litteris ad castra vocavit. Quibus territus ille, certo si abnuisset, exitio, paruit, & paucis suorum comitatus, ad Polonos accedens, mutua invicem simulatione lætitiæ, fraudulatum est. Zolkeuius autem circumspectus Imperator, de rei summa sollicitus, sincerum, Skinder Bassæ exercitus numerum, expiscari statuit: efficaci ad hoc, sed frustraneo, tum quidem, Stratagemate usus. Cum enim Gratianus Sobrius calliditati minus pateret, convivio primoribus Valachorum exceptis, propinari vinum largius imperavit, ratus, quod fieri assolet, post solum curis animum, sequuturam mox intemperantiam linguæ. Sed hac parte Gratianus impenetrabilis fuit: utpote qui exercito, per mercaturas, ingenio, inter cetera Mercurii sacra, tacere didicerat. Onus ergo Castrorum Gratianus porro, nullum præsidium erat.

Gratia-  
n in Ca-  
stra venit

Tan-

Tandem, ad Cetforam, vetera Johannis Zolkevi-  
moscii Castra, Zolkeuius, cum suis, ingressus est, <sup>us, ad Ce-  
rforam,  
castra  
munir.</sup> & Odrzyvulsio exploratum misso, Vallum & Fossas interim, dirutas partim, & vetustate collap-  
sas, reparari iussit. Quod à militibus, Gratiani fallacia, procul abesse simulantem hostem, traductis, ea ignavia factum est, ut etiam, quod intempestivis fatigarentur operibus, cum murmure, palam indignarentur. Sed Odrzyvolscius trepidus, insequente hoste, in Castra reversus, non inertiam modo discussit, sed, ad opus perficiendum, mutuam exhortationem induxit. Nec hostis tunc quidem certamen ausus, nocturna meditatione Belli, ad futurum prælium, militem acuebat.

Ut primum autem, discussa caligine noctis, <sup>Prima  
Polonorum  
victoria  
An. 1620  
16. Sept.</sup> Phœbus lucem Europæ gentibus attulit, priores Turcæ, & Tartari, vix dimidia tamen sui parte, quadraginta millia congregati, in aciem cogerantur. Nec detrectavere Poloni certamen. Quin immo tanta ferocia hostem aggressi sunt, ut latera frontemque resolventes, alio submoverent. Tum vero illud Hermanni Dönhoffi, strenui bello viri, egregium: qui, cum leves Sarmatarum alia parte, ad Hierassum olim, nunc Prutum fluvium, cohortes, à densis Tartarorum catervis premi videret, assumptis aliquot equitum tur-

13

mis,



mis, impetu tam opportuno subvenit, ut & rep-  
neret hosti, eodem momento, periculum, & veli-  
tes, vacillantes antea, ad ultionem accenderet;  
adeoque, eadem vehementia, Tartari, verteren-  
tur in fugam, quâ, ad victoriam, venerant. Et jam  
exitium hostibus imminebat, nisi pernicipibus e-  
quis fecissent, ut deessent, qui caderentur. Cre-  
vit hoc successu Polonis animus, & imperfecta,  
victoria quodammodo irritati, ut absolverent,  
iusti praelii aleam à Chiliatchis suis, & Zolkevio,  
flagitabant: tam importune, quasi in crastinum  
raptaturi praelium, nisi ducerentur. Et jam Zol-  
kevius cum Tribunis, an committendum præ-  
lium, deliberabat, cum errabundus Tartarus, à  
vigilibus interceptus, centum millia hostium,  
adesse primus dixit, & affirmavit. Ea res non mo-  
dice, cum Ducibus aliis, Zolkevium ipsum tur-  
bavit, & in maturiorem, futuri praelii, aleam, de-  
liberationem traxit. Sed inhærebat proposito  
miles, qui nullatenus tantam multitudinem ho-  
stium credebat, quia non viderat, & si fuisset,  
quæ fugientem ejus diei aciem non restaurasset?  
Animum præterea faciebat, Zolkevij virtus, et,  
raro quodam Cælestium munere, nunquam in-  
terrupta hucusque felicitas: nec inassueti vel in

M. 100.

Moscovia nuper, parva suorum manu, ingentes  
copias debellare. Zolkevius autem nihil de for-  
tuna præsumere, & omnium circumstantiarum  
momenta considerare. Tandem, cum procul à  
domo, seu differret pugnam, seu anticiparet, sub-  
sidium nullum speraret, & annonæ caritas, incas-  
sum moras trahentibus, immineret, ardore & fe-  
rocia militum uti statuit: præsertim cum pri-  
mis ausis, aut metum hosti, aut fiduciam gigni,  
non ignoraret. Militibus igitur, ad corpora ex-  
tanda, dimissis, de sanguine hostium, & victoria  
cogitare jussit.

Postera die, simul ac illuxit, inclusa duobus *Secunda*  
carraginibus acies, ad hostem processit. Tum *Polonorum*  
vero & Turcæ & Tartari, in acies conglobati, quo *victoria,*  
uno pugnandi genere valent, in Polonos impetu *sed diffi-*  
incurrere. Sed, Theophilo Sembergio, tormen- *ciliis, &*  
torum fulmine, hostem percellente, pari, à Sar- *cruenta*  
matis, violentia, sunt reiecti: tanto Tartarorum *17. Sept.*  
damno, ut difficilior ipsis, per cadavera suorum  
transitus, quam per exercitum esset. Inde, in a-  
perto campo, pugna. Sed, multitudine abundan-  
te Turca, maiori Polonorum periculo, cum, in-  
ter Primores, Zolkevij duo, inclinantes restituen-  
tes acies, telis frequentibus obruti, equis, vindictam  
spirantes, defluerent. Samuel Korecius, autem  
non

non ita pridem, Constantinopoli, captivitate elapsus, ultricia, in Turcarum cuneos, arma circumtulit, & inimicis suis immerfus, qui confereret secum, singulari certamine, manum, acie tota quaesivit, & cum fremitu, nullum invenit. Konec-polscius, primus, post Zolkevium, Dux & Collega, ubi Vexilliferum circumventum, à globo hostium, vidit, præcipiti inter hostium tela cursu fertur, & duobus, manu propria, trucidatis, Signiferum aquilamque Polonam servavit. Inde prælium anceps, varium: cum, dissoluta carraginum una, periculum ad Polonos rediret. Mox obfirmatos utriusque partis, in mutuam lanienam, milites, tenebræ diviserunt. Non infelix Polonis prælium videri poterat, cum Turcarum tria millia quingenti, Sarmatarum non nisi quinquaginta trecenti cecidissent: nisi, in tantillo numero, caesorum etiam paucitas aestimaretur.

*Panicus  
timor in  
castris Po-  
lonum.*

Inde Sarmatarum castra panicus timor invasit: cum nox, pervigilium, tenebræ, diurni prælii difficultatem, in metum curamque intenderent. Augebat Tartarorum, inassuetæ pertinaciæ, pugna, qualem antea nunquam expertos se meminissent. Insuper tot hostium millia, formidabili, quam antea, numero, mentem complebant. Facilem illis suorum jacturam esse, cum Hydræ illi,

illi, totidem quasi, quot refecarentur, capita, in prælium renascerentur. Illos à tam paucis conterri impossibile videri, se, si adversum quid contingeret, quasi unico ictu, refecari posse. Hæc omnia obscuritas & caligo noctis, nova novaque semper imagine, in majus porro fovebat. Quæ deinde illucescens dies, quasi in exitium imminens, alternabat. Ingessit opportunum tandem, Gratianus, flagitiosæ & erroneæ menti, scelus: Quippe ille, cum, præsentium rerum diffidentia, vereretur, ne traditus Skinder Bassæ, controversiam belli, supplicio suo componeret, medium se trepidantibus intulit, & aggregando pericula, ut suum evaderet, fugam suasit. Patere recto per Pokuce, aut per Transylvaniam, obliquo itinere, ad Penates, reditum, se, si sequerentur, Ducem fore. Alliciebantur his, faciles per metum, animi: & nihil, ad cætera, deerat, quam opportuna flagitio nox. Quæ ubi paulatim obscuritate pudorem obduxit, Gratianum timidissimi quique: hos, velut amentię quodam contagio, constantiores, ad Hierassum, seu Prutum fluvium, sequebantur. Et jam clamantium & tumultuantium murmur, ad Ducem, & Zolkevij aures ferebatur: qui, quid ageretur, ignari, vocantium invicem & abeuntium, strepitum sequebantur. Deinde, re cognita, cum, ne

*Gratia-  
nus cum  
multis  
Polonis*

K

fuge-



<sup>fugit, & interfici-  
tur.</sup> fugerent, nec persuadere Imperio, nec authorita-  
te, nec precibus valuissent; amnis, sævitia hosti-  
um, & proprium cuiusq; periculum persuasit.  
Interim, qui proximi Gratiano fuere, aut Hierasso  
amne absorpti, aut in adversum littus eluctati, à  
Scythis, & Valachis trucidabantur. Solus Gratia-  
nus exitium, quod evaserat, ad breve tempus, la-  
tebra distulit. Quippe unius Valachi tugurio, spe  
præmij, abditus, mox ejusdem perfidia truida-  
tur. Hoc unum ei, post mortem, indulgente for-  
tuna, ut mors ipsa, in Proditore vindicaretur. Cum  
enim Valachus interfecti Principis caput, Alexan-  
dro, qui Osmani jussu jam Gratiano successerat,  
deferret, non præmio eum, non favore dignatus,  
simili in Proditorem ultione pensavit.

<sup>Zolkevi  
prudētia.</sup> Nulli dubium erat, & expugnari, ea nocte,  
ab hostib' potuisse castra, & copias potuisse deleri.  
Sed tutatus est tunc quidem Deus & fortuna Po-  
lonos: & aliam potius Tartaris Turcisq; mentem,  
quam Sarmatas invadendi, dedit. Cum autem  
turbatio, poenitentia, dolor, & quædam animo-  
rum verecundia invicem & confusio, inhabiles ad  
pugnam copias reddidisset: tum illud callide, à  
Zolkevio Duce, inventum, ut injecta spe quadam  
concordiæ, totos integros octo dies, Skinder Bas-  
sam, tractationum simulatione eluderet, & exer-  
citurum

citurum interim & omnia confirmaret. Postquam  
nihil amplius irreverentiæ militum erga Duces,  
nihil discordiæ invicem, nihil in exercitu confu-  
sionis advertit, Classico milites ad Concionem vo-  
cavit. Tum venerabilis ille canitie rebusque gestis <sup>Milites  
ad reditu  
in Patriā  
adhorta-  
tur.</sup> Senex, ferro per confertos egrediendo hostes, ad  
propria remeare persuasit. Quippe satius esse,  
si secus accideret, vel gloriosum in acie mori, vel,  
si faverent Superi, in Sarmatiæ suæ limitibus, pro  
salute Patriæ suæ excubare: quam in perfidæ Va-  
lachia finibus, & siti, & famæ, & inutili morte con-  
sumi. Inde caput suum, si aut dandus, aut haurien-  
dus sanguis, in omnem fortunæ aleam devovit.  
Verbo, & multum, in senili pectore, non consilij  
modo, sed virtutis etiam virere ostendit: & con-  
stantia, nullique periculo cedente vultu, ad iter &  
alacritatem exercitum universum confirmavit.  
Itaque nihil jam, confirmatis ad omnia, deerat,  
nisi imperare.

Zolkevi<sup>Poloniam  
versus  
mover.</sup>us ergo, præsentī militum alacritate  
ufurus, extra Vallum, Munitionesq; copias uni-  
versas educit, & ad vesperam. 29. Septemb. ordine  
composito iter ingreditur. Tum demum delusos  
se tractationibus hostes sensere, et, tanquam fer-  
ro pudorem vindicaturi, ab omni latere circum-  
fundebantur. Sed, sæda clade rejecti, ad oportu-

76  
 tuniora, inutilem violentiam, distulere. Transe-  
 undus erat, mediâ noctis, Zolkevio fluvi-  
 us: dimidia ergo copiarum parte, Polonica infestare  
 agmina pergebant: dimidia, ad alteram, qua  
 transeundum erat, fluvioli Ripam, præveniebant.  
 Quis non, sic interclusis copiis, debellatum dixis-  
 set? evaserunt. Turbabantur quidem, primo im-  
 petu, fluitantes, labantesq; , Polonorum ordines:  
 mox tamen, totis connixi viribus, cum gloria per-  
 rupere contrarios, & ad alterius quoque diei au-  
 roram, inter infestas subinde, & inopinatas Bar-  
 barorum incurfiones, viam continuaverunt. Tum  
 vero profundam intransibiles vallem, vix spatio  
 consistendi dato, tota Skinder Bassæ manus, in-  
 subjectos, è superioribus jugis, quasi Cœlo missa  
 descendit. Aderant omnia ad terrorem composita,  
 tympanorum pulsus, tubarum clangor, armorum  
 fragor, totiusque exercitus clamor: quæ omnia,  
 in formidinem multiplicabant, pro vario Mon-  
 tium Valliumque situ, percussæ voces. Et jam  
 Barbari, non quasi ullatenus rejiciendi, sed exhor-  
 tationibus mutuis, ad certam, conceptam animo,  
 lanienam, præcipites in Sarmatas ferebantur. Se-  
 cius accidit. Poloni enim, in orbem se colligen-  
 tes, & quotidiano periculo cautiores, è jugis mon-  
 tium Tartaros Turcasque pronos, adeoque impo-  
 tentes

Variis in  
 locis con-  
 structus,  
 ferro vi-  
 am facit

Ejuspe-  
 riculū &  
 victoria.  
 1. Octob.

tentes equorum & sui, hastis, telis, bombardis,  
 omnique armorum genere, certo Barbarorum  
 exitio, excipiebant: sicut nihil temerarijs fuerit,  
 & audacioribus reliquum, nisi perire. Polono-  
 rum autem inconcussa acies, per hostium cæso-  
 rum cadavera, pedetentim progrediebatur, et,  
 ingenti tandem gloria, in tutiora cacumina mon-  
 tium, felix evasit.

Non erat quod feceret amplius Skinder Bassæ  
 sa, cum hoc, quod certissimum videbatur, non  
 successisset. A violentia ergo ad dolum conver-  
 sus, ad Duces, ficta modestia, mittit. Non inter-  
 necnum cum Sarmatia Bellum geri. Satis gloriæ si-  
 bi, si Valachiam recuperatam, suo Domino redderet:  
 promde conditionibus agerent. Satiùs esse stipulata  
 Pace, cum fructu ad propria, quam periculo suo redi-  
 re. Patebant Zolkevio fraudes: Sed quia, à tot  
 laboribus, erat necessaria militi quies, compen-  
 dio duxit, vicissim simulare. Ad speciem ergo  
 Christophoro Drusbicio misso, ipse interim mi-  
 litem, optata refocillatione, ad imminens, quod  
 suspicabatur, prælium animabat. Providentia  
 Ducis saluti fuit. Skinder Bassa enim, detento  
 Christophoro, recentes jugiter copias accerse-  
 bat. Inde, sufficienter confirmatus, in Polonos,  
 prima diei vigilia, ut putabat, improvisus ruit.

Skinder  
 Bassa do-  
 lus fru-  
 straneus.  
 Ex petri-  
 cio.



Sed, spe sua deceptus, pari, ~~qua~~ venerat, violentia retro actus, non nisi pudorem & cladem domum retulit. Nec tamen ideo Zolkevium, ad vesperam rursus moventem, insequi & impugnare destitit. Sed tumultum stativis ejus imminentem, adulta jam die, præoccupans, Sarmatas Sagittis arcebat. Cæterum, per continua prælia, ad audendum etiam aliquid, lixæ & calones erecti, in clivum enitebantur, et, mirum! deturbatis hostibus, obtinuerunt.

Polonorum  
periculū  
& victo-  
riam.

Aderat jam quarta Octobris dies, & novum quidem, ut consueverat, sed prælium longe gravissimum. Poloni enim immensam planitiem, & undecunque infessam hostibus, ingredientibus, in omnia difficilia simul incidebant. Terra erat aquarum egens, et, qui tenui alveo præterfluebat, Reuta fluviolus, à Turcis insidebatur. Pulvis insuper, prætergressæ æstatis ardoribus, solutus, & tenuis, cum à vento & equitibus moveretur, in ora ferebatur. Itaque, quo ad incommoda & circumstantias loci, novæ hic iterum Cannæ. Sed longe Skinder Bassa aberat à felicitate Annibalis, & Zolkevius ab infortunio Pauli. Quamvis enim Turcæ, vento, pulvere, opportunitate, pugnarent. Poloni tamen, cedere nesci, è carriginibus, necessitate, & quodammodo ex desperatione pugnabant. Et

virtu-

virtutis & constantiæ comes fortuna aderat. Hostes enim tam animose repulsi, ut præcipiti cursu se recipientes, obstantes è suis occiderent, ut ignominiosæ fugæ viam facerent. In hoc tam periculoso Certamine, ut mirabile poterat videri evadere; ita miraculo propius erat, vicisse.

Tum demum desperatio hostes invasit, & Polonos, ferrea pectora, inexpugnabiles, insequē-<sup>Turce de victoria desperant.</sup> tis diei silentio, & languido tympanorum tubarumque sonitu profitebantur. Itaque, cum octo dierum itinere, & continuato prope certamine, Skinder Bassa, cum centum suorum millibus, in tam pauca millia, nihil effecisset, & jam ad Tyram non nisi stadia quadraginta restarent, stultum duxit, tanto cum suo dedecore, diutius quodammodo Pædagogum agere. Quare cum Dialet Gereogalga, mœstus, ubi tum erat loci, remansit; solo Kantimiro, modica copiarum parte, postremum carpando agmen, domum euntes, prosequi jussit.

Sed nihil actum tam insigni virtute, tot præliis, tot victoriis, tantoque favore Cœlestium. Quippe tot, ab uno hoste, triumphos, ad extremum Sarmatæ, una fatali discordia & seditione,<sup>Seditio in Polonorum castris.</sup> corruerunt, nec ob ullam aliam causam se ipsos in exitiū præcipitavere, quam quia se evalisse credebant. Ob direptas, in Gratiani fuga, & confusio-

ne ex-

ne exercitus, à lixis quibusdam, militibus sarcinas, in limine patriæ tumultuabantur. Urgebat Zolkeuius, Tribuni, & Centuriones, paucarum horarum iter, dum superassent Tyram, absolverent: tunc iure legitimo, per otium, agi posse. Frustra. Jam enim in rapinam mutuam rixæ adoleverant: nec pessimæ simul ac inuerecundæ rei, quæ posthabita reverentia Ducum, flagitiosè caperat, modus inventus est. Ad extremum, nocte, inter quintam & sextam Octobris, media, nefas! fugiunt, raptores, & cujuscunq; sceleris sibi conscia mens signa deserit: obvia tamen pœna: cum Tartari alios, præda graves, occiderent, alios Tyras in profundum raperet. Insuper Kantimirus, ex transfuga seditionem intelligens, accersitis Skinder-Bassæ, Galgæ, & Valachorum cohortibus, animis viribusque discretos, ab omni parte aggreditur. Et resistebant utcunque, primo impetu, Sarmatæ: ad extremum tamen, tenebris, multitudine hostium, et, quod maximum erat, suam confusione victi, obruebantur. Quæ tum, ô Superi! Zolkevio mens? Quis animus? Pudebat victoriosum tot annorum senem, ultimum hoc abominabile nefas, per seditionem, perditæ rei. Quid ergo? Ne vivus caperetur, se frequentibus hostium telis obiectans, mori voluit; ut hac saltem parte, eate-

à Turcis  
interne-  
tione de-  
lentur,  
nocte, in-  
ter 5. &  
6. Octob.  
media.

nus

nus de hoste triumpharet, quatenus ludibrio eximeretur. Factum est: Hoc ad ultimum glorioso facinore, quod Centurionem, oblato equo, sublevare volentem, abegerit, & frameâ inflicto vulnerare, equum repulerit. Inde, ubi densissimæ hostium manus, contendens, mutilatus dextera, ignorantia demum nocturna, oppressus est. Konecpolscius ejus collega, & fortissimus Chiliarcha Hermannus Dönhoff, integram adhuc victoriam morabantur. Sed mox Tribunus Dönhoff, cum plurimos non ignobiles Turcas propria manu sua confecisset, ab irruentibus, velut in ultionem, unde quaque hostibus, pluribus licet vulneribus & trucidando obvios debilitatus, pugnans tamen, adhuc animansque suos, occisus est. Magnus profecto Heros, qui, in plurimis expeditionibus fortis semper, victoriosus sæpe, ad Cetforam, paulo ante, indubiè Polonum exercitum fortitudine sua servaverat, dignam familiæ suæ, ad arma natæ, mortem, pro Republica tandem subiit. Eo interfecto circa unum Konecpolscium universæ hostium vires. Et ille Zolkevium Dönhoffiumque, ut virtute, ita fortuna vitæque, sequi volebat. Sed ipsorum hostium insigni Stratagemate factum est, ne moreretur. Cum innotesceret enim Ducem esse, quasi ad prædam conversi, neglectum in acie deserunt;

Zolkevi-  
us inter-  
fici-  
tur.

Herman-  
nus Dön-  
hoff cadit

Konec-  
polscius  
capitur.

L

&amp; sub-



& submisso interim gnaro linguæ, qui, simulata fide, ductorem itineris fingeret, in præparatas infidias & captivitatem deduxere.

Hæc est illa, inter paucas, nobilis, Polonorum clades. Hæc Sarmaticæ illæ Thermopylæ, ubi Spartani illi, devota ab ingressu Valachia, fidei, Patriæ, Regique capita, occubuerunt. Cæterum, exortodie, cum ad spolia discurretetur, agnitum inter cætera Zolkevij cadaver, capite mutilatur. Quod ad Skinder-Bassam delatum, aliquamdiu ejus oculos pavit: seu Majestate vultus in longiusculum stuporem raptus: seu vicissitudine felicitatis humanæ in considerationem abreptus: seu etiam, quod, morti proximus, meditatione ejus, occulto ipso naturæ suæ Genio instigante, ultimo hoc edito opere, detineretur. Ut ut sit, pauculas duntaxat Zolkevij septimanas supervixit.

*Zolkevij  
laus.* Et hic est Stanislaus Zolkevij, exitus: Ducis, sua ætate, militaris rei scientia, nulli secundi. Prima, sub famoso illo Johanne Zamoscio, cognato suo, militiæ rudimenta didicerat: tam feliciter, ut, eo defuncto, in Generalem exercituum Ducem, inde in Cancellarium succedere mereretur. Moscovitico postea Bello, parva manu, numerosas fundere copias fuerat, Basilium Szuiscium, cum Johanne & Demetrio fratribus, Sigismundo Regi ad

ad triumphum præparaverat. Domesticeis porro inimicitiis, usque ad ultimam, & fatalem hanc expeditionem, conflictatus, tandem pro Patria, flagitio suorum desertus, invictus cætera, cecidit. Sed recte Seneca. *Laus Imperatori etiam victo, & Ducireddatur, si & prudentia, & industria, & fortitudo, muneribus suis functa est.* *Lib. 7. de Ben.*

Interim Sarmatia male habebat, cum sub ignoto vulnere pessime laboraret. Nihil de suorum exitio sciebat, quamvis jam prudentiores aliquid adversi suspicarentur. Alij infectatum quidem exercitum, sed, victis difficultatibus omnibus, salvum ad sua redire, disseminabant. Alij obsessum à Skinder Bassa exercitum, sed resistere fortiter, subsidij spe: quod ipsis adducere non adeo difficile videretur. Alij, silentio rerum, vel quod ab aliis aliquid jam ipsi acceperant, deletas copias, fidelioribus sibi, aperiebant. Unde mox ingens, ut sit, per Tempia, per Compita, per fora, rumor: quem subita in Russiam, victoriæ suæ licentia, Turcarum & Tartarorum irruptio, tandem confirmabat. Ingens inde, per universam Poloniam, metus, quem Turcæ, immissis per Urbes & Oppida incendiariis, quibuscunq; poterant modis, augebant. Sparsa Cracoviæ, per plateas, in partes dissecta cadavera; ut alibi digi-

*Varij, de exercitu, in Polonia ruines.*

*Metus & prodigia per Poloniam.*

ti, pedes alibi, brachia & nares alibi, nusquam tamen capita reperirentur: perinde ac si Regnum à Turcis, cum Author & occisi ignorarentur, veneficiis & devotionibus peteretur. Ad erant & Naturæ, vel à Deo immissa prodigia. Crebri & frequentes Leopoli, Cameneci, Luceorix, Halicii, horridiores etiam per Valachiam, terræ motus. Rupti ibi aliquot montes tumuliq; sedere: ut, ubi juga fuerant, jam, horrendum! specus, & aquarum scaturigines viserentur. Hæc rumore ipso in immensum aucta, proclives ad credulitatem & inania mentes, novis subinde & pessimis imaginibus variabant. Schismatici, Unitis infesti, ne mortuis quidem parentes, Divina humanaque miscebant: et, inter alia, Josaphatum Konzevicium, Polocensem Archiepiscopum, posito pudore, Vitebscii, summa crudelitatem, trucidarunt; Deo, sanctitatem Viri, miraculis postea prosequente.

*Sigismundus Rex, ne utique desperans, erectus stetit. Et de remediis recte sollicitus, in Publicis Regni Comitibus, Johannem Carolum Hotkevicium, Palatinum Vilnensem, Generalem exercituum, per Lithuaniam, Ducem, Virum Moscoviticis, & magis Livonicis victoriis clarum.*

rum, in Zolkevii Locum, Poloniæ quoq; Generalem nominat: & Stanislaum Lubomirscium, Wisnicensem Comitem, Collegam ei adjungit; Virum fortitudine victoriisque probatum, & vel maximè insigni liberalitate præditum; quippe non immemorem hujus Senecæ. *Nunquam magis nomina facio, quam cum dono.* Supremo Cancellariatu, Zolkevii quoque morte vacantem, Andream Lipscium Luceorientem Episcopum ornat. Decretum insuper adversus Turcas, sexaginta millium exercitu, bellum gerere. Tum per totius Poloniæ Regionem delectus habiti, & inhibiturum, ne quisquam militum, auro argentoque cælatus, quod alias familiare Polonis, in castris compareret.

Dum hæc autem in Sarmatia geruntur, interim in Turcia non feriatur. Summa autem rerum, post Osmanum, in Hali & Skinder Bassis erat. Et Skinder Bassa quidem, difficultatem victoriæ pensans, & minuta prælia multa, in unum magnum, summamque rei contrahens, alienus à Bello, Pacem suaserat. Hali Bassa autem, Præfectus aulæ, inexpertus Belli, uno in Polonos odio formidabilis, per adulationem eos sæpius ad aurem debellabat; adeoque pronum Osmani adolescentis, ad Martem, animum, facile expugnabat.



bat. Præsertim cum Skinder Bassam, inevitabile fatum, ad plures transtulisset. Tunc enim Osmanus ferociæ suæ relictus, post tantillam, de Sarmatia, nuper victoriam, debellandi studio ferebatur. Accendebant jugiter Hali Bassa & adulatores: esse Regnum accessu facile, nullis moribus clausum, insuper præsidio, novissima clade, nudatum. Nihil amplius desiderari, quam numerosissimo illud exercitu quodammodo inundare, & sui juris facere: nemisse præterea, post Skinder Bassæ mortem, ruentem in prælia juvenem, retinente. Vere Sapiens Romanus. *Omnia sane excluderit opulenta felicitas: monstrabo tibi, cuius rei inopia laborent magna fastigia, quid omnia possidentibus desit. Scilicet qui verum dicat, & hominem, inter mentientes, stupentem, ipsaque consuetudine, pro rectis blanda audiendi, ad ignorantiam veri perductum, vindicet à consensu concentusq; falsorum. Non vides quemadmodum illos in præceptis agat extinguita libertas, & fides in obsequium servile submissa, dum nemo ex animi sui Sententia suadet, dissuadetq;, sed adulandi certamen est, & unum amicorum omnium officium, una contentio, quis blandissime fallat? Ignorare vires suas, & dum se tam magnos, quam audiunt, credunt, attraxere super vacua, & in discrimen rerum omnium perventura Bella: utilem & necessaria-*

Lib. 6. de  
Ecn.

*necessariam rupere concordiam: secuti iram, quam nemo revocabat, multorum sanguinem hauserunt, fusuri novissime suum: dum vindicant inexplorata pro certis, flectique non minus existimant turpe, quam vinci, & perpetua credunt, quæ in summum perdu-  
cta maxime nutant.*

Hac adulantium sibi corruptela Osmanus <sup>universis Imperiis suis vires con-</sup> quoq; depravatus, fiducia debellandi, jam quasi in titulis numerabat Sarmatiam, quam nondum attigerat. Ut autem in Provinciæ formam redigeret, tanti tamen æstimavit, ut universum, Vastissimi sui Imperii, corpus commoveret. Itaq; per Asiam, Africam, & Europam, delectus habebantur. Ægyptus, Arabia, Syria, Pontus, Natio-  
lia universa, Græcia, Macedonia, Thracia, arma, militem, apparatus, expediebant. Accersebatur (non, nisi ad præsentiam Turcici Imperatoris, castra sequi suctus) Dziambet Gereus, Magnus Tartarorum Chamus. Et jam (ut fama refert) ad septies centena millia hominum, ad parem Xerxis exercitum, Constantinopoli miles conveniebat. Quicquid toto Imperio virium, quicquid Janizarorum & Mamaluchorum, quicquid alibi roboris erat, comparebat. Aderant ad magnificentiam & terrorem, peregrinæ Belluæ, Elephantes. Camelorum vero & jumentorum innu-

innumerabilis multitudo. Diceret Tamerlanem vel Attilam revixisse, & Orbem debellatum iri. Profecto qui aderant adulescentes, tum vel maxime, ad inauditum antea apparatus, fallacius obstupuere: prorsus eodem modo, quo, de Xerxe, Seneca. *Alius aiebat non laturos nuntium Belli, et, ad primam adventus famam, terga versuros. Alius nihil esse dubij, quin illa mole non vinci solum Sarmatia, sed obrui posset: magis verendum, ne vacuas desertasque Urbes invenerint, & profugis hostibus vastae solitudines relinquerentur, non habituris ubi tantas vires exercere possent. Alius, illi vix rerum naturam sufficere, angusta esse militi castra, explicandis equestribus copiis campestris, vix patere. Coelum satis ad emittenda omni manu tela.* His similibusq; vocibus animatus Osmanus, credulus & incautus adolescens, his portentosis copiis, ut praeciparet Danubium, agglomeratis passibus, Valachiam versus movebat.

Et jam fama adventantis Potentissimi hostis Poloniam pervadebat; cum Vladislaus Princeps, electus Magnus Moscoviae Dux, hunc, suo parem animo, deprecare hostem, & Osmanum hunc, alterum veluti Xerxem, sibi à Patre Sigismundo debellandum permitti, rogare non destitit. *Habet enim hoc in se generosus animus, quod*

conci-

*quod concitatur ad honesta. Neminem excelsi ingenij Virum humilia delectant & sordida: magnarum rerum species ad se vocat & extollit.* Sigismundus Parens, Generosissimi filii precibus, ut flecteretur, adductus est: cum & singularem ejus indolem, virtutem, fortitudinem, perspectam haberet, & felicitati adolescentis quoque à puero multum confideret. Itaque, cum Stanislaus Lubomirscius, promptioribus copiarum assumptis, Tyram praeciparet, & transitum Polonis, ab utraque fluvii parte, munitionibus, si quid hostis moliretur, firmaret: cum Johannes Carolus Hotkevicius, incertum consilio, an quod hostem tanti non aestimaret, alias, Jaroslaviae, nuptias celebraret, ad bella & praelia se praeparavit. Delectus fortissimorum, non plurimorum, militum, ratus multum ab exercitu turbam distare, sedulo procurabat. Quorum cum octo millia in armis haberet, jam non ulterius cunctandum ratus, itineri se accinxit.

Priusquam autem Urbe egrederetur, istius non immemor, à Jove principium, Summum Waraviae Templum, pro felici expeditionis eventu, vota facturum, ingreditur. Tum vero populus tota Urbe concitari: circumstare aras: complere sacra, portas, vestibula, Scamna, &

M

editio-



Intem-  
ple  
Vexillum  
in Turcas  
accepit.

editiora loca, quacun-  
que aspici poterat, cum li-  
tigio, præoccupare: in Vladislaum corpora ora-  
que protendere: & interim, dum pascerentur,  
oculi, fiduciam inter & metum, sollicitudinem  
inter & spem, animo tumultuari. Subibat enim  
Osmani Imperatoris potentia, exercitus Turcici  
ineffabilis multitudo, campus Sarmatarum san-  
guine frequenter imbutus, & sub Stanislao Zol-  
kevio, bellicosissimo Viro, novissima, fortissimo-  
rum militum, clades. In hæc omnia, tam infau-  
sta, tam ardua, tam periculosa, & eventu summe  
dubia, modicis hæc copijs, adolescentem im-  
mitti. In contrarium rursus variabat animos, per-  
specta adolescentis, à puero, indoles, & stupen-  
da virtus: inde militaris rei, supra ætatem, com-  
parata scientia, cui confidere plurimum, ab hæc  
emanantes victoriæ, docuissent. Insuper, divino  
Cœlestium munere, fluentia ex voto omnia, ob-  
latum ultro juveni, quam speratum erat, à Mo-  
scis Imperium: Verbo: nullo unquam infortunio  
bellico corrupta & interrupta felicitas. Inter  
hanc mentium & rationum luctam, Franciscus  
Diottalovius Nuntius Apostolicus, Sacrificium  
Missæ peragebat. Quo propemodum jam finito,  
ad mortuum altari juvenem intruens, omnia illi, à  
Domino exercituum, Deo, felicia, fausta, fortu-  
nata,

nata, solenni precatione, & astantium omnium  
votis, expetiit. Inde, benedicto adolescenti, vex-  
illum consecratum, in eoque triumphalem tesse-  
ram, & victoriæ præscriptam, cum hoc vere Chri-  
stiano lemmate, *pro gloria Crucis*, in manus tra-  
didit. Accendit amplius Christianam turbam,  
lecta in vixillo causæ pietas, & egredientem Eccle-  
sia Principem, votivis acclamationibus prose-  
quebatur: ambigua interim, cui eventui, cui for-  
tunæ permitteretur: rediturumne aliquando cum  
victore exercitu; an ultimum jam & supremum  
videns, prosequeretur.

Sed mox omina non infelicia scrupulos ex-  
tenuabant. Vix, relicto limine templi, publicam  
ingredienti viam, mulier obviam progressa, au-  
spicium boni eventus, binos panes obtulit. Quid  
aliud hoc, nisi prosperorum fertilitatem, & non  
unam, geminata felicitate, victoriam portende-  
bat? Vultus, inter allapsum populi fluctusq;, ad-  
olescenti plenus sui, prosperæ gerendæ rei fiducia  
lætus, & quasi victoriam & triumphum spirans;  
insuper animos omnium, discussis angustiarum  
nebulis, spei serenitate illustrans, quid aliud erat,  
quam occultum, triumphantis in corpore Genij,  
felixque præsagium? Certissimum erat, quia con-  
trarium Osmano acciderat.

Omina  
victoriæ  
circa Vla-  
dislaum.

*Omina  
cladis  
circa Os-  
manum.* Constantinopolim ille tristi, & in prodigium  
rugosa facie egressus erat. Terruerat eum Patruus  
Mustaphas, cui in somnis sæpius Osmanus visus,  
quem prodigiosæ magnitudinis serpens perseque-  
retur. Ipsemet Osmano; nocturna quiete, obver-  
sata Patris feralis imago, minas intentaverat: egre-  
dientique, cui maxime insueverat, pavida è somno  
mulier, ac si profusum manantemque cruore vi-  
disset, illecebris metuque adhæserat. Dissuaden-  
tem insuper expeditionem, insigni probitate vi-  
rum, iratus occiderat, immemor eum Osmanum  
quoque nominari. Ibant ergo in invicem, ætate  
prope modum & statura pares, cæterum armis, a-  
nimis, omnibusq; diversi, adolescentes: relin-  
quentes, quo se inflexura felicitas esset, Terrarum  
Orbem, sui expectatione, suspensum.

*Osmani  
solus.*

Interim Osmanus, per Capudzi Bassam, Ve-  
vellium Italum Candensem, Christianum licet,  
compositum tamen ex astutia & calliditate vi-  
rum, cum litteris, ad offerendam pacem, in castra  
Polonica miserat: vel quo promptiores ad bel-  
lum Sarmatas, injecta concordie spe, segniores  
redderet: vel quo metu, ut putabat, territos, ad  
eas, quas ipse proponeret, pacis conditiones, invi-  
taret. Sed Lubomirscius, in castra non admissio  
Vevellio, omnia ad Hotkevicii adventantis præ-  
fenti-

sentiam distulerat. Hic autem, postquam cum Lu-  
bomirscio sese conjunxit, Theophilum Szember-  
gium cum litteris Vevellio addidit, & Osmano,  
non esse, nec fuisse unquam Poloniam, à pace, ali-  
enam, indicavit.

Hotkevicius autem, in utrumq; sedulus, *Hotke-  
vicius Co-  
sacos ac-  
cessit.* licet Szembergium pro pace dimisisset, necessaria  
bello non minus providebat. Quoniam vero, ad  
summam rei, non parum facere judicabat, Cosa-  
corum, cum exercitu suo, conjunctionem, eos  
continuis nuntiis accersere non desisteabat. Illi  
autem repugnabant, nisi Tyram copias universas  
traduceret, & juramento, nullatenus pacem aut  
foedus Regem & Rempubicam Polonam initu-  
ram, nisi iisdem conditionibus reciperentur, ca-  
veret. Alterum, fide obligata spondidit; alterum  
opere ipso statim adimplevit. Hotkevicius enim, *Copias  
trans Ty-  
ram, in  
Valachia  
ducit.*  
17. Kal.  
Sept.  
iplius etiam Sigismundi Regis jussu, exercitum,  
qui præter Vladislai Principis octo millia, non nisi  
septendecim millium erat, decimo septimo Ka-  
lendas Septembris, in alteram Tyram ripam, in Va-  
lachiam, ad Hotimum Oppidum, vacuum tunc,  
& præ timore, desertum, transtulit: postquam,  
octavo Idus Augusti Lubomirscius antequam ve-  
nisset.

Castra deinde locata, ut à peritissimo milita-  
rium



*Polonico-  
rum ca-  
strorū dis-  
positio.*

rium rerum, Duce, loco maxime opportuno. Ter-  
gum tutum faciebat Hotimum Oppidum, arce, in  
prærupto & excelfo sita, munitum. A fronte pla-  
nities fundebatur, eliciendo hosti, conferendæq;  
pugnæ, oportuna; coercita tamen prolixitate, ni-  
miæ multitudinī inutilis, & in qua uti se toto ho-  
stis non posset. Lævum latus ad Tyram fluvium  
protendebatur: ad cuius propinqua, valles, & hu-  
mus modo depressa, modo elata, inæqualiter si-  
nuabatur. Dexterum virgulta pone internata, syl-  
vasque, & cavas etiam vias, sinusque habebat,  
struendis occultandisq; insidiis aptos. Istud Hot-  
kevicius sumpsit. Lubomirscius in dextero con-  
fedit: Media Vladislao Principi relicta sedes.

*Vladisla-  
us provi-  
det ne  
Turca in  
Sarmati-  
am ruant*

Hic suo, quem secum habebat, exercitu, ad  
Tyram, ut erat avidus conficiendæ rei, jam quo-  
que pervenerat: & protinus in Hotkevicii castra  
concessisset, nisi providentia illi non nihil cunctari  
suasisset. Verebatur ne, viribus in unum collatis,  
per sublicium, à Turcis confectum, pontem, Of-  
manus partem sui exercitus, in Sarmatiam subin-  
de immitteret, & indigenas, pro quibus servan-  
dis in prælia proficiscebatur, Turcæ depopula-  
rentur. Insuper ne à fronte se cum exercitu præ-  
liante, Barbarorum incursionibus aditus occupa-  
rentur, & eatenus Sarmatis à tergo subsidium &  
penu

penu clauderetur. Quā provide hoc & prudenter,  
Jam in istud consilium, à Bernavio Valacho, vetu-  
sto in Polonos odio, & per frequentia Podoliæ la-  
trocinia claro, persuasus Osmanus propendebat.  
Sed hac Vladislai Principis cautela, insuper nun-  
tiata Kantimiri clade, et, paulo post, paucorum,  
Cosacorum fortitudine retardatus, sententiam in  
pejus flexit.

Kantimirus, antequam, quem maxime ab-  
esse volebat, Vladislaus Hotkevicio sese conjun-  
geret, aliquid audendum ratus, quinque selectis-  
simorum Tartarorum millibus, Hotkevicii castra  
accessit. Tribus millibus, adversam Lubomirscii  
castris, sylvam occupavit. Duo millia, ad Tyræ  
marginem, destinata Zaporoviensibus Cosacis  
castra, celeriter transire, & à latere inopinatos Po-  
lonos agredi iussit. Factum fuisset, nisi Piotrows-  
cius, tum forte ab excubiis Tyræ rediens, in illos,  
jam transgressos fossam, fortuito incidisset. Ad-  
erat ergo huic, quod primum hostile apparuit,  
pugnandi necessitas: sed periclitanti, excitati, per  
tumultum pugnæ, viciniore, subsidio venere.  
Tum vero, promptissimo quoque deletō, cæteri  
in fugam versi. Acrior cum Lubomirscio pugna  
fuit. Jam enim Kantimirus oppugnatum venerat  
Lubomirscii castra, ne periculum à leva immi-  
nens, à distractis, impetu suo, Polonis, advertere-  
tur.

*Kanti-  
mirus ca-  
stra Polo-  
nica ag-  
greditur.*

Pertinax  
Tartaro-  
rum pu-  
gna.

Insignis  
eorum  
Clades.  
Anno  
1621.  
31. Aug.

Osmani  
præsum-  
ptio &  
Tyrannia.

tur. Sed, illis duobus millibus, cum clade, rejectis, Lubomirscius non sustinens se oppugnari, educens copias in apertum prorupit. Tum vero tam acris, continua, et, præter Tartarorum morem, pertinax pugna, ut vir viro, pes pedi conjungeretur, & alterum alter amplexus, mutuis vulneribus sternerentur. Immo Tartarorum unus inventus est, qui, per confertissimos Polonorum ruens, non antepugnare desit, quam, perfracto capite, ante ipsa munimenta concideret. Lubomirscio dedecus videbatur, tam diu cum vili hoste pugnari. Ut ergo insigni aliqua virtute, impofterum ipsi confidentiam demeret, denuo, ut ipsius sequerentur exemplum, animatis militibus, sua cohorte, quasi recepto spiritu, in pertinaces invehitur. Reliquæ ipsius copiarum, exemplum Ducis imitabantur. Quid porro? Cessere Tartari, & ad sylvâ denuo versa fronte, hunc à tergo pertinaciæ suæ fructum reliquere, quod recto late cadaveribus campo, eundem sanguine suo purpurarint.

Vevellius interim, Szembergium circumducendo, à Polonicis ad Osmani castra, ab invicem non nisi sedecim Leucis distantia, migrando, viginti & unum dies insumpsit. Novissime, passim ludibrio habitum, ad Osmanum perducit. Hic, immane, quantum facilitatem Polonorum, ut me-

tum

tum acceperit: non aliter ac si debellasset, quos ad concordiam pronos videret. Ergo, quasi peracto bello, finem incōstantiæ perfidiæq; vindicta facturus, Valachos, quos, ob innatam ipsis levitatem, cōtemnebat, omnes trucidari jubet. Quadringenti ferme, quos vescētes simul dies, simul quietos nox habuerat, diversis è tentoriis, à Turcis, extracti, interfectique. Nec Alexander, Princeps eorum, eandem & ante se Principum sortem evasit. Exitus ejus eam causam famamque habuit, quod prohibere transitum Polonis in Valachiam & Hotimum firmare præsidii omisisset. Peracta hac cæde ferox, quasi parta ingenti victoria, triumphabat: non considerans, facile esse inermes captosque occidere, & fere idem quod Martialis:

*Barbam vellere mortuo Leoni.*

Cæterum hanc intempestivam & insipientem quodammodo ejus ferociam, centum triginta <sup>Quadraginta Co-</sup> sed armati, sed in acie, Cosaci humiliavere. Ho- <sup>sacorum</sup> rum quadraginta millia, subsidium bello, & debi- <sup>versus a-</sup> tum Imperatoribus Polonis ferentes obsequium <sup>stra Polo-</sup> per Valachiam appropinquabant. Quacunque <sup>nica pro-</sup> vero ibant, cædes, populatio, terror; adeo late, ut <sup>fici seun-</sup> Alexander, paucis ante finem suum diebus, Urbem Valachiæ Jassum, omni fortuna, apparatuque belli instructam, præ metu deseruerit. Sed ea, à Cosacis

N

inta-



intacta, ab ipsis Valachis direpta est: nam Cosacorum populatio cauta, intra Oppidum Sorokam stetit: ~~et ibi non paucosq; sinasit~~

Jam vero memorabile illud, & inauditum habet: *Paucorum Cosacorum prodigiosa virum* etenim ab ulla gente, paucorum Cosacorum, fortitudinis & virtutis exemplum, posteris consignare aggrediar: & vereremur ne, propter insolentiam sui, fidem alibi inveniret, nisi scirem Thermopilas invenisse. Una cohortium, centum triginta numero, longius effusa, cupidine prae, inter Kumenrum & Sorokam Oppida, à Turcis circumventa est. Attacta, impugnata, pressa, tam diu, tam ferociter restitit, ut, desperata victoria, Barbari, plurimum legionum opem, à Caesare invocarent. Osmanus, audito Cosacorum nomine, eorum jam ante audacia, & saepius accepto damno, provocatus, ut in illis saevitiam suam expleret, & gentem universam, in hac quasi manu, vindicaret, ad delendos, immane exercitus sui corpus, insigni levitate movet: et, triginta passuum millia emensus, in aperto campo adeptus est. Ceterum jam septuaginta eorum, conspecta innumerabili Turcarum multitudine, pavore correpti, ad proximas montium specuumque latebras, profugerant. At quanto gloriosius erat mansisse? Timoris & ignaviae poena quasi obvia fuit. Osmanus enim ora specuum, farnen-

farnentis virgulisque complens, igni fumoque vivos suffocavit. Reliquos sexaginta, tot centenis millibus hominum circumdatos, vivos capere nitentur. Illi vero orbe facto, vim vi repellere, cedere alios, alios obtruncare, & perniciem in hostes vertere, indefesso robore non desistebant. Immo opportuna occasione, erumpentes, promptissimo quoque trucidato, inter ceteros, Kur Bassam occidunt, & aliquot hosti vexilla eripiunt. Osmanus desperans jam vivos capi posse, dirigere tormenta jubet, & immensi machinarum gutture, immixtos flammis globos, in pertinaces, jaculari: ut, si quo modo posset, hoc saltem victoriae frueretur, tantillam manum campo dimovisset. Frustra fuit. Omnia quippe adversa, Cosacorum constantia vicit, & igneos tormentorum globos, ad adultam usque noctem, fortiter toleravit. Tunc beneficio tenebrarum, virtute, aut fraude, penetrare hostes tentavere. Non adfuit fortunae favor, quae, Herculeis plane viris, non in longum vitam, sed in saecula famam, extendere decrevisset. Ergo retro acti, carragine se claudentes, rotas currum suorum, defodiebant, terra obruebant, & scrobes moliebantur, quibus, adversus tormentorum ictus, tuti, ex occulto, in patescentes, irruentesque jacularentur. Quod plus fortassis famae, quam fidei, habitum

rum est: per triduum Osmanus, infinita mortali-  
 um multitudine, in hanc tantillam, taliter mu-  
 nitam, manum, armis, tormentis, ferroque incu-  
 buit, & in cassum. Restitit enim illa fortiter, &  
 suffecit. Ad extremum, non arte, non Marte  
 subacta: sed dum invicem, ut custodias frustra-  
 rentur, vitabundi, secundo, per noctem, effugi-  
 um quærunt, singuli in manus hostium vene-  
 re. Maeste beatissimos, meo iudicio, viros, &  
 Lacedæmoniorum gloriam longe superantes.  
 Illi quippe trecenti, & ad Thermopylas: hi non-  
 nisi sexaginta numero, & in aperto campo, parem  
 Xerxis exercitui multitudinem fatigare. Et  
 primi omnium, maximo Turcarum ludibrio,  
 Orbi patefecere, hanc immensam molem posse  
 debellari, cum pauci sustinuisent. Ipse Imperator  
 Osman<sup>o</sup>, videre cupidus homines, qui tot per an-  
 nos, vires Turcicas spernerent fatigarentq;: qui  
 tam parvo numero, in miraculum crescente au-  
 dacia, quodammodo generis humani vires deri-  
 sissent, omnes in conspectum suum adduci iussit.  
 Adducti, quot à tormentorum globis supererant,  
 triginta numero, et, prout illis nulla cultus affe-  
 ctatio est, plerique laceri, & tantum sagulo leves.  
 Mox ergo pudore, indignitate, ira, in rabiem &  
 crudelitatem versus, ut erat pronus ad ista Osma-  
 ni ani-

ni animus; direptum à latere ferrum, amplius  
 quam denis immergit. Inde fatigatam manu sua  
 sævitiam, porrecto alteri ferro, explendam tradi-  
 dit: ut eorum saltem palpitantium expiranti-  
 umque aspectu frueretur, quorum in acie vigo-  
 rem tolerare non sustinebat. Inde fortitudine  
 virorum in animum redeunte, duorum, qui non-  
 dum interfecti restabant, vitæ pepercit: non mi-  
 sericordia aliqua, sed calliditate ductus, ut alte-  
 ro, muneribus blanditiisque corrupto, corrup-  
 pendis vicissim Cosacorum castris, & pollicita-  
 tionibus, ad defectionem, sollicitandis, uteretur:  
 alterum, pro emissio, fide data, morte sua, ni se si-  
 steret, compensanda, pignori ac vadimonio,  
 pro alterius reditu, reservaret. Quod ut eo com-  
 modius fieret, & Cosacos, ab Hotkevicii castris,  
 segregaret, aditus omnes, quibus transeundum  
 erat, universo exercitu præoccupavit: ut, si quid  
 emissus, ad alienandos animos, Cosacus effecisset,  
 occasione uteretur.

Interim, quo per simulationem quietis, de-  
 sinata segregaret, remittere Szembergium ju-  
 bet, spem pacis Hotkevicio ostentans, si arma po-  
 neret: interjectis minis, si in contrarium nitere-  
 tur. Additur simul Vevellius, litterarum comes  
 & actor. Quam inania humana consilia! Utrobique

Osmanus  
frustra  
Cosacos  
ad se al-  
licere  
tentat.



spe sua deceptus est. Cosaci enim, spretis promissis, armisque Cæsaris, compositi munitique inferunt se porro in medium ipsius agmen. Turcæ, circumfusus undique copiis, animosè resistebant: quasi jam rejicere millia quadraginta confiderent, cum ægre, non ita pridem, sexaginta eorum potuissent. Itaque, per semineces, per integros, Cosaci pergentes, multa tandem Turcarum cæde, in liberum & Polonica castra emersere. Idem dies ipsos & Szembergium, cum Baptista Vevellio, ad Hotkevicium tulit: & collocati à dextera castrorum parte, qua Tyras præterfluebat.

*Hotkevicij prudens factum.*

Cæterum Hotkevicius, præsentiens Osmani & Vevellii ludificationes, repositis in sinum suum litteris, Osmano respondit, antequam perlegisset: & paucula admodum, obscura, et, tenui mentione pacis, contemptum potius, quam responsum sapiuntia. Quam provide & prudenter id fecerit, apertæ mox Osmani litteræ ostenderunt. Turcico enim ideomate scriptæ erant: qua relicta, si pacem sincere voluisset, familiari aliqua Polonis lingua usus fuisset. Sed jam hoc, ab Hotkevicio, nefas vindicatum erat, antequam visum. Itaque Vevellius Ludificator, non incorreptus, à Polonis remissus: & interdictum pariter, ne, si de cætero ludificari præsumeret, reverteretur.

Osma-

Osmanus, spe sua dejectus, his Hotkevicii litteris, magis in ultionem exarduit: nec vana erat, nec sine viribus ira, si, ut instructa numero, ita virtute fuisset. Promovit interim castra, ut, si posset, Sarmatas multitudine & præsentia sua terreret. Primū vis magna pulveris appropinquare visa. Dein, magis magisque exagitata arida humus, latius suffudit cælum, densaque caligine montes & plana intexuit. Nec mirum: cum præter equorum, ad pugnam adductorum, vim, supra decem Camelorum: bubalorum vero, necessitati & cibo destinatorum, supra viginti millia, tenuioris arenæ cumulos commoverent. Ad hæc quatuor infinitæ magnitudinis Elephantæ, magnificentiæ Barbaræ cultum, & delicias portantes, mole sua fatigabant humum. Centum quindecim grandiores machinæ, quarum aliquæ quinquaginta quinque librarum globos impellebant, numerosis bouum jugis trahebantur. Insuper infinitus ille exercitus: tot equitum, tot centena peditum millia, suis distincta legionibus, gradiebantur. Tandem, quater mille passibus, à Polonorum castris, spatium, quantum intra eminentia juga exurgebat, expandebatur: que, tantum, supra citraque fuis in immensum agminibus, occupavere. Tum credita magis, cum

*Osmanus castra sua Polonicis castris opposuit. 2. Sept.*

*Turcorum castrorum facies.*

imma-

immanis illa exercitus innumerabilis moles visa est. Quamvis nec integra videri potuerit, cum trium montium planis de vexisque sparsa, expansa, pendula, vix oculis terminari posset. Dilapsa non nihil pulverulenta caligine, erectoque prætorio, signum, ad sua promiscue figenda tentoria, datum est. Tunc immensa illa castrorum facies, in canitiem velut hybernā, quasi momento exalbuit. Humiliora usque ad Tyram, suis seorsim castris, Tartari occupaverunt: cætera Turcæ.

*Osmanus  
castra Po-  
lonica  
despicit,  
& oppu-  
gnat.* Inde Osmanum juvenili ferocia & curiositate plenum, cupido, distinctius Sarmatica videntis castra, invasit. Altissimam itaque cum Primoribus suis turrim ascendit, & paucitatem Polonorum, & castrorum angustias contemplatus, præ multitudine sua contemnens, in temeraria vota erupisse dicitur, non gustaturum se panem, priusquam & hæc expugnata fuissent, & Sarmatæ internecione deleti. Approbavit, felix sæpius antea, Ussaim Bassa, Silistriæ præfectus votum, & summam sibi certaminis, ab Imperatore permissam, alio æque temerario voto, non reversurum se nisi victorem, obligavit. Et, quod periculosissimum erat, devoti, in aciem, Turcæ, mutua, alacritate coibant. Actumerat de Polonis, si ad  
eorum

eorum excidium vota valuissent. Sed illi, contra animosi, tanti non æstimavere, ut, relictis castris, in apertum prorumperent, aciemque, ante ipsa munimenta, instruerent. Lubomirscio dextrum cornu permissum, Hotkevicius sinistrum duxit: quicquid ad Tyram vergebat, obiectis levibus munimentis, tenuit Saporovienſium Cosacorum exercitus. Hos adoriri prius Turcis visum, quod clausis nondum, commissisque cum alijs, munimentis, etiam itinere fessos, opportunos magis, & faciliores fore opinarentur. Quo Poloni autem distraherentur, Dziambet Gereū, ipsis, & Kantimirum, cum Tartarorum exercitu opposuere. Initium pugnae à Tormentis in Cosacos exonerandis factum. Quæ præiverant globi, Turcarum fortissimi, & solennius devota capita, sequebantur. Iamque oppugnatio pertinax erat, maiore, cum frustra peterentur, Cosacorum fiducia. Addidit hanc, effusum ad spectandum, ex Hotkevicij munimentis, castrense vulgus. Rati enim in subsidium id sibi venisse, protinus ex munitionibus, in apertum, effusi, in Turcas ruunt. Tunc, ubi clamore concursuque invicem consonuere arma, qui spectatum venerant, fugiunt, & unā, quod antea alacritatis attulerant, secum auferunt. Itaque incumbentibus, majori nisu, Turcis, gradum paulatim



tim retro, ad munimenta, dedere. Oportune laborantibus suppetias Hotkevicius tulit. Quippe, intentus ad omnia, discrimen viderat, & jam proximam, prout instructa stabat, Cosacis subsidio, legionem admovebat. Mox omnia promiora his, graviora Turcis: & quo minus, votorum obliti, statim fugerent, sui memor, Ussaim Bassa retinebat. Pudebat enim generoso animo Ducem, toties victorem antea felicemque, jam ultimo, juramento devorum, successu irritum, indignabundi Imperatoris faciem subire. Pugnabat ergo jam, non, vincendi fiducia, sed retrocedendi metu. Removit hoc unum, ad plenam Cosacorum victoriam, fortuna obstaculum, & obnoxium ictui, Silistriae Praefectum, Ussaim Bassam, ignea, è militari tubo, glan-  
*Ussaim Bassa mors, & Polonorum victoria.*  
 de costas traiectum, è medio sustulit. Tunc fugientes Barbari, ignominiosa suorum clade, perfectam, sub crepusculum vespertinum, Hetkevicio & Cosacis, victoriam reliquere. Quam feliciter dimisatum fuerit, sparsus cadaveribus campus, distantia sagulo leves Cosacos Turcarum spolia, & quinquaginta tantummodo è suis desiderati, ostendere. Captus insuper Minoris Asiae Praesidis cognatus: sed, non uno vulnere saucius, vitam liquit. Lubomirscio dextroque cornui indictum sapius clamore bellum, quam gestum fuit: seu dis-

tractis,

tractis, mutua discordia, animis: seu, quod victoriam, post Turcas, Tartari desperarent.

Quæ inde Osmani rabies! Quæ Sarmatarum *Osmani rabies & Polonorum de promovendis armis, deliberatio.* alacritas: Ille tristitia, morositate, furore, familiaribus suis intolerabilis, temere effusi juramenti, acceptæ cladis, & victoriæ hostium poenitens, sibi ipsi tormentum erat: & pertinaci, in mentem propriam, crudelitate, intempestiva temeritas vapulabat. Hi, multiplici felicitate animosiores, jam de armis ulterius inferendis, & promovendis, in penitiora Valachia, castris, cogitabant. Ejus sententiæ sensusque Hotkevicius ipse erat: Homo revera magnanimus, qui gerere bellum, quam ducere: victoriam potius domum, quam pacem: gloriam meditari, quam quietem, mallet. Sed alii, scrupulosius omnia ponderantes, contrarium, hærendumque censebant: esse enim quandam etiam, in cunctatione, victoriam: periculum in prosperis, fortunam suspectam in felicitate semper. Nullum deinde, ad vincendum, potentius telum videri, quam ex necessitate hostis non pugnare.

Cum hæc controversia dissentientium finem *Principis Vladislai prudentia.* non inveniret, omnium ore conclusum est, Vladislauum Principem, qui in procinctu erat, expectandum, ejusque sententiam, aut si quid hæc de re

O 2

Sigis-

Sigismundus Parens illi in mandatis dedisset, hoc audiendum, amplectendumque. Hic autem vere Reginus adolescens, insigni providentia, Sarmatiam, de cuius salute agebatur, ab incurfu hostium, pro virili tutatus; hoc insuper prudentissime providerat, ut in tempore laboranti exercitui, de comiteatu prospiceretur: incassum fortitudinem & vigorem sperandum ratus, si inopia & egestate debilitato corpore, ad solita & egregia, militis animus, sollicitaretur. Cum jam autem utcunq; exercitui prospectum esset, & coactaneum æmulumque suum Osmanum, oppositis castris, ferociam suam exerere, Sarmatas impugnare, & victoriam meditari, inaudit; ut ætatem ætati, Majestatem Majestati, & temerariæ, adversarii sui, ferociæ, solidam virtutem opponeret, junctis cum Hotkevicio copiis, trajicere Tyram, destinavit. Multis, generosissimi adolescentis, præceptis ad heroica animus, scrupulo erat. Quippe non nisi viginti quinq; Polonorum, quadraginta Cosacorum millibus, & Reipublicæ, & illius salus, committebatur. Quibus tam paucis copiis, potentissimum Terrarum Orbis Monarcham, & quasi generis humani vires aggedi, plurimis minus consultum videbatur. Sed vere Sapiens Latinus. *Fortitudo contemptrix timendorum est: terribilia & sub jugū libertatem*

Hotkevicio se conjungit.  
3. Sept.

Senec.  
Epist. 38.

tatem nostram mittentia, despicit, provocat, frangit. Ergo, quod dicitur, *virtute Duce, comite fortuna*, Tyram trajiciens, reliquo exercitui se conjunxit. Tunc Hotkevicius, Lubomirscius, & Primates cæteri, adventum congratulati, & festis tormentorum, in Turcica castra, boatibus, gaudium subsidiumque suum testati, ad determinandam præcedentis diei controversiam, convenere. Tutissima, Principi Vladislao, placuit: depromptis etiam, hac super re, Patris sui Sigismundi litteris: quibus, non omittendam prælii aleam, aut porro promovenda castra, si certa se offerret occasio, jubebatur. Alias cunctari magis suadebant, donec cum tota; Sarmatiæ universæ nobilitate (quæ centum septuaginta millium fore dicebatur) subsidio castris veniret. Promptum quoque tunc diploma dicitur, quo, multo Hotkevicii cū honore, modus tamen præscribebatur id aggrediendi, in quod Commissarii, ad id Bellum à Senatu dati, consensissent, ivissentque simul cum eo in suffragium. Quod quanquam civiliter ille accepisset, secus tamen promiscue creditum: præsertim cum in fatalem deinde morbum incideret; quem ex mœrore limitatæ potestatis, toties antea ob soluti Imperii Dux, contraxisse dicebatur. Ut ut sit: omissiori exinde, velut in dolore animo, bellum gessit.

Cæ-



Cæterum Osmanus, audito fragore, de adventu Vladislai Principis lætantium Polonorum, sequenti die aciem instruxit: Ut, si quando facultas daretur, concurrentibus invicem, copiis experirentur. Non visum filio Regis, itineris molestia nauseabundo, pro tunc, collatis signis, præliari: sed, immissis subinde agminibus, impetum æmuli, frequenti velitatione, elusit. Osmanus postera die, quasi prælio vicisset, quia

*Polonica-  
rum ca-  
strorum  
irrita op-  
pugnatio.  
5. Sept.*

obtulerat, ferocior factus, oppugnare iterum, castra præsumpsit. A prima Luce, ad meridiem usque, tormentis machinisque prælusum: post meridiem, quasi relictis prandio ad laborem corporibus, ab omni latere in munimenta incubuit. Sed nullum, ubique à Vladislao Principe, & Lubomirscio, animatis militibus, & resistentibus acriter, periculum erat; nisi ad unum instructum muro Fanum. Hoc à Polonis non satis munitum, & nonnihil eo tempore, incuria quadam, neglectum, à Janizaris premebatur. Et jam in propinquo erat, ut expugaretur, cum, animadverso periculo, Rochanovius, peditem Vladislai, Germanicasque cohortes, eodē, magna vi, rapiens, violentiā Janizarorū, alia quadam maiore vi, fregit, & quasi à limine exegit. Osman⁹, nihil in Polonos proficiēs, facile sentiebat, nisi quidē ej⁹ diei

... oppu-

oppugnationem plane irritam veller, alio impetum transferendum. Ergo in Cosacos, tota exercitus sui mole, vertitur. Sed illi quoque, strenue reiectis Barbaris, talem addiderant virtuti dolum. Multis, ante ipsa castra, excavatis scrobibus, in eas se dimittebant, et, eatenus adversus tormentorum ictus toto corpore tuti, secure eminus hostem impetebant: cominus, inopinato exsiliētes, improvise terrore & impetu in fugam Turcas conjiciebant. Laudabili profecto Stratagemate, nisi crescente paulatim ex successu audacia, omnia, apud gnaros jam fallaciæ hostes, temeritatē corrupissent. In redeuntes quippē, & Stratagemate retrocedentes, solito fervore inveci, dato signo, accepti in medium, à lateribus cingebantur. Et jam, omni ex parte pressis, exitium imminebat; cum, velitum, & Germanicæ Vladislai, cohortes, auxilium tulere: et, referata ferro via, ad castra eis reditum aperuerunt. Vix evaserant, cum alia Turcarum fallacia deciperentur. Rumore disseminato, capta Turcarum à Cosacis tormenta, loco, ob magnitudinem, moveri non posse, iterum eos ad temeritatem invitavere. Traxit quippe hæc vox, per se concitatos, ulterius: tantoque ardore campum, nullo amplius ejus defensore, superarunt; ut ante, sub ipsa hostium suorum castra, pro-

cur.

currisse se adverterent, quam putavissent. Tum vero Barbari, omnibus, in eos, portis erumpentes, simul illos, & venientem subsidio ipsis, cum peditibus trecentis, Morendam, extortis duobus vexillis, ad castra retro compulere. Opportune cavatam in scrobes humum, Sclopetariis Germanis Vladislaus impleverat: hi enim, in effusos ad victoriam Turcas, probe, longioribus tubis, collineantes, fuso ex insidiis glandium imbre, impetum cohibuere. Majora in invicem molientes tenebræ diremerunt.

*Atrox facinus in castris Polonicis.*  
6. Sept.

Sequentem diem, atroci facinore, Poloni, ne fastum reddidere. Ducenti circiter Valachi, ex alimonix venditione, quæstum exercebant. Adeos ventitabant infimæ plebis homines, aleatores, lixæ, servitia, pretium luxus, jam pecuniam, jam pignora deponentes. Postea, cum hæc ipsos per lulum & libidines defecissent, versa in crudelitatem pœnitentia, tempus condicunt, quo, Valachis ferro trucidatis, sua per internationem eripiant. Igitur, signo dato, tabernas effringentes, transigunt alios, alios mactant, in flumen alios mergunt; tanta sævitia, ut, felicitate quadam de novo ad littus ejecti, rursus in gurgites propellerentur. Miseranda & deformis ubique facies; cum sanguis, rapinæ, furor, invicem miscerentur. Nefas erat,

erat, & severe puniri debuerat: sed cum per tot mortales flagitium manavisset, authore in patibulū acto, reliquis, ne vulnus, talibus circumstantiis, medendo irritaretur, Duces ignovere.

Jam septima Septembris dies erat: quam *Audax* audaci fortitudine sua, & memorabili hostium *Hotkevici- cy fortitudo.* suorum strage, Hotkevicius nobilitavit. Occasionem hæc, à vigiliis Polonorum, male vigilantibus, habuit. Illi quippe, moré recepto, longius ante vallum curare soliti, cum periculi eos in aperto tederet, stationem fossa munivere. Ea confisi, defixis pro terrore vexillis, negligentius ipsi agere, somno humi procumbere, solita munia custodiasque remittere. Adnimadversum id à Turcis, captatoque, quo maturitas lucis securitatem, calor soporem pariebat, sub meridiem, tempore, solutos metu, repente adorti, trucidatis duobus præfectis, stragem latius circumtulere; adeo, ut ablatis duobus vexillis, abductisque ad castra duobus scloporum plaustris, numero aucti, animosiores in præliū reverterentur. Qualis, ad nuntium rei, Hotkevicius erat, felicissimæ temeritatis! Ille ægritudine corporis suis neglecta, arma, per iram & indignationem, induit. Et, assumptis tantummodo quatuor hastatorum signis, insolitum castris suis nefas, vindicatum ivit. Jam vix ad teli *P* jactum



jaetum pervenerat, cum, concitato calcaribus equo, sex Turcarum millibus sese immerfit; adeo ut fufis à lateribus, tergoque, Barbaris, haustæ penitus viderentur. Solus armorum fragor, strepitus conferentium manus, vibrata in invicem tela, & fluitantia signa, vivere testabantur. Spectantium alios stupor, commiseratio alios, quasi projectæ morientium, invadebat. Felix tandem eventus, stupentium, commiserantium, omnium denique, utriusque exercitus, spe metuque ambiguos animos, explicuit. Ad extremum enim Barbari cessere Polonis ex necessitate pugnantibus: et, ingenti clade fracti, præcipites, ad sua castra, revolvebantur. Quot ceciderint, tradentium negligentia, in occulto est: plurimos autem cecidisse vel ex hoc ipso patet, quod sesqui hora pugnaverint, & cum facibus, totam noctem, Barbari, colligendis nobilium suorum cadaveribus, insumpserint.

*Poloni prælum offerunt: Turca de trestant.* Hotkevicius, memorabili hac pugna victor, adeoque ferocior, adnitente Vladislao Principe, aciem insequenti die instruxit, & pugnae copiam fecit. Tum vero patuit, quantum præcedentis diei audacia, & victoria partum: cum, succincti tantis viribus Barbari, tamen de victoria desperarent. Itaque, ad crepusculum usque vespertinum, agentibus in acie Vladislavianis, cum nulla

Tur-

Turcarum signa comparuissent, rursus, triumphantium more, se ad castra recepere. Inde modestiores Turcæ, & Sarmatæ, non insultantibus adeo Barbaris, magno & continuo labore defuncti, fortunæ indulgentia, quiete fruebantur. Et si alicubi velitationes, certe ipsorum pugnantium tantum erant, non commoventibus ideo se reliquis copiis.

Porro utrumque exercitum, intolerabilior ferro, dira fames urgebat: Polonos quidem non adeo, à Vladislao Principe, non ita pridem ad huc, ad aliquam temporis moram provisos: Cosacis autem infestior erat, sua ipsorum, & Borodawcæ Ducis negligentia. Hic, Petro Konaszewicio, ob morum severitatem, à Cosacis deposito, ipsorum electione successerat: non quod melior esset, sed ad corruptā indulgentiam pronior. Omnia, sub hoc, impune, flagitia, in Patrio promiscue ac hostili Solo, per fas nefasque, perpetrabantur, & umbraticus ille Dux, ad Cosacorum arbitrium, ipsorum violentia, trahebatur. Adjecerat hoc ultimum nefas, quod, futurorum improvidus, non frumentum & victualia copiis, non equis alimenta providisset: prorsus quasi, ad debitum, Polonicis exercituum Ducibus, obsequium præstandum sufficeret, venisse. Itaque,

P 2

con-

consumptis, quæ obvia sibi rapuerant, in proficientem in deterius quotidie famem incidebant. Quare, in Borodawkam rabie versa, illi, suam ipsorum licentiam, pravam ipsius indulgentiam, & cætera, propter quæ ipsum elegerant, vitia obiciebant. Occasione usus, cum aliis copiarum Ducibus, Vladislaus Princeps, ipsorum Cosacorum consensu, Borodawkam deposuit, & Konaszevicium, plurimis, sub se, in Moscovia, strenue gestis gloriosum, priori loco restituit. Tum cætera quidem in melius, præter unam famem, redibant, quæ periculosa in tam corrupto populo, & tam vicino hoste erat. Tum illud egregium Stanislai Lubomirscii fuit: qui, distincto per turmas & cohortes exercitu, sua ipsis propria alimenta distribuit. Inde Vladislaus Princeps, præsentia sua, & donativo, per Commissarios, quinquaginta millium florenorum, promisso, ad perseverantiam illos porro animavit.

*Cosaci nocturnâ Turcicorum castrorum invasionem parant: sed à Vladislao Principe, ut, si quid adversum Cosacis contigisset, sequentibus à tergo suis Germanorum cohortibus,*

hortibus, virtute gentis, & armorum pondere, firmis, protegerentur. Et jam in eo erat, ut per intermissa custodiis loca, nihil sentientes sopitosque Barbaros, Cosaci invaderent, cum repente imber, ingentibus procellis fusus, cohibuit impetum, & indignabundum ad castra militem retro egit. Saluti illum imbrem exercitui Turcarum fuisse plerique dixerunt. Certe ut transfuga Turcis periculū, quod evaserant, enarravit, tanta turbatio Osmanum, tribunos, & universas copias, invasit, quasi prorsus factum fuisset, quod fore in propinquo fuerat. Inde omnia attentiori frequentiorique vigilia munientes, occasionem animumque Cosacis, denuo resumendi, sustulerunt.

Cæterum, præter bellorum & penuriæ mala, Turcarum castra, contagiosa lues invaserat: eo funestius, quod, vergente jam ad senium anno, Aegyptiis, Syris, Arabibus, & quasi ab alio Cælo hominibus, inassuetus Europæus, maxime Septentrionem versus, aër officeret; ipsa insuper multitudine virus conferente: ita ut multa quotidie millia morerentur. Et tanto indies magis in pejus malum proficiebat, quanto Autumnus adultior, dierum accessione, fiebat. Quid ergo? Osmanus multum, singulis fere momentis, de-



ferocia pristina & præsumptione remittens, & irrita castrorum obsidione implicatus, an abiret, an adhuc moraretur, ambiguus fluctuabat. Et jam apparebat pudore magis, quam virtute resiltere. Tandem ad petendam pacem inclinatio-  
*Osmanus* *pacē pe-* *tit: sed* *Karakas-* *fii Bassa* *adventu* *cōfirma-* *tus, ad* *bellum* *resilit.* *resilit.* *tior,* obtulit victoriæ confessionem, maioremq; ejus læticiam quod cogi videretur. Itaque per Radulium, post Alexandrum, Valachia Principem, Vevellius iterum cum litteris, ad ferociorem quotidiano successu, Vladislaum, Hotkevicium, Lubomirscium, cæterosque Polonorum Primates, mittitur: qui, Epistolâ petitam pacem, ore persuaderet. Nec abhorrebant Sarmatæ, maxime ob Cosacorum penuriam famemq; solliciti. Placuit Jacobum Zelenescium, decora proceritate corporis, & prudenti animositate insignem, cum Vevellio, ad Osmanum remittere. Tum truces Turcarum, ipso veniente, vultus, verba, minæ, & alia plura, ad terrorem composita, quo Zelenescii animum, Polonorum consilia, ex perterrefacto ejus vultu verbisque, quoquo modo, colligerent. Cum vero imperterritus ille, nulla ad pavorem inclinancia responsa redderet, minus simulatione larvati, sincerius agebant. Et successisset, ut videbatur, negotium pacis, nisi intervenisset, quo Osmani, ex facili præsumptuo-

fior,

fior, animus, ad nova Belli consilia recruidisset.

Cum enim Karakassius Bassa, recentibus veteranorum copiis, ex Hungaria veniens, paucis, post Zelenescium, horis, castra Turcica intravisset, quia peritissimus Belli habebatur, & probatissimus miles palam audiebat, tantos, ex adventu ejus, Osmanus resumpsit spiritus, quasi jam debellasset, quos nunquam sine clade tentaverat. Itaque, quamvis nupera ignominia & re-  
*Graviss-* *ma, a Ka-* *rakassio* *Bassa, Pa-* *lonicorū* *castrorū* *oppugna-* *tio. 15.* *Sept.* *meritate doctus, non vovere, meminisse debuerat,* tamen iterum, cum ipso Karakassio Bassa, ad vota conversus, juramento se obstrinxere, *Nusquam se, nisi in expugnatis castris, cenaturos.* Adeoq; jam Osmanus, veluti eventus prosperioris certus, editiorem iterum locum ascendit, ex quo prospiciens pugnam, victoriæ speratæ deliciis frueretur. Omnia in contrarium cecidere: & Osmanus, pro imaginario lenocinio visus, non nisi oculorum & populorum suorum afflictionem ad animum retulit. Quippe Karakassius Bassa, cum exercitum Polonum corona cinxisset, bipartito impetu, ad Lubomirscianam portam, & Weieri Dönhoffiorumque Germanorum stationem ferebatur. Quippe pro uno Hermano Dönhoff, jam duo, Martiæ ejusdem familiæ, Germani fratres, Magnus, Ernestus, & Gerhardus, in præ-

in prælia succedebant; adeoque pro uno Dönhoff in acie nuper occiso, jam pari fortitudine, duo pro Republica dimicabant. Itaque Karakassius ab his magna clade repulsus, cum ex Hungaro transfuga, extenuata crebris eruptionibus Mossinii stativa intellexisset, illac violentia versa, per rumpere conabatur. Quod ut eo citius, & antequam succurreretur, fieret, Turcæ ex equis desilire iussi, intermixti peditibus pugnare. Aderat Karakassius, instabat, etiam in periculis exemplo præibat. Erat tum videre Vladislau Principem mediū inter Imperatorem, & militem, et, unā cum Lubomirscio, præsentia sua, & opportuno subsidio, milites animantem. Itaq; & ibi Karakassius cum clade repulsus, iterum in Weieri Dönhoffiorumque Germanicas cohortes, nunquam sine strage tentatas, vertitur. Et addit illum oppugnationi dolum, quo Stratagemate quodam recederet, & insequentes, & à lateribus, & à tergo concluderet. Et successisset fortasse, nisi contrario astu, Karakassii Bassæ fallaciam, Lubomirscius retulisset. Cum enim Weieri Dönhoffiorumq; Germanicæ copiæ, in dolosè fugientes, longius se concitassent, & Turcæ, flexis ad prælium equis, ab omni parte incumberent, Lubomirscius, circumactis quibusdam Sarmatarum turmis, Barbaros à tergo

tergo invasit. Tum vero acerrimum, & quale nunquam antea, prælium, præfertim subinde novas copias Principe Vladislao submittente. Itaque ipse tandem Karakassius Bassa, inter con-<sup>Karakassius Bassa occiditur, & Polonorum ingens vis floria.</sup> fertissimos pugnans, dubium à Germanis sub Weihero Dönhoffiisque, an Polonis sub Lubomirscio, sternitur. Quamvis non desint etiam qui à Lubomirscio propria manu interfectum, asseverent. Ut ut sit. Sensit ilico casum viri utraque acies; & quantum remittebant Barbari, Sarmatæ proficiebant. Novissime, fremente, de super omnia spectante Osmano, præceps Turcarum fuga & strages. Adeo ut, ad noctem usque, Sarmatæ Germanique trucidando fessi, sanguine hostium suorum, licet sitibundi, fatiarentur. Quantum apud Vladislavianos gaudium, tantum apud Osmanidas, ob quatuordecim millium fortissimorum militum, & ipsius Karakassii Bassæ jacturam, luctus & moeror. Præfectum hic Budæ in Hungaria egerat, & multa olim felicissime ausus, ad extremum, vicissitudine rerum, Sarmatis ad ignominiam fatumque patuit. Sed recte apud Senecam Diocles Carystius inquit. *Una est ad for-*<sup>Lib. 7. Centrov.</sup>

*nam securitas, non toties eam experiri.*

Verum-enimvero Osinanus, recenti hoc ac-

Q

cepto



*Osmanus* cepto vulnere, ad concordiam iterum propende-  
*pacem in-* bat: sed anxiam & labentem momentis ad diver-  
*ter & bel-* sam mentem, tum Regum omnium Principumq;  
*lum flu-* ad hujus, ab initio, tam formidabilis expeditionis  
*ctuat.* exitum; intentio oculique, tum sex annorum,  
 & amplius apparatus, sine ullo successu, Poloni-  
 corum castrorum scopulis illisus toties, cōminu-  
 tus, & prorsus inhabilis porro ad alia redditus, re-  
 tinebant. Projectas adhuc gazas prope infinitas,  
 & computum fere, in exercitum innumerabilem,  
 excedentes impensas considerabat.

*Cosaci* Dum hisce similibusq; Osmanus anxius, hinc  
*castris* inde fluctuat, geminum, sic jubente Vladislao  
*Turcis* Principe, rursus illi à Cosacis malum. Hi, bipar-  
*damnum* titis noctu copiis, medietatem adversus Turcarum  
*inferunt* vigiles locant, altera, per observata Tyræ vada, pu-  
*18 Sept.* betenus, nemine sentiente, in ipsa Turcarum ca-  
 stra transiere. Ibi, incisis tabernaculorum funibus,  
 somno sepultos suffocant, aut, tegumentis in ora  
 projectis, trucidant. Sic cedes, aliquamdiu, fre-  
 quens & magna, sine tumultu. Tandem, animad-  
 verso periculo, arma præparantibus Turcis, Co-  
 saci qui in hostium castris erant, illis qui adversus  
 vigiles extra præparati stabant, signum dedere:  
 quibus, signis & clamore reciprocantibus, conster-  
 nati in medio Turcæ, vigilesque ipsi, fugerunt, &  
 Cosa-

Cosacis, onustis Barbarorum spoliis, ad propria,  
 viam fecere. Idem, biduo post, noctu, rursus ab i-  
 plis, & feliciter æque tentatum. Tunc, per obser-  
 vata sibi vada, Tyram transcuntes, Taki Bassam,  
 Turcarum pontem, trans fluvium custodientem,  
 noctu invadunt, & omnibus, aut ferro, aut aqua,  
 necatis, ipsum Taki Bassam, in lectulo repertum,  
 occidunt: & spoliis Barbarorum graves, sine dam-  
 no, ad castra se sua recepere.

Hac duplici clade damnoque rursus irritatus  
 Osmanus, ne omnino contemptui haberetur, vin-  
 dicias meditabatur: præsertim cum Johannem  
 Carolum Hotkevicium, exercituum Generalem,  
 post novissimam suam victoriam denuo ægrotan-  
 tem, paulo post obiisse nuntiaretur. Hic enim,  
 cum instare sibi, commune omnibus nobis, fatum  
 adverteret, regimine & Imperio suo, in Stanisla-  
 um Lubomirscium Comitem Wisnicensem,  
 translato, ex castris, in arcem Hotimensensem, de-  
 ferri se jusserat, et, biduo post, solutus humanis  
 curis, inter mortales esse desierat. Magnus pro-  
 fecto Heros, gloriosissimus & victoriosissimus mi-  
 les, quod, inter cætera vel ex eo patet, quod in Li-  
 vonia ad Kirchholmum, tribus tantummodo suo-  
 rum millibus & trecentis, sedecim, sub Carolo  
 Sudermannia Duce, Suecorum millia, luce cla-

ra, marte aperto, acie utrimque instructa, fuderit deleveritque: Et jam novissime quatuor hastatorum signis, sex millibus Turcarum in fugam versis, quasi in triumpho suo conderetur. Cæterum <sup>rum Lubomirscii votum.</sup> Lubomirscius, si, confecto feliciter bello, ad propria victor reverteretur, templum vovit *Jesu Christo Salvatore*. Audivere Superi vocem, votique compos, solvit in Wisnicz postea, quasi commilitoni Deo stipendium.

Cæterum Osmanus, Hotkevicii morte, Polonos fore faciliores existimans, extrema tentanda duxit. Itaque quicquid virorum in castris & virorum erat, in aciem productum: tracta & in alteram <sup>Novissima Poloniarum castrorum oppugnatio.</sup> Tyræ ripam, Cosacis obversam, viginti quinque majora tormenta, additis Tartarorum circiter triginta millibus, ut, si occasio se offerret, in perturbatos, ut sperabant fore aliquando Cosacos, trajecto celeriter flumine, à latere inveherentur. Nonaginta circiter aliæ machinæ, obversæ castris. Tum vero ea rerum facies, ut ruere Cælum, & ipsa turbari elementa viderentur. Ipse Vladislai <sup>Vladislai Princeps virtus, & periculum.</sup> Princeps, ut præsentia sua aderat, & verbis milites, & factis, animabat, sine periculo, ea die, non fuit: nam & proximus illi, è custodia unus, tormenti ictu stratus laceratusque, & circumvolantia undique, & ad ipsos quoque pedes cadentia, è machinis

chinis grandioribus, tela, imperterritus risit. Quippe *arida*, ut Anneus, *est periculi virtus*, & *quot tenet De prodat, non quid passura sit cogitat: quoniam & quod vid. passura est, gloriæ pars est*. Ergo omni parte Osmanica vis circumfusa castris, quasi unum undique prælium faciebat. Sed hoc quoque Principis Vladislai felicitati fortuna indulsit, ut primus Turcarum impetus, à suis, sub Weiero, Dönhoffiisq; Germanicis legionibus, retonderetur. Inde in Lissovieneses, loco & munimentis inferiores, versa ferocia. In hos, torrentis instar, extremo conatu illati, pulsi, pellentes, nullo suorum cadentium metu, ferebantur. Perrumpere eorum munimenta, vallum ascendere, milites conturbare, audacia supina laborabant. Sed, quemadmodum nulla tempestas magna perdurat, ita quasi momento circumacta res est. Szembergus, haud procul vallo, repentina, editiore loco, munitionem extruxerat: hanc septam levi aggere fossaque, undique frondibus arboribusque texerat, ut objecta hostium oculis, speciem internatorum virgultorum redderet. Inde duo tormenta, & aliquoties denos pedites, ibi abscondit. Lubomirscius interim, ab omnibus cohortibus, decimo quoque abstrato, assumpta in super, è custodia Vladislai Principis, cohorte, laborantibus subveniebat. Sic alia <sup>Turcarum strages & Polonorum victoria.</sup>



quadam maiore violentia reiecti Turcæ, non suspectis Szembergii virgultis, tegere se & recolligere laborabant. Tum vero Szembergus in confertos tormentis detonuit, & ingenti glandium imbre inopinatos obruit. Erumpunt pariter, & ex insidiis, & ex castris Sarmatæ, intolerabili Turcis impetu, & miseranda Barbarorum strage. Adeo ut nihil jam, per mortuos, per femineces, per vulneratos, proficiens ad ulteriora fervor, nisi cedem, cruorem, & sanguine purpuratam humum faceret.

*Osmanus  
pacem  
petit &  
impetrat.*

Agnovit, hac novissima clade, inferiorem se Vladislao Principe, virtutique Polonicæ, Osmanus Imperator: & prosperiora desperans, Vevelium, ad pacem sincere petendam, & cum eo Zelenescium, quem hucusque detinuerat, remisit. Profecti Stanislaus Zoravinscius Castellanus Belzensis, & Jacobus Sobiescius palatinides Lublinensis. Quia autem in celeritate multum momenti erat, instrumentum, in quo conditiones conceptæ erant, ut signandas Senatoribus & Commisariis offerret, apud Andream Soldrscium Secretarij Regium, & Vladislai Principis Cancellarium, deposuere. Disceptatio diu tenuit, circa coërcitionem poenamque Cosacorum; pari pertinacia, quod in Cosacos Turcæ cupiebant, id in Tar-

taros

taros ut fieret, Sarmatis postulantibus. Quæ controversia, cum inexplicabiles utrinque exitus haberet, oblivione condonatis conscriptisque injuriis invicem, Sobiescius ad castra rediit, & instrumentum à Soldrscio, & à Lubomirscio litteras ad Osmanum accepit. Inde ambò Legati, in conspectum ejus admissi, post solita venerationis officia, & conditiones, & Lumomirscii litteras obtulere. Accepit Osmanus omnia, necessitate potius, quam aliqua bona voluntate ductus. Pax autem in antiquas fere conditiones convenit: nisi quod hæc, honorifica Polonico nomini adjicerentur. *Ut Constantinopoli Sarmatiæ Reges, more aliorum Regum Principumq., perpetuum Legatum haberent. Quemadmodum navigatione Borysthenis, Zaporovienses Cosacos Rex arceret; ita Casar quoque Tartaros Bialogrodienses, Tchinenfes, Kilienses, Dobruceses, & Crimenses, ab incursionibus contineret: nec ultra Otzakorum exire permetteret. Nullus deniq. ad Valachiæ Principatum, nisi initiali fidei lavacro tinctus, exheretur, nec ullatenus Turcicæ religionis admitteretur.*

*Conditio-  
nes pacis  
inita: An.  
1621.  
10. Oct.*

Ethic est finis famosiſſimæ per terrarum Orbem expeditionis; maxima Turcarum præsumptione susceptæ, majori ignominia finitæ. Præterquam enim quod sex annorum apparatus, im-

*Danma  
Turcarum  
ex hoc  
bello.*

men-

mentos deinde, & prope infinitos sumptus prodigissent, etiam Veteranorum militum, crebris hisce oppugnationibus, ultra centum milliū, totidem peste aliisque casibus, jacturam fecerunt & ignominiosis novissime conditionibus cum Polonis transegerunt. Incussa insuper Polonorum reverentia Turcis: adeoque Osmanus ipse,

Osmanus  
Vladislai  
Principis  
munere  
honorat.

ut Bzovius, Ecclesiasticus scriptor, refert, Vladislai Principis virtutem, æmulumque se superiorem agnoscens, ultro ipsi, legitimæ victoriæ præbæum, obtulit, missoq; ad illum Elephantem, pressam animo generositatem adoravit. Inde disceptatio de discessu fuit. Sed in hoc quoque tandem Vladislao Principi Osmanus cessit: & curvato, cum suis, dorso, valedicens, prior ex castris Constantinopolim abiit. Insuper sublicium pontem, per quem ad propria Poloni regrederentur, quasi demissioris animi monumentum, integrum reliquit. Interim lætitia & congratulatio in castris Sarmatarum ingens; qui protentis pileis, quoad oculis aspici poterant, Turcis valedicebant.

Vladislai  
victor,  
in Polo-  
niam re-  
dens, se-

Ut autem hoc gaudio Sigismundus Rex, & anxia hucusque Sarmatia frueretur, Vladislaus Princeps Andream Soldrscium Cancellarium, suum, ut victoriæ Lauream, pacisque palmam,

Sigis-

Sigismundo Patri ostenderet, in Poloniam misit. <sup>His con-</sup>  
Ipse paulatim sequebatur: & per congratulato- <sup>gratula-</sup>  
rias, quacunque transibat, Sarmatiæ universæ vo- <sup>tionibus</sup>  
ces, ad Patrem tandem, continuo velut trium- <sup>excipi-</sup>  
pho, pervenit. Quis huic tunc sensus fuerit, fa-  
cile est considerare. *Si enim* (ut Stoici similitudi- <sup>Epistol. 34.</sup>  
ne utar) *agricolam arbor ad fructum perducta dele-*  
*ctat. si Pastor ex fetu gregis sui capit voluptatem,*  
*si alumnus suum nemo aliter intuetur, quam ut ado-*  
*lescentiam illius suam judicet:* quid Sigismundo  
Patri evenisse credendum, qui Filium Vladisla-  
um, à se verbis sapius, ad fortitudinem, & ex-  
emplis instructum, ad tantos subito, de hoste  
tanto, triumphos, adolevisse videbat? Profecto  
cum Patri Filius vicisset, & Pater sibi de Filio, Patri  
omnes cōgratularētur, duplex videbatur, Domus  
unius, triumphus. Warsaviam autem, primariam  
Mazoviæ Urbem ingredienti, effusa in occursum  
promiscua hominum multitudo, ut nuper de a-  
bitu anxia, ita nunc gloriosissimum reditum,  
congratulabatur. Alij autem Patriæ conservato-  
rem, alij Sarmatiæ & Europæ universæ scutum,  
alij Herculem nova quotidie monstra debellan-  
tem, alij etiam Solem, magis magisque, virtutis  
sue radiis, Poloniam indies recreantem, prædi-  
cabant. Et postremi quidem non sine mysterio:

R

cum



cum oppositus gloriosissimus adolescens, Phœbi instar, Lunæ Turcicæ, obscurasset illam, lumine fortitudinis suæ, & horrendam ejus eclipsin, sua gloria causavisset.

*Osmanus, Constanti-  
nopolim re-  
versus,  
strangula-  
tur An.  
1622.*

Cæterum ut omnia Vladislao Principi fau-  
sta, & congratulationes ubique; ita Osmano, in  
contrarium, omnia infortunata, & tristia evenie-  
bant. Execrationes alibi, detestationes, & malè  
gestæ rei ordinarius comes, contemptus. Tum  
noxia adulationis & temeritatis suæ memorem,  
non moti tantummodo belli, sed ignominiosæ e-  
iam pacis pœnitebat. Præcipue autem mittendo-  
rum, ex Polonia Constantinopolim, Legatorum,  
ibique, aliorum Principum more, commorando-  
rum, eum pudebat. Ergo, ut composita turba-  
rentur, & Polonos desperatio mittendi legatos  
subiret, abire in Arabiam penitus, eoque sedem  
Imperii transferre meditabatur. Patuit fatale  
consilium Turcis. Itaque, majorum bellorum  
metu, ad palatium, Anno millesimo sexcentési-  
mo vigesimo secundo, conglobati, ne ipsis qui-  
dem foribus temperavere. Osmanus, per aver-  
sam Palatij portam, trepidus ad Ager Bassam, fu-  
ga elapsus, haud multum, imminens exitium, la-  
tebra distulit. Statim enim à Janizaris & alijs  
Turcis inventus, protractusque, plurimis vul-  
neri-

neribus concisus, confossusque est, vel, ut alii  
volunt, strangulatus. Mox eodem furoris  
cursu, Patruum ejus Mustapham, pacatio-  
ris ingentij virum, Cæsarem consalutatum,  
in solium ejus collocavere. Et sic Osmanus tan-  
dem, infelici expeditioni, & temeritati  
suæ, exitio suo paren-

tavit.

*Partis Primæ, Libri Secundi Finis.*



134  
G E S T O R U M V L A D I S L A I A V .  
G E S T O R U M  
V L A D I S L A I I V .  
P A R T I S P R I M Æ  
L I B E R T E R T I U S

C A P V T P R I M V M .

A R G U M E N T U M .  
V L A D I S L A I I V . P e r e g r i n a t i o .

S U M M A R I U M .

Vladislaus Princeps, pace foris domique parta, ut experientiam & usum sibi acquireret Anno 1624. ex Polonia ad Carolum Archiducem in Silesia: cum illo Viennam ad Imperatorem Ferdinandum II. proficiscitur. Ab Imperatore iterum in Bavariam ad Maximilianum Electorem: inde per præcipuas Germaniæ Urbes, salutato Colomensi Electore, Bruxellis descendit. Idem illi honor, qui olim Archiduci Alberto Belgarum Principi, exhibetur. Bruxellis deinde, per Mechliniam & Antuerpiam, in castra Bredaica profectus, omnia munimenta & propugnacula videt. Spinola directionem exercitus in manus Vladislai depont, & illi ad mensam inseruit. Omnibus perlustratis,

P A R T I S P R I M Æ L I B E R T E R T I U S  
135  
tis, Bruxellas rediens, Sereñissima Infanti valedicit, & ab aulicis ejus ad extremos Belgij fines deducitur. Per Mediomatrices & Lotharingiam, in Alsatiam ad Archiducem Leopoldum ascendit. A quo maximo in honore habitus, cum Argentoratum excurrisset, per Basilicam & Helvetiam, Mediolanum, Genuam, Parmam, & alias Italiæ Urbes, Loretum profectus, S. Vladislai statuam auream offert. A Summo Pontifice litteris Romam invitatus, ibi summo in honore à Pontifice habetur. & Carolo V. equiparatus. S. Veronicam visitans, Sacrosanctam Christi faciem populo visendam exhibet.

I Am pace domi forisque parta, non erat in Polonia ubi fortitudinem suam Vladislaus Princeps, ubi virtutem, & suam bellicæ rei scientiam, cum utilitate exereret. Non erat ubi docere ipse aut discere quicquam posse videretur, cum omnia, quæ Sarmatiæ universæ erant, jam à crepundis cognovisset, & pacem undique fortitudine sua stabilivisset. Quid ergo? Pronum erat, Polonia feriente, in male occupatorum mores degenerare. Mobilis enim & inquieta mens homini data est. Nunquam se tenet, spargitur, & cogitationes suas in omnia nota atque ignota dimittit, vaga, & quietis impatiens, & novitate rerum letissima.



Sed Regiæ indolis adolescens, ne vili otio plebeis vitiiis occasionem faceret, ut ad maxima & egregia natus, ita ad sublimiora & honestiora animū vertit. Cum enim rerum administrandarum gubernaculis destinaretur, in mentem experientia veniebat, quæ, necessariam Reipublicæ clavo, prudentiam consummaret.

*Vladislaus Princeps, ut experientiam sibi compararet, peregrinari constituit*

Cum autem variæ, ad illam sociam sibi acciscendam, viæ occurrerent, nulla tamen securius expeditiorque visa est, quam ea, quæ, peregrinatione facem præferente, ostentatur. Ita enim Sapientissimi quique: Plato in Ægyptum & alias terras: Solon in Asiam, Ægyptum, & Indiam: alii in Chaldæam, Assiriam, & ad Brachmanas se contulerunt, ut sapientiam, experientiam, & usum acquirerent. Hos tantos viros Vladislaus Princeps sequi voluit: & peregrinationem totā mente complexus, Germaniam, Belgium, Italiam peragrarē: variorum Principum, Gentium, Urbiumq; mores cognoscere: & obsidionem Urbis Bredanæ, per universæ terrarum spatia famosam, in qua omnes Mavortis artes, & industria omnis, quasi in compendio, à prudentissimo, tum temporis, Imperatore, Marchione Ambrosio Spinola, delineata erat, lustrare in animum duxit. Insuper avunculi Cæsaris Ferdinandi II.

Maje-

Majestatem: Isabellæ Claræ Eugeniæ, Infantis Hispaniarum, Belgarum Principis, & consanguineæ suæ magnificentiam & moderationem: & Summi Pontificis culmen venerari. Denique invisere nucleum terrarum Orbis: antiquitates advertere: rerum naturæ præclusa rimari: &, solerti oculorum mentisque indagine, secretiora videre. Ad hæc enim *curiosum nobis natura ingenium dedit: & artis sibi & pulchritudinis suæ conscia, spectatores nos tantis rerum spectaculis genuit, perditura fructum sui, si tam magna, tam clara, tam subtiliter ducta, tam nitida, & non uno genere formosa, solitudini ostenderet. Ut scias illam spectari voluisse, non tantum aspici, vide quem nobis locum dederit. In media nos sui parte constituit, & circumspectum omnium nobis dedit: nec erexit tantummodo hominem, sed etiam, ut ab ortu sidera in occasum labentia profsequi posset, & vultum suum circumferre cum toto, sublimē fecit illi caput, & collo flexibili imposuit.* Ergo naturæ ductum & instructionem Vladislaus sequi voluit, & originis finisq; sui memor, in quem venerat, in quo vivebat, famamque nominis sui, crebris, è Moscovitico, Tartarico, Turcico hoste victoriis dilatabat. Mundum videre decrevit, & naturæ, ut natura voluit, mysteria & sacramenta scrutari. Sed nonnullam flagranti desiderio

moram,

moram, reluctantis Sigismundi Parentis cura faciebat: quæ tamen ipsa tandem, prævia deliberatione adulta, in consensum prudenter desit.

Et jam nulla nisi de comitatu cura restabat: quæ tamen non diu anxios sollicitosque, in tanta Nobilissimorum Sarmatiæ virorum adolescentumque copia, Serenissimos Parentem Filiumque torfit. Inprimis Alberto Stanislao Radzivillio, Sac: Rom: Imp: Principi, Duci in Olica & Nieswieß, Supremo Mag: Duc: Lithvan: Cancellario, totius itineris rei; directione deferre placuit: qui & hanc Provinciã libens in se suscepit. In viæ comites Stephanum Pacium Mag: Duc: Lithu: tunc Notarium, post Vicecancellarium, & Lucam Zolkevi-um Capitaneum Calusiensem assumere visum est. Deniq; Adamus Kazanovius, Marschalcus modo Aulae Regiæ, & illius fortissimi belli Ducis Marini Kazanovii ex fratre nepos: Gerhardus Dönhoff, in Sac: Rom: Imp: Comitum postea elevatus, Castellanus Gedanensis, Capitaneus & Oeconomus Regius Mariæburgensis, Coszerinensis, Felinensis, Ludzinensis Præfectus, & totius Prussiæ Commissarius Generalis Bellicus, milos paulo ante in Valachia, sub Vladislao Principe, fortis & felix, qui Thorunnio adversus vim Suecicã Romanam virtute servato, Ducis Brigenfis Filiam Conjugem duxit:

Samuel

Samuel Rylscius Capitaneus nunc Rabstienensis, Reinoldus von Rosen, & Nicolaus Piglovius, Vladislai Principis cubicularii fuere.

Hac nobilissima Illustrissimorum virorum, <sup>Varfa-</sup> <sup>via disce-</sup> <sup>die Anno</sup> <sup>1624.</sup> juvenumq; catervã stipatus, Vladislaus Princeps, cum Annum ageret Orbis, post Christum natum, 1624. 17. die Maij, hora ante meridiem decima, 17. Maij. iter suum feliciter auspicatus est, nullo quidem, ante se Principum Polonorum exemplo, quo subsequen- tibus se ipsum poneret primus in exemplar. Ergo facta Serenissimis Parentibus valedictione, osculisq; manuum Regiarum, à præfato itineris comitatu, expeditis, Warsaviæ, è conclavi regio, à Serenissimis fratribus ad currum usq; deductus est. Quem proficiscentem Rex & Regina, è fenestra Palatii, ultra etiam quam oculis assequi poterant, faustorum omnium appreciatione prosequiebantur.

Cæterum cum Vladislaus Princeps, ad ambig- <sup>Czestochovia</sup> <sup>Euchari-</sup> <sup>stie Sa-</sup> <sup>cramen-</sup> <sup>reficitur</sup> <sup>22. Maij.</sup> <sup>famo-</sup> <sup>rum</sup> <sup>bellorum</sup> <sup>tumultibus</sup> <sup>Germaniam</sup> <sup>profici-</sup> <sup>sceretur</sup>, antequã Paternum Regnum desereret, gratiam opemq; divinam implorandam censuit. Itaq; recta Czestochoviam versus, in utriusque Polonici Bohemiciq; Regni limitib; iter direxit; ut poenitentia & Euchari- stia Sacramento reficeretur, & locum miraculosa D. Virginis imagine

S \*



famofum, magna cum reverentia vifitaret. Per-  
venit illac 21. Maij circa meridiem, & fequenti  
die, voti compos, cum plerisque è comitatu fuo,  
facaſynaxi reſectus eſt.

*Niſſam,  
ex impro-  
viſo, ad  
Archidu-  
cē Caro-  
lum venit  
24. Maij.*

Tum vero à Dño Wolecio Marſchaleo Regni  
(qui ſalutandi invitandique gratia ad ipſum ex-  
currebat) compendioſiore demonſtrata via, ante  
meridiem adhuc Lublinecum, primam hoc tra-  
ctu Siſeſiæ civitatem attingit, & Caroli Archiducis  
metropoli Niſſæ paulatim appropinquavit. Quod  
ut ſenſit Archidux, ad recipiendum magna cum  
gloria Principem multa moliebatur: ſed quæ o-  
mnia Vladislaus Princeps, jucundo Stratagemate  
quodam, deſtruxit. Cum enim Krapkoviciam  
perveniret, interceptis ubiq; Caroli Archiducis  
exploratoribus, & ſingulari cura detentis, quo  
famam adventus ſui preveniret, hora duodecima  
noctis, Niſſam magna celeritate perrexit. Et tam  
felicitèr quidem, ut hora octava mane prius Niſ-  
ſam ingrederetur, quam venire nuntiaretur. Ip-  
ſum Archiducem, nihil min⁹ quam de adventu  
ſuo cogitantem, in templo offendit; adeo novita-  
te rei attonitum, ut illuſionem ſuſpicaretur. Per-  
acto interim mutuæ ſalutationis officio, Sacro au-  
diendo vacatur. Inde ab Eccleſia ad arcem pran-  
diumque tranſitum eſt; ſæpius Archiduce inge-  
minante,

minante, ut Polonia Princeps tractationem tu-  
multuariam boni conſuleret; ſibi enim videri, ſe  
modo hoſpites non habere, cum per januam re-  
ctam non intraverint; adeoque pœnitentiam cul-  
pæ, ob impeditum occurſum admiſſæ, prandii te-  
nuitate explerent, in craſtinum omnia cumulatius  
affutura. Cæterum Archiduce poculum vini, in  
ſanitatem Polonia Regis, Regina, & Vladislai  
Principis exhauriente, tormentorum exploſioni-  
bus aër ſemper intonuit. Subſequentibus deinde  
aliquot diebus, in diverſis plerumque jucundiſ-  
miſque locis (quo alia aliaque, inter reſectionem  
quotidianam, novitas oculos animumque paſce-  
ret) prandium ſumptum, in quorum uno paraſy-  
tus Caroli Archiducis, octo piſces vivos, ſingulos  
ſeparatim, ſpectantibus ſereniſſimis, deglutivit.

Inde cum ad umbilicum uſque Junii, veſtes  
aliæ, ad earundem quas adituri erant, gentium  
mores modumque prepararentur, Vratiſlaviæ per  
otium videndæ, Vladislaum Principem cupido in-  
vaſit. Itaque 8. Jun: Cum pacio, Zolkevio, Dön-  
hoff, & Kazanovio (quibus toto hoc itinere fami-  
liarius uſus eſt) crepuſculo matutino, illac igno-  
tus diſceſſit. Hoc enim propoſitum erat Sereniſſi-  
mi Principis, toto itineris tempore, non noſci, ad-  
q; & fictitium nomen aſſumpſerat, ut commo-  
dius

*Vladisla⁹  
Princeps  
Vratiſla-  
viam ex-  
currit, 8.  
Iunij.*

dius Vladislai nomen & persona lateret: tum ut splendore nominis sui suppresso, præparatos hominum plausus declinaret, & omnium, victorias ejus mirantium & celebrantium, oculis ad verecundiam toties non sollicitaretur. Sed quemadmodum dies splendorem Solis, nubibus licet densis obscurati, demonstrat; ita evibrati, Serenissimi Vladislai Principis, virtutum radii, nullo non loco præsentiam ejus patefecerunt. Certe Vratislaviæ statim, in ipso templo, dum interesse sacrificio missæ cogitat, à militibus, qui in expeditione Valachica stipendia sub ipso meruerant, notatus fuit: quorum oculis sese caute subduxit, ut concursum curiosæ turbæ vitaret. Lustratis deinde omnibus, quæ oculos ejus merebantur, Nissam rediit.

Et jam, præparatis omnibus, destinata profectiōni dies 14. Jun: aderat: cum Archidux Carolus Vladislaum Principem Viennam usque comitari decrevit; et, nequicquam renitente Serenissimo Poloniæ Principe, adimplevit. Cum autem prope Viennam essent, placuit Serenissimis, eodem, quo Vladilaus Princeps nupér, Stratagemate, adventus sui famam prævenire: Itaque uno solo curru vecti, duobus quemque comitantibus famulis, Viennam properavere. Successit amœnissimus do-

lus.

lus. Tantum enim à fama venientium aberat, ut eadem die Imperator cum Imperatrice, in Suburbanos hortos, animi gratia, concesserit. Læti tam prospero successu Serenissimi, cum Viennam jam fefellissent, eodem, ad fallendum Imperatorem, cursu festinabant. Et eadem vespere, equis concitari jussis, Imperatorem & Imperatricem, cum impetu venientis rhedæ strepitu in eventum arreptos, ex improvviso salutavere. O quis tum stupor! quæ gaudia! quæ mutuæ benevolentiae signa! Ruebat in alterius alter amplexum, & inter mutuas congratulationes, & varia mutui affectus Symbola, Viennam Palatiumque Cæsarium ingrediebantur: In quo, post biduum, Serenissimus Poloniæ Princeps, comitantibus, Radzivillio Duce, D. Pacio, & D. Zolkevio, ab Imperatore, Imperatrice, Cæsarea prole, Carolo & Leopoldo (qui sub hac Viennam venerat) Archiducibus, in sanctiorem Domus Austriacæ thesaurum deductus est, & coacervatis à tot Imperatoribus Archiducibusque; tot annorum felicitate, divitiis, cum variis stupendisq; raritatibus, & incomparabilibus naturæ artisq; miraculis, ipso Imperatore omnia monstrante & explicante, lustravit.

Inde cerratim Regum Principumque Legati Poloniæ Principem visitavere: & una quidem ea-

Varie Legati Vladislaum

S 3

dem-



*Principē  
invisum.  
a. s. l. m.* demque die, Dn. Carapha Nuntius Apostolicus:  
Comes de Ognati Regis Hispaniarum Legatus: &  
Dn. Altovitius Legatus Magni Hetruriæ Ducis.  
Sequuta porro quotidiana tripudia, hastiludia,  
jaculationes ad scopum, venationes, & exercita-  
tiones aliæ, ad honorem Principis institutæ. Quæ  
plerumque etiam, ipso Serenissimo Principe bra-  
bæum anhelante, in ipsius gloriam desierunt. Una  
præcipue chorea figurata, ab Imperatrice, & quin-  
decim ex ejus gynecæo Domicellis, partim solu-  
tis, partim conjugatis instituta, plerorumq; spe-  
ctantium animos in stuporem traxit. Ad illam  
cum promiscue homines cursitarent, facta per cō-  
clave Imperatoris via, nemo, nisi quem Impera-  
tor ipse januæ astans voluisset, aut Vladislaus Prin-  
ceps, penes Imperatorem janua tectus, ex suis esse  
suggessisset, intromittebatur. Multi in hac solen-  
nitate ornatum, plures saltantium Domicellarum  
decus & agilitatem, plurimi doctissimum ad nu-  
meros alterno pede motum, suspiciebant. Omni-  
um vero judicio, gratia, arte, dexteritate, palmam  
Serenissima Imperatrix meruit. Hoc absoluto sal-  
tu, & decantatis Serenissimorum, Imperatoris,  
Vladislai Principis, & utriusque Archiducis lau-  
dibus, reliqua pars mediæ noctis honori Sarmat-  
arum impensa est: cum ipsa Imperatrix, pleros-  
que

que è Serenissimi Principis comitatu, & in primis  
Radzivillium Ducem, ad choreas Ordinarias se-  
cum ducendas, invitavit, saltaveritque.

Cæterum Vladislaus Princeps, multis die-  
bus, & affectui, & amoris mutuo, & hilaritati im-  
pensis, cum à febris (in quam summo omnium, &  
vel maxime Imperatoris, cum dolore, inciderat,  
& diebus aliquot decubuerat) convaluisset, ad  
promovendum, in ulteriorem Germaniam, iter,  
se præparavit. Et Imperator quidem diutius  
præsentiam ejus anhelabat: sed votum ejus intra  
resolutionem Vladislai Principis erat. Itaq; cum  
ulterius præsentia ejus frui non posset, cum Se-  
renissimis filiis, & Archiduce Carolo, Vladislaum  
Principem, Vienna discedentem, ad medium  
milliare, extra Urbem, honoris gratia comitaba-  
tur. Cui cum vices Poloniæ Princeps rependere  
vellet, ante se Imperator loco movere non voluit,  
quam, valedictione peracta, mixtisque comple-  
xibus, Princeps abiisset.

Reliquerat profecto magnum desiderium  
sui, & famam virtutum suarum non exiguam, Vi-  
ennæ, Vladislaus Princeps: cum omnes summam  
ejus in armis dexteritatem, in congressu mansue-  
tudinem, in colloquio affabilitatem, in rebus o-  
mnibus prudentiam admirarentur. Adeoq; &  
sibi

*Impera-  
tor, Vla-  
dislaum  
Principē  
disceden-  
tem, ad  
medium  
usq; mil-  
liare, de-  
ducit 15.  
Junij.*

*Virtutes  
Vladislai  
laudata,  
& Prin-  
cipum er-  
ga illum  
studium*

sibi gloriæ singuli Magnates duxerant, si ejus humanissima conversatione, vel minimo tempore, frui contigerat. Sed & fama tantarum virtutum (præter eam, quæ Moscoviticis, Turcicis, Tartaricisque triumphis, jam antea omnium animos occupaverat) Viennâ, in Germaniam reliquam, admirabili celeritate proficiscens, omnium affectus & curiositatem magis, ad recipiendum videndumque tantum Principem, erigebat. Quapropter ut primum præsentiam ejus, ab Austria in Imperium ascendentem; Germania animadvertit, tota quodammodo ad salutandum, congratulandum, invitandum, & venerandum commota est. Adeo ut (quemadmodum Cicero se Italiæ humeris, ab exilio, in Urbem Romanam, delatum gloriabatur) meritissimo jure, Germaniæ, Imperiiq; Romani Electorum, Ducum, Principum, Comitum, Magnatum, Urbiumq; liberarum congratulationibus, celebrique comitatu, Bruxellas in Belgium, ad Serenissimam consanguineam suam, Isabellam Claram Eugeniâ, se deductum gloriari possit.

At, ne exaggerare rem videar, studium omnium erga eum Linzium proficiscentem, videam?  
 Linz. ex Antequam eo veniret, jam & curiosa artificum  
 pictura Vienna manu Viennæ depictus, & eorum, qui eum ibi  
 missi ag- noscitur, cognos-

cognoverant, descriptione, ita erat Linzii deli-  
 neatus, ut cum Urbem, famulantium turbæ im-  
 mersus, ingrederetur, & se à nemine cognitum,  
 iri existimaret, jam & à Capucinis, & Societatis  
 Jesu Patribus, directis in eum, summa ipsius cum  
 admiratione, oculis, salutaretur. Cum Salisbur-  
 gum deinde, 23. Julij, sub crepusculum vesperti-  
 num intraret, statim ab Archiepiscopo salutatus,  
 in sequentem diem, ad Palatium & prandium hu-  
 manissime invitabatur. Quo, sequenti die, rega-  
 liter absoluto, extra Urbem eremitoria, hortum  
 Archiepiscopalem, Salientium aquarum fontes,  
 magna cum voluptate, illustravit. Ad Palatium,  
 horto vicinum, cum transisset, Archiepiscopo su-  
 perveniente, in eo, ex selectissimis, quibusvis con-  
 fectionibus, collationem sumpsit. Altera subse-  
 quenti die, audito in sacello Archiepiscopali Sa-  
 cro, & alio, extra Civitatem, per amœno superbo-  
 que Palatio visitato, comitantibus Archiepisco-  
 pi Commissariis, propositum Poloniæ Princeps  
 iter prosequabatur. Sed, ecce, vix aliquot millia-  
 ria processerat, cum in Petingenſi Pago, Bavarici  
 Electoris Commissarii obviam venire. A quibus,  
 nomine ejusdem Electoris, invitatus, Monachi-  
 um cum eis intravit. Et aberat tum quidem Ele-  
 ctor, gravissimorum negotiorum causa, Noriber-

Et salutatus  
 Jul. 19.

Salisbury  
 gi ab Ar-  
 chiepiscopo re-  
 galiter tractatur  
 24. Jul.

Ab Bava-  
 ricæ Ele-  
 ctore in-  
 vitatus  
 Monachi-  
 um intrat.  
 28. Jul.



gæ, cum Moguntino Electore occupatus. Tamen  
ejus nomine Marschaleus Curia Baro Teringius,  
cum majore aula Bavaricæ nobilitatis parte,  
multis curribus, extra portas, in occursum pro-  
diit, et, honoris gratia, Vladislaum Principem,  
nitidissimam (ut fama refert) Germaniæ Urbi-  
um, Monachium introducit. Quænam ibi tum  
gaudia, qui concursus, quæ vociferationes curi-  
osi & promiscui vulgus, nemo facile dixerit. Ex-  
civerat Serenissimum Ducem Guilielmum desi-  
derium videndi Poloniæ Principis, Ratisbonæ,  
ex cellulis Carthusianorum. Hic, cum Serenissima  
Electrice, Vladislaum Principem, singulari læti-  
tia & humanitate, in Palatio excipiebat; & ab  
utroque, ad conclave suum, omni apparatus  
splendore instructissimum, deducebatur. Nil  
magis autem comitatum ejus, quam Palatii, &  
potissimum Salæ, camerarumq; Imperialium,  
magnificentia, superbiaque, in admirationem  
rapuit. Nec mirum: cum nihil hisce, tota Ger-  
mania, simile reperiri, perhibeatur.

Maximi-  
lianus E-  
lector Mo-  
nachium  
veniens,  
Principem

Maximilianus Elector, ut primum Poloniæ  
Principem sua subiisse lecta comperit, aut suspē-  
sis, aut expeditis negotiis, Monachium propera-  
vit, et, circa horam noctis undecimam, post bi-  
duum adfuit: & mane statim Principem Vladis-  
laum

laum adire, salutare, felicemque adventum con-  
gratulari, non destitit. Ad comites quoque Ele-  
ctoris benevolentia sese extendit: quibus singu-  
lis humanissime dexteram osculandam præbuit.  
Et prandium cum Vladislao Principe, in illo an-  
tiquario suo sumpsit, quo pulchrius aut curiosius  
aliquid, oculis videri posse, quivis merito dubi-  
taverit.

Reliqui, usque ad albitum, dies, armamen-  
tario (in quo, præter magnam copiam tormien-  
torum, ingens eorum multitudo, quæ ex prælio  
Pragenfi, aliisque locis, à victore Maximiliano,  
huc translata fuerant, videbatur) domo, in qua  
rarissima naturæ & artis opera asservantur: sacello  
illo intimiore, quod *Virginū Principi salutata, Ge-  
nitrici Genitoris sui jam geniti gignenti sacrum, dica-  
tumque*, & totum quasi ex auro, adamantibus, &  
lapidibus aliis pretiosis, compositum constru-  
ctumque est; & similibus aliis perlustrandis, ab-  
sumpti. Quibus visis, Vladislaus Princeps, Augu-  
stam vindelicorū pergere meditabatur. Maximi-  
lianus Elector, cū Principem ab honesto propo-  
sito dimovere non vellet, generosissimo illū equo,  
pretioso ephippio phalerisque superbo, donavit.  
Itaque Princeps, Electrice, & Guilielmo Duci,  
valedicens, cum Electore Starenbergam abiit:

Vladisla-  
us Maxi-  
miliano  
Electori  
valedicit  
7. Aug.

ubi, sequenti die piscatione & venatione recreati, ab amplexibus, in diversa viarum, divulsi, invicem valedixerunt.

Augusta  
Vindelico-  
rum m.  
17. 11. 8.  
Aug.

Et Vladislaus Princeps quidem, Augustam Vindelicorum, sub Vesperam sequentis diei ingressus est. Quem ubi advenisse Magistratus advertit, summo mane, honorarium vinum offerens, salutavit. Inde quicquid in civitate præcipui, aquariam machinam, templum & reliquias S. Udalrici, armamentarium, Fuggerorum domus, stabula, & equos lustraverunt. Aderat ipse Dominus Fuggerus, & Poloniae Principem salutatio, ipsum cum toto comitatu suo, ad cenam nocturnasque choreas invitavit. Acquievit Princeps, & cenam cum ipso, uxore, & sorore ipsius sumpsit. Cum vero, absoluta cœna, ad amplissimam salam deduceretur, expectantes ibi musicos, & avidam cum tanto Principe saltandi virginum, Patritiarum turmam, veterum more, albo vestitam habitu, simplicitatem prioris seculi referentem, offendit. Nec abnuitt omnino Vladislaus Princeps: sed septem aut octo gyros choreales absolvit, ne ipsarum penitus desiderium contempnisset videretur.

Noriber-  
gam m-  
greditur.  
24-Aug.

Augusta Vindelicorum Poloniae Princeps, per Donawerdam, Noribergam profectus est. Et hanc

hanc quidem, mediocri promiscui vulgus concursu, intravit. Cum vero sequentis diei mane, Teutonici Ordinis Commendator, quatuor curribus Principem, ad domum Teutonicam, Missæ audiendæ gratia, deduceret, tanta hominum, Poloniae Principem videre desiderantium multitudo confluit, ut tectis, domibus, & plateis occupatis, vix homines hominibus cederet, & via vix curribus rotisque pateret. Addidit, audito Sacro, Magistratus Principi Syndicum Urbis, ut Senatoriam Domum, armamentarium vetustate, magnitudine, & multitudine armorum celebre, arcem insuper sive castrum, commodius meliusque lustraret.

His magni nominis Urbibus prælustratis, per Herbipolim (à cuius Episcopo summo in honore habitus fuit) Hanoviam, & Francofurtum ad Mœnum, Moguntiam navigavit. Et aberat tum quidem Moguntinus Elector, quare à famosissimo, ob eruditionem & eloquentiam Viro, Patre Maximiliano Sandro, Societatis Jesu nomine, salutatus, ad eorundem collegium visitandum, invitabatur. Et Vladislaus Princeps, gravissimi viri eloquentia, in assensum tractus, humanissime acquievit. Visitatione vero prandioque peracto, Schapha cum suis Rhenum tentavit. Sed nobi-

Moguntiam 25.  
Aug.



In Rheno  
pericula-  
tur.

nobilissimus Germaniæ fluminum, vehementia  
venti, in procellas altiores actus, non sine periculo  
Principis & sociorum ejus, intumuit. Adeo ut Vla-  
dislaus Princeps, mores ejus, in perniciem navi-  
gantium proniores, abhorrens, in proximo, uno  
à Moguntia milliari, pago, reliquum istius diei  
noctemque quiesceret, usque dum insidiosa tem-  
pestas desavisset. Et favere Coelites. Altera enim  
lætior sereniorque dies erat, & Rheni mira quies,  
mira malacies. Verissimūque illud apparuit, quod  
Anneus. *Nulla tempestas magna perdurat. Procellæ  
quanto plus habent virum, tanto minus temporis.  
Venti cum ad summum venerunt, remittuntur omni  
violentia. Neesse est ista concitatione in exitum sui  
tendant.* Ergo felices illas ad Rhenum terras, viti-  
feros illos ab utroque latere montes, & vestita pa-  
gis littora, undique uvas & vinum offerentibus  
accolis, securi & maxima cum voluptate, præter-  
navigavere. Bacharaci (ubi præstantissimum  
Rhenense vinum nasci dicitur) à Geldriæ & Pa-  
latinatus Governatore, Verdugio, magno tor-  
mentorum boatu, & lautissimo prandio, Polo-  
niæ Princeps excipiebatur. Cum deinde castrum  
Pfaltz (vet<sup>9</sup> quædã arx est & turris, rupi, medio  
injectæ Rheno, superstructa; quæ toti deinde Pa-  
latinatui nomen dedit) curiosius perlustrasset, &  
reascen-

Lib. 7.  
Natur.

Feliciter  
navigat.

reascens navibus Boppardium versus vela face-  
ceret, Trevirensis Electoris Commissarii, alia o-  
neraria rate occurrentes, ipsum, Archiepiscopi  
Domini sui nomine, confluentiam in Palatium  
Archiepiscopale, hac nocte diverteret, rogave-  
runt; quo, importunitatis evitandæ prætextu,  
nonnihil reluctante, illi navem suam Sarmaticæ  
navi colligantes, simul perrexere, dicentes eam  
esse Domini sui voluntatem.

Cum inter mutuas colligatarum navium ci-  
vilitates, tribus enavigatis milliariibus, ad civita-  
tem applicuissent, ecce alius, & alius honor. Sta-  
bant, in arma coacti, toto littore, longo ordine  
cives. Arcensia tormenta omnia, iteratis vicibus,  
magno fragore reboabant. Ipse Archiepiscopus  
Electore in porta (quæ tamen prope Palatium  
erat) excipiebat. Et, Electore Sarmatas in Pala-  
tium deducente, festivis, à tergo, cives explosio-  
nibus prosequiebantur. Tum vero, cum Palati-  
um subiissent, proluxiora adhuc Electoris, erga  
Principem, benevolentia studia: & in cœna, sex-  
centis luciniarum ferculis sumptuosissima, non  
extrema musica, dum corpus reficeretur, aures  
demulcebat.

Conflue-  
tia, ab E-  
lectore  
Trevir-  
si, mira  
humani-  
tate ex-  
cipitur.  
24. Aug.

Nec tamen hisce terminis, officiositas Archi-  
episcopi, circumscribebatur. Ut primum enim,  
ex

officiosus  
Electoris  
Trevirensis  
fidelis.

ex vicinis Sarmatiæ Regnis, Phœbus faciem suam ostendit, quasi nihil egisset, ad nova beneficia sese composuit. Initium autem à sacris faciens, Sancti Sebastiani Craneum, ad osculandum Poloniæ Principi, & universo comitatui ejus, propria sua manu porrexit. Inde ad jentaculum invitavit; sed Vladislao Principe omnino renuente, mixtis invicem amplexibus, valedixere. Putabat Poloniæ Princeps, jam sese Archiepiscopi Electoris benevolentiae retibus explicuisse. Sed invenerat astuta humanitas ejus, quo ulterius obsequiis suis, jucundo Stratagemate, Princeps navigaret. Navem propriam suam, esculentis, poculentis, rebusque necessariis omnibus, tanto Principe dignis, ad abundantiam instrui jusserat. Tum Commissariis suis, ut non uno verborum lenocinio, Poloniæ Principem, nihil hujusmodi opinantem, in illam pellicerent, imperarat. Quid faceret Princeps? Navem ingressus est. Non ante autem officiose circumventum se vidit, quam, dum

*terraeque Urbesque recedunt,*

Strata à Commissariis mensa, sumptuosum jentaculum apponeretur. Tum risus, joci, sales; quibus adeo Vladislaus recreatus fuit, ut instructum postea, eodem modo, prandium non averfaretur.

At

At jam vix milliaria pauca procefferant, cum Serenissimi Electoris & Archiepiscopi Colonien-  
sis Commissarii, Dominus Crivellius, cum aliis  
tribus, occurrerent. Salutabant illi, Domini sui  
nomine, & humanissime invitabant. Prorsus quasi  
ex composito, Poloniæ Princeps Vladislaus, ab Ar-  
chiepiscopis & Electoribus invicem in manus tra-  
deretur. Quin immo & Elector, cum Alberto Du-  
ce fratre suo, Vladislaum Principem, secundo flu-  
vio descendente, ad ripam Rheni, curribus,  
rhedis, & equis, expectabat. Grande piaculum  
fuiſſet tantum Electorem transiſſe; humanitatem  
ſpreviſſe, nefas. Quid ergo? Relictis navibus flu-  
ctibusque, prævia salutatione & amplexu, terram  
iterum & currus ascendunt. Ubi in late patentem  
campos ventum, venatio placuit. Qua recreati  
Serenissimi, repetitis curribus, Bonnam intrave-  
re. Ut primum autem cataractas portarum tran-  
sire, ejusmodi ingentium machinarum fragore  
salutati fuerunt, ut rumpi cœlum, moveri terra,  
& omnia misceri elementa viderentur.

Altera mox die, generosissimus Dominus  
Adolphus Wolff Metternich, Serenissimi Wolf-  
gangi Guilielmi Neoburgici, Juliæ, Cliviæ, Mon-  
tium Ducis Commissarius, litteras humanitatis &  
otiosi plenas, Serenissimo Vladislao Principi tra-  
didit.

Ab Ele-  
ctore Co-  
lonienſi  
Bonnam  
introdu-  
citur. 25.  
Aug.

Neobur-  
gici litte-  
ra ad Vla-  
dislaum  
Principē.  
26. Aug.



didit. Desideraverat Serenissimus ille Dux facient Vladislai Principis: sed prægnantibus causis urgentibus, in Hispaniam, paulo ante, discesserat. Non omne tamen officium secum trahens, has tradendas Serenissimo Poloniæ Principi, litteras, in amoris & affectus Symbolum, Dusseldorpii Commissario suo, reliquerat. Est enim ille Dux, si quis alius, benevolentiae & humanitatis eximia; adeo ut, sicut omnium aliarum virtutum ergo, ita hac quoque ex parte, tota passim Germania celebretur. Quare & Commissarius ejus, ad mentem Ducis sui, non ante à latere Principis Vladislai abivit; quam eum Bonna, ad ipsos Brabantiae fines, obsequij & observantiae ergo, deduxisset.

Cæterum (ut ad Vladislaum Principem, Electorem Coloniensem, & Albertum Ducem, Bonnae se mutua praesentia exhilarantes, revertamur) post prandium insequentis diei, placuit industriae Batavicae monumentum, pilei Sacerdotalis (germanice *Pfaffen Mütz*) fortalitium perlustrare. Est autem illud in Insula Rheni, æquali propè divortio, à continente divisa, munimentum, & apparet à longè spectantibus, prorsus inexpugnabile: quod tamen, sub Henrico Montensi Comite, partim Hispanicis, partim Ducis Neoburgici, copijs, jugum admisit. Totum pomeridianum tempus

curio-

curiositas illa consumpsit. Postquam vero, omnibus perlustratis, Bonnam reversi sunt, generosissimo equo, phaleris & Ephippio pretiosissimo, Principem Elector donavit.

Urebat autem, Principis Vladislai pectus, desiderium illius celeberrimæ Urbis, Coloniae Agrippinae visendæ. Itaque, absoluto prandio sequentis diei, comitantibus, Electoris, & Neoburgici, Commissarijs, navigio illac descendit. Tum vero, cum amplissimam hanc, Sanctam, famosissimamq; Romanam Imperij Urbem, sub oculos suos haberet, ut solita eius, in superioribus ejusmodi Divis adorandis, humanitatē effugeret, latere (ut toto itinere fecerat) suarum partium duxit. Sed non adeo oculatissimæ Urbis, ingenio suo, sensum evaserat, ut non illa adventū ejus, varijs artium humanissimarum beneficijs, præcognosceret. Itaque machinæ grandiores passim, per valla, munitionesque ad congratulandum, dispositæ: coacti in arma cives militesque: Consules & Senatores, Rhedis curribusque, in ripa Rheni, ad salutandum, præparati stabant. Et juxta tantum promiscui sexus, quantum Provinciae non strictæ sufficeret. Dum vero, inter humanissimæ Urbis benevolentiam, & Principis Vladislai modestiam, decertatur, vicit tandem ingenium Principis, & navigio litrus appellens, per suos,

V 2

jam

Serenissi-  
mi fortal-  
itium pilei  
sacer  
dotalis  
perlustrat.  
27.  
Aug.

Colonien-  
sis Urbis  
erga Vla-  
dislaum  
Principem  
mira  
humane-  
tas 28.  
Aug.

jam formanti salutationis verba Senatui, nō in hoc, sed in sequenti navigio, Vladislau Principem esse, insinuavit. Credidit, qui neminem noverat, assentientium verbis Magistratus: Nec ante deceptum se vidit, quam ē sequenti navigio, Commissarios Electoris, & Neoburgici Ducis, prodire conspexit. Interim Poloniae Princeps, confertam turbam premens, Urbem ingrediebatur. Tanta autem erat, Vladislau Principem videndi, curiosorum hominum multitudo, ut transitus nullo pacto, nisi per exiguam viam, quam, Satellitum officialiumque militarium opera, & baculorum adminiculo, factam, milites custodiebant, pateret. Ut primum autem hoc tecta sua subiisse Numen, & perspicaciam suam fefellisse Senatus animadvertit, statim, ad hospitium veniens, facta verbis, in exquisitae humanitatis speciem concinnatis, salutatione, studiorum officiorumque suorum promptitudinem, Serenissimo Principi totique comitatu ejus, mira propensi animi & affectus declaratione, obrulit. Ne vero loqui tantummodo videretur, statim ad cenam, & singulos postea pastus, quadraginta coronatos, per Urbis insignia, cantaros, pratorio, ut appellant, vino plenos, viginti sibi invicem, longo ordine, succedentium virorum ministerio misit.

Sequenti die placuit Poloniae Principi maximam

nam lustrare Urbem, & frequentia Sanctorum <sup>Varia</sup> delubra venerari. Cum vero Civitas omnis, ad <sup>templa</sup> Principem, quem non noverat, & adesse tamen <sup>& adificia publica</sup> didicerat, videndum commoveretur, hunc jugiter morem Vladislaus servavit, ut comitatu suo <sup>caluistras</sup> immersus, innumerabilis & curiosae plebis oculos, effugeret pariter & irritaret. Sic, deducuntibus eum Consulibus, amplissimae Urbis ambitum, magnifica aedificia publica, spectabiles contignationibus multis privatas domus, duobusque cornibus, semilunari concavo, Rheni praeterfluentis allapsum, et, ē regione Divitiensi monumentum vidit. Sic armamentarium, novae militiae inventis pragnans, et, praeter caetera tormenta, notas per Alphabetum grandiores machinas, & Sanctos, mirae capacitatis, Apostolos, sic nuncupatos, advetit. Sic frequentissima illa Divorum Temp-la, architecturā mirabilia, ornamentis varia, plumbo tecta, & Sanctorum reliquijs venerabilia subijce & veneratus est. Sic S. Ursulae, & tot millium sociarum Virginum: Sanctorum Gereonis, Mauritij, & sociorum martyrum, ossa & sanguinem, piissimus Princeps, christiane coluit. Cum vero, transiens ad unco monumento turrim, Metropolitanā D. Petri Basilicam subijffet, & venerabilia trium Orientalium Magorum Regumque corpora de-



votus visitaret, & ipse, suis immersus, Agrippinenses hucusque fefellisset, casu, promiscue omnibus, quis esset innotuit. Aram Dux Radzivillius prior ascenderat, & porrigens Vladislao dexteram, ascendere parantem iuvit, alii subsequebantur. Cum omnes autem ora, ad aram, oculosque converterent, quis esset Poloniae Princeps noscere curiosi, corona Vladislao Principi, omnium, ut oportebat, primo imposita est, & futuri aliquando Regis tempora ominosum diadema cinxit; hoc circumstantium omnium vociferatione & applausu, ac si jam Regem Poloniae, quem Principem cognoscebant, coram intuerentur.

*In Senatoria domo, magnifica collatio, à Senatu excipitur*

Inde, eodem deducente Senatu, majori jam populi concursu & curiositate, munitam tutamque ferreis portis, tormentis, vigilibusque Senatoriam domum: frontispicium, innitens, è porphyrio lapide, columnis, candido alabastro, auro, marmore, historiisque ornatissimum perlustravit. Et illam curiae turrim, tot centenis simulacris quodammodo fastuosam, ascendit: veteris militiae arma & machinamenta vidit: & desuper turritam Urbem, & omnia circumjacentia loca spectavit. Instruxerat autem magnificam & sumptuosam collationem, in camera illustriori, Senatus: ad hanc Princeps, post omnia, ductus est. Et acquievit, cum

cum humanissimam sinceramque Magistratus benevolentiam, in omnibus experiretur.

Postera dies, sicut & altera insequens, pariter magnificentiae Urbis impensa est. Hac quoque cum laude Poloniae Principis, & singulari ejus clementiae & misericordiae fama, quod pauperem, ad exiguum furtum, magna necessitate coactum, intercessione sua apud judicem binosque scabinos, suspendio liberavit, cum jam jam ad furcam ducendus esset. Quam Principis virtutem, tum omnes, tum promiscuum vulgus, quod ad spectaculum innumerabili multitudo convenerat, maxime celebravit. Adeoque & ad hospitium Vladislai Principis, plerique se contulerunt, ut, cum jam vidissent qui liberatus fuerat, curiosiore oculo tantum Principem intuerentur, qui insigni clementia & misericordia liberavisset.

Noluit Vladislaus Princeps, tum quidem latere sedulus, inter cognoscentis se vulgi frequentiam, diutius commorari: sed, actis Reipublicae, pro singulari benevolentia & humanitate, gratias Urbem, ut advertit, & statutis, & moribus, & magnificentia, veteris Romae aemulam, quarta, postquam intraverat, die, prima Septembris, tandem deseruit. Quem Juliacum versus proficiscentem, festis tormentorum boatibus Colonienses prosequereba-

*Reum suspendio liberat.*

*31. Aug.*

*Colonia discit. 1. Sept.*

quebantur. Ut primum vero Juliacos fines attigere, Adolphus Wolff Metternich, equo desiliens, Vladislaum Principem, nomine Neoburgici Ducis Wolffgangi Guilielmi (qui in Hispaniam, ut dixi, paulo ante discefferat) humanissima salutatione excepit: qua peracta, rursus insiliens equum, per Universam Provinciam porro, Commissarii munere fungens, comitabatur. Aduere & ex praesidio Juliacensi milites sagittarii que, ut Principem securitatis gratia, una cum Electoris Colonienſis Guardia, comitarentur. In plerisque Juliacensium pagis, puellæ, tenso per aduersum, vel transversum plateæ, filo, Vladislai Principis (quem ex antecedentium militum prodicione, & pluma pilei alba nigraque cognoverant) equum veluti captum detinere; donec aliquod ipsis honorarium offerretur. Hoc plerumque Sponsæ, sparsis capillis, fecere. Per hæc tam frequentia puellarum studia, Juliacum Princeps appropinquavit. Civitate vero ipsa jam oculis incurrente, Administrator, seu Vices gerens Neoburgici Ducis, cum Gubernatore arcis, officialibus belli, magna que nobilium Provincialium manu, occurrit. Qui, prævia felicitis adventus congratulatione, desiderium Ducis Domini sui, Hispanico itinere impediti, fruendi hac felicitate exponit: deinde Vladislaum Principem ad

*Juliacum  
venit*

ad civitatem castrumque deducit. Interim tormenta omnia, magno aëris fragore, læticiam testabantur. Quin immo & Gubernator, quasi non esset ulterius quod imperaret, quod regeret, quod custodiret, traditis Principi clavibus arcis, omnia sua Principi, & seipsum commendavit.

Inde, cum Poloniæ Princeps sequenti die sanctissimas, & non, nisi evoluta septennio, publice ostendi solitas, Aquisgrani reliquias, & vidisset, & veneratus fuisset, ad primos septendecim Provinciarum, hoc est Belgii, fines pervenit. Sed, ecce, jam Serenissimæ Infantis Legatus, Comes de valle, tanto terrarum spatio, Bruxellis, in occursum Serenissimi Principis Vladislai missus, magno nobilium numero stipatus, adventum ejus præstolabatur: & humanissima Oratione, Serenissimæ Infantis nomine, excipiebat: qua absoluta Wisetham simul perrexere. Ibi, cum rumor esset quingentos Hollandorum equites, Serenissimo Principi infidias struere, Stratagemate agendum ratus, publice spargi jussit, Leodium se vel Terlemontum versus, iter suscepturum, Officialibus interim clam monitis, tota nocte Diesthemium esse properandum. Hac solertia & celeritate Principis Vladislai factum est, quod Batavi, primo, qui in vulgus iverat, rumore decepti, Leodium & Terlemontum versus,

*In Belgii  
limitibus  
à Legato  
Serenissi-  
mi Infantis  
excipi-  
tur 3.  
Sept.*

X

itinera



itinera incassum observaret, & Serenissimus Princeps, expedito itinere, tota nocte progressus, octava matutina, Diesthemium, salvus cum suis intraret. Sed cum sopor omnes occupasset, ad tertiam usque pomeridianam quiescitur, & debitum noctis, interversa hac parte natura, diei impenditur. Interea temporis refectio præparabatur, quæ, quoniam hora non nisi, post meridiem, quarta, sumpta est, pro prandio simul & cœna satisfacit. Tum tenebris iterum restituto sopore, stipulata rursus cum nocte concordia.

Mane, hora inter quintam & sextam media, Dominus Pacius, cum Comite de Rhekam (qui Coloniâ nuper Bruxellas præcesserant, & nunc die antecedenti, cum Serenissimæ Infantis aula, in occursum Serenissimo Principi, Namurcum profecti fuerant) advenere. Adeo quippe, sparsus, solertia Principis, Wisethæ rumor, invaluerat, ut Infantis aula, pari errore cum Batavis, circa Vladislai Principis iter, caligaret. Cæterum parem gaudio & festivis congratulationibus diem, ante hac, Belgium fere non meminit, quâliter hanc ipsam, non leviter obstupescit, sensit. Postquam enim Vladislaus Princeps, Diesthemio profectus, ad illam, celebratis, à maximis, Lipsio & Puteano, Viris, miraculis celebrem, D. Virginem Aspricollensem,

fem, Sacrum, musicis instrumentis solenne, auditisset, & jam Lovanio, verissimis Belgarum Athenis, appropinquaret, medio, ab illa Urbe, milliari, Comes de Nojelles, Infantis Oeconomus, cum ejusdem aula & Guardia, occurrens, Infantis nomine, Poloniæ Principem salutavit. Paululum deinde progressi, civium nonnullæ cohortes, quatuor distinctæ vexillis, ab utroque latere viæ, per medium Serenissimum transeuntem, festivis bombadarum explosionibus, honoraverunt. Cum portam ipsam ingrederentur, machinæ grandiores & mortaria, ut vocant, in publicæ lætitiæ signum, detonuere. Musica deinde, mixta suavissima variorum musicalium instrumentorum harmonia, Sarmatarum animos auresque demulsi; ut non tantum Belgium, sed in Belgio Musarum quoque domicilium se intrasse animadverterent, & non uno festivitatis & lætitiæ gressu, ad hospitium prandiumque ferrentur. Hoc Regali prorsus magnificentia, Principi, in Dalensi Collegio, præparatum fuit. Ibi Hispanus nobilis, genu flexo, Vladislao aquam porrexit. Quia autem eo, quo Archidux Albertus, modo, Poloniæ Princeps, jussu Infantis, tractari debebat, nullus, nisi Dux Radzivillius, in eadem, cum Principe, camera lavit, reliquis in antecameram

lotum exeuntibus. Quin imo Infantis Legatus, Comes de Nojelles, rogatus, ut Principis mensæ accumberet, potius moriturum sese, quam id facturum, respondit. Tantum quoque Vladislai Principis reverentiæ & obsequio datum, ut neq; incolarum quisquam, neque exterorum, imo ne famulorum quidem Principis, aut spectatum, aut servitum admitteretur.

*Mirus cō-  
cursus  
hominū  
Vladislai  
videre cu-  
prentiū.*

Cæterum cum Belgium universum, præsentiam tanti Principis (cujus famam, fractis paulo ante Orientis Viribus, & Osmano Turcarum Imperatore, ad mortem usque, victo, prostrato, humiliato, per omnes totius Orbis nationes, immensa cum gloria, properantem, mirabatur, & cujus faciem videre, inter felicia sua numerabat) sentiret, ex omnibus passim Provinciis, Urbibus, Locis, Magnates juxta ac plebei, ad videndum concurrebant. Adeo ut, cum, post prandium, Lovanio Bruxellas moveret, totum iter, quod quinque miliarium est, curribus, equis, hominibus, cunctibus & redeuntibus, occurrentibus & à tergo sequentibus, ita fuerit refertum, ut forum, quodpiam nundinale videretur. Et inter hanc, hinc inde approperantium, abeuntiumque frequentiam, quatuor miliaria, Poloniae Princeps confecit. Ad quintum autem cum pervenisset,

ecce

ecce nova reverentiæ facies, novum lætitiæ argumentum, novus honor. Quippe Præfecti stabuli, rhedis, curribus, & equis, occurrebant. Quorum major Comes Octavio, rhedam pretiosissimam, & expresse noviter pro Vladislao Principe factam, eidem tunc præsentavit.

Et jam Poloniae Principi, Urbi magis magisque appropinquanti, alii aliiq; honores deferabantur: quin immo & ipsi Hispaniæ Grandes, obviam illi exire voluerunt, petieruntque. Sed adeo Vladislaus Princeps recusavit, ut Principis titulum, si id fieret, exuturum se diceret, confusumque iri ex illis quicumque venisset. Attamen ne sic quidem omnium officiositatem evasit. Quippe unus ex illis, humanitate fortassis, vel affectu, cæteros anteire cupiens, Ducibus, Comitibus, reliquisque Serenissimæ Infantis aulicis, in occursum Principis festinantibus, sese inseruit. Ad quos cum Serenissimus Princeps, paulo post Præfectos stabuli, pervenisset, omnibus salutatis, illum nec affatu, nec nutu quidem venerabatur, adeoque præposterum ejus humanitatis officium prudentissime castigavit. Ante ipsam Urbem, cum Poloniae Princeps jam pervenisset, civium, Bruxellensium major pars, sub tredecim vexillis, ordine in aciem efformato, explosione barbararum,

*Varij oc-  
currunt  
Poloniæ  
Principi.*



darum, conceptam, ex tanti Principis præsentia, lætitiā testabatur.

*Bruxellas intrat, vulneratur, & ab infante excipitur* Cum autem, adulta jam nocte, civitatem ingrederetur, collucentibus undiq; tædis, rogis, facibusq; , non aliter, debellatis tenebris, quam mera die progrediebatur. Unum autem, non interruptam hucusque istius diei lætitiā, festivitatemque, velut nubes serenitatem solet, infortunium corrupit: Quod tamen insignis prudentia, clementia, virtusque Principis, tantum suum esse voluit, ne ad alios vel nutu exiens, periculum infelici reo, & publicæ hilaritati, tristitiæ nebulas intermisceret. Res est. Quia eodem, quo, gloriosæ memoriæ, Archidux Albertus, honore, Poloniæ Princeps recipi afficique debebat, more tunc temporis recepto, domitores equorum, seu Cavalirizzi, Serenissimo Principi quoq; occurrentes, ab utroque latere, ad Palatium comitabantur. Horum unus præmonitus, ante adventum Vladislai, ut ferrum, quo vagina gladii præmunitur, vacillans, curaret firmari, neglexerat. Jam autem, fungens quoque officio suo, in portā ipsius Palatii Bruxellensis, inter murum & currum propius advectum medius, neque, ob ingruentem equitum turmam, pedem reducere valens, manubrio gladii in murum impacto, apicem

tem ejusdem, vi pergentis currus, pedi Principis infixit. Sensit se vulneratum Vladislaus, indicium tamen doloris nullum prodidit, sed vulnerantem manu protrudens, ad aulæ majoris gradus perrexit. In gradibus soli Radzivillio Duci vulneratum se querebatur: cui, quo in loco, petenti, pedem & ocreas totas cruentatas ostendit. Horrente & attonito Radzivillio Duce, Princeps magis magisque impallescebat. Attamen, ut & peccantis saluti consulere, & ansam tumultus majoris eriperet, rem totam, silentio rectam, dissimulavit. Quam recte, Senecam audiamus. *Nihil pulchrius existimo, inquit, in fastigio collocatis, quam multarum rerum veniam dare, nullius petere.* Cæterum Serenissimo Principi, medietatem graduum jam emenso, Infans Hispaniarum, Isabella Clara Eugenia, Belgarum Princeps, monastico virginum Carmelitarū habitu vestita, occurrebat, et, humanissima salutatione prævia, eundem apprehensa manu, ad amplissimam salam deduxit. In qua Poloniæ Princeps, donec totum transiret gynæcœum, moratus, tandem, comitantibus ipsis Hispaniæ Grandibus, reliquisque aulicis, in conclave, olim Archiducis, nunc suæ commemorationi designatum, descendit. Et sic quidem festivitati istius diei finis impositus.

*Consol.  
ad Mat.*

Jam

*Varia in  
honorem  
Principis  
institu-  
untur.*

Jam vero quis honor, quæ reverentia, quis respectus, qui ludi, quæ convivia, omnia ad Serenissimi Poloniae Principis gratiam, subsequen-  
tibus aliquot diebus, instituta fuerint, nemo fa-  
cile dixerit, scripseritve. Nam & Serenissima In-  
fans, eodem, cum Principe, curru vecta, D. Vir-  
ginem Lachensem visitavit: & varias variorum,  
intercessionem Serenissimi Principis efflagitantium,  
præensiones, in ejus gratiam, omnes absol-  
vit, nihil negavit. Cardinalis Cuova, Nuncius A-  
postolicus, Duces, Principes, Comites, Marchio-  
nes, Magnatesque terræ, certatim visitavere. Pa-  
tres Societatis, cum ipsorum templum visitaret,  
erectis arcubus triumphalibus, sparsoque, qua  
iturus erat, per vias gramine, & tragicomædia, de  
felicitate hujus mundi, exhibita, præsentiam  
ejus honoraverunt. Ad S. Gudulam, tres hostias  
miraculosas visitaturus, tanta hominum, utrius-  
que sexus, multitudo, ad videndum Principem,  
vastissimum alias templum oplevit, quanta in-  
tegræ regioni sufficeret. Vix aditus transitusque  
Magnatibus ipsis patebat. Multorum autem, ex ni-  
mia compressione, vita, plurimorum valetudo sol-  
licitata. Apud Illustrissimos Duces, Arschota-  
num, Croycium, Bornevillium, Comitem Emb-  
densensem, aliosque Illustrissimos generosissimosque  
Domi-

Dominos, balleta, ut vocant, & choreæ, cum Il-  
lustrissimis nobilissimisque Domicellis, quotidiana.  
Convivia vero, sumptu, dapiumque numero,  
prorsus regalia. In quibus aliis, fercula pleraque,  
vexillulis, in quibus Vladislaus Princeps, Osma-  
num Turcarum Imperatorem, framea conficiens,  
spectabatur, insignita conspiciebantur. In aliis  
variorum Principum Magnatumque sanitates (si-  
gnum lætitiæ interim, pro more Patriæ, facienti-  
bus tubis, cultris patenas, pugnis mensam pulsan-  
tibus) propinata. Treverium quoque (locus hic  
est, Serenissimorum Belgarum Principum volu-  
ptati, recreationique destinatus, magnificentia,  
picturis, situsque, amœnitate singularis) per otium  
visitatum: ut non uno voluptatis genere Princeps  
afficeretur: sed oculis quoque & varietate locorum  
deliciæ quærerentur, & nova semper novaque cu-  
riositate, nausea tediumque deliciarum fugaretur.  
Quatuordecim dies integras, hæ tractationes, hæ  
convivia, hi honores, hæ gaudia, hæ choreæ, hæ  
tripudia, & hisce similia, tenuere. Præterquam  
quod ludicra alia, hastiludia, spectacula, in hono-  
rem omnia Serenissimi Poloniae Principis institu-  
ta, & peracta fuerint.

Decimaquinta tandem, ab adventu, die, Vla-  
dislaus Princeps, recta ad caltra Bredaica profe-  
cturus, 21. Sept.

Y

*Mechli-  
nia profi-  
citur.*



Eturus, cum jam in procinctu esset, allato de adventu Mauriti Auriaci Principis, Bredam versus tendentis, nuncio, ab instituto deflectens, Antuerpiam iter direxit. Comitabantur Principem, præter ordinariam Palatii Infantini familiam, honoris gratia, Dux Croycius, Comes Octavius, Comes Nojelles, alique Magnates. Per nitidissimam Brabantiarum Urbium Mechliniam iter fuit. Hujus pomerio cum appropinquasset, cives armati, & in quinque vexilla distincti, in apertos campos prodierunt, & Poloniae Principem repetitis bombardarum explosionibus venerati, ad Palatium Comitum Hoghstratensium comitabantur. Mox Consules Civitatis Vladislaum salutavere, cujus intercessione, homicidæ duo, vita donati.

Alterâ die tantus erat utriusque sexus, ad Poloniae Principem videndum, confluxus, ut cum audito in sacello Patrum Societatis Jesu Sacro, parochiale templum in transitu visitaret, vix ipsi Serenissimo Principi aditus, nisi ad miniculo præcedentium esset. Cum in Palatio Willebrucensi prandium absolvisset, navem conscendit, et, faventibus fluviorum Nymphis, Antuerpiam navigavit. Magnus, o, tum triumphus, magnum studium, magnus erga Serenissimum honor Antuerpiensium fuit. Quippe pro curribus & equis, ponte

Antuer-  
pia ma-  
gno cum  
honore  
excepitur  
22. Sept.

vali

vali Schaldis subjugatus. Cymbis plurimis, navis illa pulcherrima, qua Serenissimus Princeps vehebatur, à multis honoratorum, in honorem, tum etiam summo, ante alios, videndi desiderio & curiositate ductorum, circumnavigata; adeo ut una etiam, quæ tres honoratiores cives vehebat, nimio festinandi studio inversa, rectorem & Dominos suos, piscibus devorandos, effuderit. Urbi deinde magis magisque appropinquanti, explosione tormentorum, undequaque mirifice intonantium, Civica castrensisque lætitia excipiebat. Egredientem navi, Senatus pulcherrimæ totius Orbis, multorum judicio, civitatis, humanissime salutavit. Civium armatorum, in triginta duo vexilla distributorum, nonnulli ante portam, nonnulli in plateis Civitatis dispositi, Poloniae Principem, & à lateribus, & à tergo, & à fronte concludentes, ad hospitium (quod erat Palatium Domini Simeones, in platea, super Marinam, dicta) comitabantur. Et ne sic quidem honori tanti Principis satisfactum credentes, aliquot deinde horis, domum ipsam & transitu, & tympanis, & explosionibus, & tibiis, laudabili in armis & affectu constantia, salutavere. Tres dies integras, Poloniae Princeps, lustrandæ Urbi impendit; ita quoque singula scrutatus, ut topographiam, pictorum tapetiumque, officinas,

Y 2

quoque

quoq; non dedignaretur. Nihilæque tamen ac ca-  
stri inexpugnabilis, Urbisque munimenta: curiæ  
operumq; publicorum magnificentiam: D. Virgi-  
nis Mariæ picturas, ornamenta, & altissimæ turris  
artificium: & templi novi, domus professæ Socie-  
tatis Jesu, intus ex marmore & alabastro prorsus  
incrustati, picturis, aureis argenteisque ornamen-  
tis, statuisque rarissimi, decorem nitoremque col-  
laudavit.

Quarta demum die (cum pridie vesperi Co-  
mes de Salazar, alias Don Luy de Velasco, Gene-  
ralis equitum præfectus, cum duobus millibus e-  
quitum, è castris Bredaïcis, ad Vladislaum Princi-  
pem deducendum venisset) ad Bredaica castra  
profectus est. Cujus adventu cognito, Marchio  
*In castra Bredaica venit 26. Septemb.* Ambrosius Spinola, cum aliis exercitus Primati-  
bus, Serenissimo Principi, ad medium milliare,  
occorrebat. Henricus Comes Montensis, Locum  
tenens equitum Generalis, tribus millibus equi-  
tum, ante ipsa castra dispositis, venientem Polo-  
niæ Principem salutabat. Cum ergo tot Heroi-  
bus, tot probatissimis belli Ducibus, tot fortissi-  
mis & exercitatissimis equitum millibus comita-  
tus, castra ipsa ingrederetur, tremuere propu-  
gnacula universa, & vicina tellus. Quippe Spinola  
jusserat, in honorem Poloniæ Principis, omnes in

circuitu castrorum machinas, alternantibus lon-  
gioribus tubis, & schlopetariis omnibus, in ob-  
fessos exonerari. Obstupuere, cum factum antea  
nunquam fuisset, ad insolitæ rei tumultum Bre-  
danenses, & quis Mars, quæ Bellona, quod præfi-  
dium subsidiumve novum, in hostilia castra ve-  
nisset, à vicinioribus Hispanorum excubiis, in-  
terrogavere; occulto quodam Famæ Genio, quo,  
fortissimum Poloniæ Principem Vladislaum ad-  
venisse, tam hostes, quam amici, cognoscerent.

Admirabile quoq; hoc, si non penitus omi-  
nosum. Sub idem tempus, cum castra Poloniæ *Sub in-  
gressum* Princeps ingrederetur, Luna viduata luce à So-  
le communicata, deliquium pati cepit: quasi *ejus Luna  
defectum.* Vladislaum, ad arma iterum castraq; transgres-  
sum, Turcicæ Lunæ deliquii commonefaceret:  
aut quod passa ad Tyram, sub Osmano, erat: aut  
quod, ejus auspiciis, aliquando passura esset,  
ominaretur. Nec aliter ipse Ambrosius Spinola  
accepit: & non irritò spiritu dictante prædixit,  
Serenissimum Principem eum aliquando fore,  
qui liberæ nationis (cui brevi imperaturus esset)  
armis nixus, ut Turcicum Sydus æternum defe-  
ctum sui, militaris luminis, scilicet gloriæ & for-  
tunæ, pateretur, olim effecturus esset.



*Spinola  
directio-  
ne exer-  
citus in  
ipsū tras-  
fert, & ei  
ad mensā  
inservit.*

Quin imo, motus reverentia nominis, fretus fortitudine, virtute, & victoriarum numero Vladislai Principis, magnus ille Imperator, ad presentiam ejus, personam, quam gerebat, exiit, & potestatem omnem, dispositionem omnem, regimen & imperium omne, salutem & securitatem totius obsidentis exercitus, denique dispositionem promptionemq; tesseræ ipsius militaris, non infeliciter in sinum ejus deposuit. Necdum satis. Ubi cœnam Serenissimus Princeps, in ædificio, ex temporarie quidem, sed commode pro ipso præparato, sumpsit, nullus neq; Principum, neq; Comitum, neque Marchionum, neq; belli Ducum, accumbere mensæ præsumpsit. Sed Generalis ipse Marchio Ambrosius Spinola, cum Primoribus castrorum aliis, una cum Serenissimi famulis, mensæ inservivit, inde ipse cum aliis comedit.

*Castra  
circuire  
incipit,  
& mira  
Spinola in  
dustria.  
27. Sept.*

Ut sequens dies illuxit, Spinola nihil potius habuit, quam, cum belli Ducibus aliis, Vladislai invisere: immo rogare, dignaretur castra circuire, sub oculis ejus universa esse, & judicio ipsius cuncta submittere. Operum enim suorum spectatorem tantum Principem desiderare, quem censorem dudum animo suo destinasset. Annuit Polonia Princeps, jam antea curiosus, celebrata toto Orbe munimenta lustrare. Ut vel rumore cognove-

rat Principis voluntatem exercitus, nihil ilico nisi tubæ & tympana, militum arma induentium fragor, & ad suas promiscue stationes se conferentium strepitus, audiebatur; adeo ut maxima illa instantius exercitus moles, quasi momento temporis, legionibus signisq; distincta; & in unis castris, sed diversis munitionibus stationibusque, in armis, quasi pugnatura staret, & nutum Vladislai Principis præstolaretur. Et hic quidem castra circuitu incipiens emetiri, propugnacula singula, singulas legiones, invisens, tormentorum schlopetorumq; explosionibus, vexillorum submissionibus, omni-que exercitio militiæ, disciplinæq; Belgicæ, ubiq; honorabatur. Accidit autem ut curiosius omnia lustrans Vladislaus, & bacillo opportunum munitioni extruendæ locum demonstrans, diceret, *Si propugnaculum hic exstrueretur.* Ad aures Spinolæ venit: atque cum tantus Princeps, bellicque peritissimus, recte censuisse videretur, statim, à digressu ejus, moliri jussit; tanta celeritate, ut sequenti die, fortalitiū cæteris altius, eodem, quem monstraverat, loco, Serenissimus Polonia Princeps videret. Cæterum tam vastus erat castrorum gyrys, ut Princeps ea die, septem horarum spatio; vix dimidiam partem lustraret. Et ne hoc quidem sine periculo. Obsessi quippe in ipsum, & comi-

tatum

tatum ejus, grandioribus machinis, sæpius detonuere; adeo ut candentes globi verticem aliquando, quandoq; frontem prætervolarent. Sed propositi sui tenax Vladislaus, nec ejusmodi bombis inassuetus, tanti non æstimavit, ut vestigio moveretur. Unus autem in stabulum penetrans, unum ex equis Serenissimæ Infantis (quibus Poloniæ Princeps in castra vectus fuerat) occidit, alterum Domini Pacii vulneravit.

Unam noctem Vladislaus Princeps, inter dimidias castrorum partes, interposuit & quievit.

*Alteram  
medieta-  
te castrorum  
cir-  
cuit. 28.  
Sept.*

Altera enim die mox restantem castrorum partem aggressus est, eodem exercitus, in eundem Principem, obsequio, eadem reverentia, eodem honore. Interim hesterno periculo monitus, caute & provide omnes, quos reverentia ipsi aut comites, aut pedissequos adjunxerat ( ipsorum saluti consulens, ne, turmatim incedentes, periculum globorum incurrerent ) à se removit: & sic illum, qui restabat, semicirculum, majori cum securitate, alio septem horarum spatio, feliciter absolvit. Placuit prudentissimo Principi, æstimatissimi, suo ævo, probatissimique Belli Ducis, Ambrosii Spinolæ, ingenium, prudentia, disciplina: & conatus ipsius egregios, inventa plane Mavortia, & militaria prorsus consilia, collaudavit. Et Marchio Am-  
brosius

brosius Spinola, inter sua felicia numeravit, tanto Principi placuisse.

Tertiam diem Poloniæ Princeps, castrorum com meatui lustrando impendit. Inter reliqua admiratione dignissima, ista potissimum videri meruerunt, quod octo braxatoriis nunquam quiescentibus, exercitui universo, cervisia coqueretur, & tredecim furnis, quotidie, septendecim millia panes pinserentur. Cæterum Dux Radzivillius, tot tantisque spectaculis, ægritudine impeditus, interesse non poterat. Pridie enim quam Serenissimus Poloniæ Princeps, ad castra Bredaica proficisceretur, dolorem in majore dexteri pedis digito senserat, qui in morbum deinde abiens, tantas, brevi temporis spatio, vires sumpsit, ut, Vladislao Principe mane ad castra Bredaica discedente, non tantum Antuerpiæ remanere, sed Bruxellas quoque reverti, coactus fuerit. Quem in Palatio ægotantem, Cardinalis Cuova, Nuncius Apostolicus, Duces, Arschotanus & Croycius, Comes Embdensis, & Magnates alii visitaverunt. Quin immo & Serenissima Infans sciscitatum de valetudine misit, & hac ipsa quidem die, qua Serenissimus Vladislaus Princeps com meatum castrorum lustrabat, qui S. Michaelis erat Bruxellensis Civitatis Patroni, cubicularium misit significatum, ante Infantem ad processionem,

*Castrorum  
com meatum  
lustrat. 29.  
Sept.*



sionem, quæ fieri ea die consuevit, non ituram, quam sciret, quo statu Ducis valetudo esset. Nec ante etiam, quam responso accepto, discessit.

Attamen, ut ad Poloniæ Principem revertamur, hic quarta die, sub ortum Solis, priore Comititis de Salazar comitatu, ex castris Bredaïcis, Antuerpiam versus discessit: quem Marchio Ambrosius Spinola, terna tormentorum, in circuitu <sup>Antuerpiam re-  
vertitur.</sup> 30. Sept. castrorum, explosione, post omnia humanitatis, benevolentia, reverentia, & obsequiorum officia, prosequabatur. Cum Antuerpiam vero ingrederetur, Generali equitum Præfecto Comiti de Salazar, annulum, proprio digito suo detractum, remunerationis ergo donavit. Inde, secunda die, <sup>2. Octob.</sup> Bruxellas rediit. Ibi eodem, quo prius, honore, reverentia, & magnificentia habitus & tractatus. <sup>Bruxellas  
rediens,  
vulnus in  
pede cu-  
rat.</sup> Una autem cum curandi consolidandiq; primo adventu inflicti, in pede vulneris, causa angebat. Itaque, è Medicorum consilio, lectulo sese quietique composuit: quem ipsa Infans Hispaniarum statim invisit. Non ante tamen convaluit, quam die quinta, qua affixus jam lecto hæserat, cucurbitulæ applicarentur. Et tam feliciter hoc, ut altera mox, hoc est sexta, die, per cameram obambulare; septima iterum choreis nocturnis, apud Ducem Arschoranum, interesset.

Sed

Sed jam & nausea deliciarum, & cana præofficialibus Hyems, ad viciniore Soli caloriq; Provincias, properandum suavit. Itaque Vladislaus Princeps, per Casparum Nagotium, expensarum suarum Præfectum, omnibus singulisque Infantis Officialibus, præcipuisque aulicis, torques aureas, et, quo frequentior esset memoria sui, cum propria effigie sua distribuit. <sup>bus Infan-  
tu mane-  
ra distri-  
buit. 11.  
Octob.</sup>

Noluit se munificentia vinci, à regio Regij adolescentis animo, Isabella Clara Eugenia Hispaniarum Infans, & mox, sequenti die, dona quoq; Poloniæ Principis comitatu detulit. Radzivillio Duci metallum (ut vocant) aureum, pretiosis lapillis & magnitudine præcellens: simile, sed minus, Dominis, Pacio, Zolkevio, Dönhoffio, & Kazanovio. Cæteris Poloniæ Principis cubiculariis famulisque, catenas aureas duplices: Domino Nagotio quoque, & domesticis reliquis, catenæ aureæ datæ. <sup>Infans co-  
muni uti-  
Polonia  
Princeps  
dona of-  
fert 12.  
Octob.</sup>

Inde, cum altera dies choreis, apud Ducem Croycium, esset impensa, tandem 14. Octob: Serenissimæ Infanti valedicens, Bruxellis discessit. Comitabantur, honoris gratia, Serenissimum Poloniæ Principem, præter Serenissimæ Infantis domesticos, Dux Arschoran<sup>us</sup>, Dux Croycius, Comes de Noïelles, Baro de Buliers, Dominus Olivares su- <sup>Vladula<sup>us</sup>  
Princeps  
Bruxellis  
discedit,  
14. Octo.</sup>

Z 2

premus

premus expensarum Præfectus, aliiq; Magnates Belgici, totius diei itinere, Nivellam usque: & nocte illa choreis transacta, soli ex illis, Duces; Arschotanus & Croycius, mane Bruxellas rediere; reliquis, ad ipsos Lutzenburgicos Belgiiq; fines, ubique occurrentibus excipientibusq; armatis subditis, usque ultimum Hispano-Belgicae ditionis pagum, Abbe dictum, perseverantibus.

*Metas ignoty illustrat. 21. Oct.* Ibi cum ab invicem, valedictione peracta, discederetur, Poloniae Principem, Mediomatrici-ces, sive Metas, & antiquitate, & munitionibus, & Francisci primi Galliarum Regis expugnatione: tum etiam Caroli V. Imperatoris irrita obsidione celebres, ex occasione videndi curiositas invasit. Itaque, cæteris Nanceium recta pergentibus, Vladislaus Princeps, cum Radzivillio Duce, Illustrissimis Dominis, Dönhoffio & Kazanovio, duobus in super famulis, illac à via deflectit. Et per pontem quidem, responso super natione reddito, transmissus est. Portam ipsam vero ingredienti, excubitor sese objiciens, Officialem, (quem Corporalem illi vocant) accersivit. Qui cum, corrugato in Saturninam austeritatem vultu, interrogasset: qui genus, unde domo, quid negotii, & an litteras alicui deferrent; atque id responsi retulisset, duos nobiles Polonos & duos Germanos,

Germanos, cum duobus famulis esse, qui curiositate videndæ civitatis Metensis invitati, à recto itinere, quo Nancejum tendebant, descivissent; postero statim die alio se collaturi. Patientia Dominis commendata, prætextuque consensus à Governatore petendi, coacta, sono tympani, frequentiore militum manu, custodiam portæ auget. Data, paulo post, omnibus intrandi copia, dispositi utrinque militum ordines, defixis obtutibus, veluti aliquid hostile metuentes, quoad possunt, ipsos prosequuntur: assignato è collegis suis uno, qui eos, ad diverforium parvi Æthiopis, deduceret. Vespere quidam è dictis militibus Kazanovio obviam factus, ab eodem ad coenam invitatur. Qui cum super ratione tantæ difficultatis, in intromittendis ipsis facta, interrogaretur: subfuisse metum respondit; primo propter colorem baltheorum, qui, quia ruber erat, pro factione Austriacâ habebatur; deinde propter apparentiam personarum, quæ Martem spirare, & eminentius quid, quam ordinarii militis conditionem, præ se ferre videbatur.

Postera die, Iustratum templum, perambulata Civitas, ascensum campanile, & exinde Metis discessum. In itinere occurrenti cuidam viro,

*Sapernâ ingredi-  
tur 21.  
Octob.*



à Dn. Dönhoff dictum, Vicegubernatori Metensi ut nuntiaret, Poloniae Principem in civitate pernoctasse; qui, etsi difficulter, & post longam moram, intromissus fuerit, tamen, superato fastidio, perhumana ipsum salute impertire. Vir hic, novitate rei attonitus, facta Principi reverentia, strenuam, in expediendo rei commissæ negotio, pollicetur operam: Quo peracto, per Nancejum, Savernam recta properatum. Antequam vero Savernam ingrederentur, Archidux Leopoldus (qui jam ante, invitatum Poloniae Principem, aulicum Bruxellas usq; miserat) cum tota aula, armatisq; civibus, obviam processit, et, repetitis tormentorum explosionibus, in civitatem & Palatium suum deduxit.

Cum autem comitatus Vladislai Principis nondum advenisset, altera die, assumpto secum Archiducis supremo stabili Præfecto, Argentoratū excurrat. 25. Oct. nemini notus intravit. Qua de re lætus, jucunda cum libertate, Urbem perambulabat. Attamen majoris momenti & rei Argentina erat, quam ut uno vespere perlustraretur: quare & maximam insequentis diei partem, curiositati impendit. Tum armamentarium toto Orbe celeberrimum: campanile templi majoris, vix aliud par agnos-  
scens;

scens: organa soni suavitate multum commendata: rarum illud arte & magnificentia horologium: altare insuper majus, mira dexteritate, à Monacho quodam, olim, & presbytero seculari sculptum, perlustravit. Quibus visis, flexo ad pontem Rheno injectum itinere, circuitaq; curru Urbe, sub noctem, Savernam reversus est.

Inde sequentibus aliquot diebus gratissimæ conversationi, lætitiæ, choreisque datis: visisq; per otium, Molshemio, Benfelda, Schletstadio, Brisaco, Ruvachia, & Eisenhemio, civitatibus, Poloniae Princeps, antequam primis & copiosis nivibus, Alpium valles & juga occuparentur, in Italiam iter dixerit. Itaque Archiduce Leopoldo valedicto, per Basileam, Grifones, & Rhetos: per Soloturnensium, & Lucernensium fines, properatum; & ipsa Helvetiæ viscera, non sine periculo, peragrata. Visus, per transitum, locus, olim, Leopoldici exercitus fusione, nobilitatus. Transmissus rate, Elielam usque, Lucernensium lacus, & notati, ex alto, in littore, loci, in quibus Guilielmus Uranienfis, manus Præsidis & Captivitatem evadens, se præcipitem dedit: & areola illa, in qua moles rebellionis, à tribus illis rusticis, quotidiano clandestinoque conventu, fabricata. Insuper & rudera arcis Habsburgensis (fons ille,

Ab Archiduce, Itamver-  
sus discedit. 6.  
Novem.

ex quo mare gloriæ Austriacæ effusum est) perlu-  
strata. Tandem ad horribilia, Gothardici mon-  
tis, præcipitia ventum est, & transitus pons ille,  
qui reliquiis Pontis Infernalis adstructus est. Et,  
quinque horarum spatio, superans Carpathiis suis  
altiora cacumina, Poloniæ Princeps, in apicem  
summumque evasit.

*In Italiã  
venit &  
summo  
ubiq; ho-  
nore ex-  
cipitur.* Et jam pedibus Alpium superiora calcans,  
subjectam oculis à Septentrione Germaniam, ab  
Occidente Galliam, à Meridie, quã petebat, Ita-  
liam intuebatur: sed mox, prono itinere, pro ut  
se montium valliumque illarum situs offerebant,  
in Longobardiam cum suis præceps ferebatur.  
Tum verò Vladislao Principi, sua ipsius indoles,  
sua ipsius memoria, & exterarum linguarum à  
juventute studium, non parum usui venit; cum  
ipforum idiomate Italis, non secus ac Italus ipse,  
Sarmata loqueretur. Itaque à terræ Magnatibus,  
non sine insolenti quodam spectaculo, ut incola,  
quodammodo civesque suscipiebatur, honora-  
batur, habebatur: qui in Polonia natus, per Ger-  
maniam, ab illa terra veniebat. Invitabant ergo  
certatim varii Principes, Duces, & Marchiones.  
Sed Poloniæ Princeps, cum illas magni nominis  
Urbes, Mediolanum, Genuamque, & quæcunq;  
in iis notabilia incognitus perlustrasset, Romanum  
quoque

quoque nemini notus pergere meditabatur. Sed ubi-  
que, cum curiositas hominum fere aperuit, & fre-  
quenti ex vicinis Urbibus Oppidisq; Magnatum  
juxta ac plebeiorum, concursu, quem sola curio-  
sitas videndi eum causaverat, honorabatur. Ita  
à Parmæ Principe, Mutinæ & Urbini Ducibus, a-  
liisq; generosissimis Viris Dominisq; tenebrimo  
passim affectu excipiebatur. Et, verbo, ausim affir-  
mare, non alium tunc Italiæ sensum fuisse, cum  
Poloniæ Principem Vladislaum, Moscoviticis,  
Turcicis, Tartaricisq; victoriis densum, suscipe-  
ret, quam si denuo triumpharet.

Quod ne medicere tantum aliquis judicet, *A Summo Pontifice Romanum invitatur* ipsas Summi Pontificis litteras, Poloniæ Principi, cum, perlustrata Bononia, & transito Rubicone, Ariminum pervenisset, per Ducem Carolum Ma-  
gallotti 10. Decemb: traditas, inspiciamus.

### URBANVS. PP. VIII.

Dilectissime in Christo fili noster, Sa-  
lutem & Apostolicam benedictionem.

**H**Æc Patria generis humani, quæ non semel arma-  
tos terrarum triumphatores vidit ad Piscatoris  
sepulchrum procumbentes, cum jam diu anxiiis vo-  
tis te vocet, propinqua nunc adventus tui spe sum-  
mopere letatur. Cum enim indicta pridem Anni Chri-  
stiani

Aa

stiani



stiani & Sancti Jubilæi solennitas credentes populos ad hoc Religionis Sanctuarium convocet; jucundum Cælo hominibusque spectaculum fies Poloniæ Princeps, qui Regiam juventutem illustribus victorijs Catholica Ecclesiæ commendasti. Excitam illam Aquilonis Orientis latebris colluviem Turcarum atque Tartarorum, quæ toti Europæ non ita pridem videbatur diluvium minitari, Roma scit Poloniæ Principis virtute compressam, coactamque fuisse salutem meticolosa patientiæ & fugaturpi redimere. Proin cogitare potes, te hic Urbis amore, & populorum plausu colendum, ubi fortitudinis tuæ trophæa, quæ Christianitatis propugnacula fuerunt, consentientibus nationum tam diversarum vocibus celebrantur. Nos vero, qui jam diu triumphalibus nominis tui laudibus favemus, Apostolici amoris brachiis te complectemur, decus Septentrionis & fidei præsidium. Scito ergo te maxima, adventu tuo, Pontificiæ charitati solatia allaturum, qui certe præsens cognosces, quanti apud nos ij Principes sint, qui Barbaricam impietatem profligantes, cœleste regnum in terra propagant. Mentem nostrā uberius declarabit dilectus filius Carolus Magallottus, custodiarum nostrarum Generalis Locumtenens, Barberini Nepotis nostri Avunculus, & Cardinalis Magallotti frater, quem nobis charissimum ad te ablegamus, ut Apostolicas litteras afferens, Paternum desiderium nostrum,

nostrum, tibi significet. Is autem se nobis morem gessisset arbitrabitur, cū omni officij atque obsequij genere demereri poterit Patrocinium tanti Principis, cui ad nos proficiscenti felix iter precamur, & Apostolicam benedictionem amantissime impertimur. Datum Romæ apud S. Petrum, sub Annulo Piscatoris, die 28. Novembris, Anno 1624. Pontificatus nostri Anno secundo.

His Pontificiis litteris Poloniæ Princeps Romanam invitatus, per Anconam, & Loretum (ubi reliquias vidit, devotionem absolvit, & votivam S. Wladislai statuam auream obtulit) recta Romanam properavit. Cum autem in Castelnovo pervenisset, Cardinalis de Torres, Poloniæ Principi in occursum venit. Mirum dictu, quanta, in salutatione, jucunditas utrimque eluxerit; gratulantibus sibi mutuo, hanc tantopere desideratam, revidendi occasionem. Cæterum, cum Romæ, Poloniæ Principem, tot nobilissimis victoriis clarum, jam in propinquo esse, tota passim Urbe vagaretur, & concursus ingens, tantum videndi Principem curiosorum hominum, nullo turbidi aeris pluviaeque habito respectu, fieret, Vladislaus Princeps, clauso curru, ne, ob præsentiam Cardinalis, agnosceretur, Romam perrexit, Palatiumque Domini Ammerini Caponi, prope portam populi, commorationi suæ assignatum invehens, mutatis

tantum vestibus, statim ad Palatium Summi Pontificis, à Cardinale de Torres, Summo Pontifici reverentiam factururus, deducebatur. Licet autem Poloniae Princeps præmoneri curasset, se nullius Cardinalis occursum acceptare velle, tamen cum Summi Pontificis ante cameram veniret, expectantem illic Cardinalem Barberinum, Nepotem Summi Pontificis, offendeat: qui, occurrens Serenissimo Principi, petiit ut sibi ignosceret, quod ordinationem ejus transiliisset: non enim voluntate hoc sua factum, sed mandato Summi Pontificis. Ita Poloniae Princeps, inter Cardinalem de Torres (cui dextera) & Cardinalem Barberinum, (cui sinistra dabatur) medius, in conclave Summi Pontificis introducebatur. Et factis trinis reverentiis (ad quas singulas sua sanctitas, mediocri corporis paululum inclinati è throno sublevatione, respondebat) propius accedens, in genua provolutus, pedem Summi Pontificis osculabatur. Summus autem Pontifex, arcto complexu sublevati caput ori suo utrinque singulari cum affectu apprimens, eum sedili ligneo depicto, ad sedendum, à manu sibi dextera invitabat: Cardinalibus de Torres & Barberino, à sinistra, in similibus sedilibus collocatis à longe. Quibus, Vladislao Principe abituriente, surgentibus, Cardinalis Magal-

lottus

lottus superveniens, accessit. Sessione durante, tres circitet quadrantes familiari conversationi impendebantur; elucere semper, in Poloniae Principe, quadam præsentia, libertate, animique magnitudine: qua non tantum existimationi, fama virtutum suarum prænuntia, in animis omnium excitata respondebat, sed etiam animum Summi Pontificis mira voluptate perfusum, in spem majorum, pro fide Christi, facinorum erigebat. Expedito hoc colloquio, Dux Radzivillius cum aliis vocatus pedes Summi Pontificis osculabatur: quem, una cum Domino Pacio, Summus Pontifex statim agnovit, memoria notitiæ, Bononiæ (cum illic Legatum ageret) factæ, renovata. Felix quoque ea parte tunc Radzivillius Dux, quod Illustrissimis fratribus suis, Principe Johanne Alberto, & Principe Alexandro Ludovico, Radzivilliis, Romæ inventis, Cardinalibus Magnatibusque, reciproca visitatione, quotidie gratiosum stuporem illideret; cum ex Lithuania tam longe dissita, in Italia sua Romani, uno tempore, triplex unius Illustrissimæ Domus ornamentum, jugi congratulatione mirarentur. Cæterum ad Poloniae Principem revertamur. Hic Papali salutatione peracta, ab aliis Cardinalibus extra conclave, à Cardinale autem de Torres, ad hospitium usque, deductus est.

A 2 3

Sub-



variã  
pla & pa-  
latia lu-  
strat.

Subsequentibus deinde aliquot diebus, à Cardinalibus varie visitatus, summis honoribus afficiebatur: præsertim cum ipsius Consistorii decreto, primæ ipsi ab omnibus Cardinalibus essent delatæ. Præcipuas quoque Romanæ Urbis Ecclesias, præsertim Basilicas Petri & Pauli, Mariam Rotundam, B. Virginem Populicam, S. Stephanum Rotundum, Aram Cœli, Capellam Pontificiam, ipso Pontifice celebrante, pius visitavit. Palatia etiam Pontificalia, S. Petri, in monte Quirinali sive Cavallo, Cardinalis Bentivolii, Capitolium, villam Borghesianam, hortos Mattheiorum, & Cardinalis Montali, honorificentissime ubique exceptus, perlustravit. Sed & Cæremoniã apertionis portæ Sanctæ, ex theatro, è regione ipsius portæ Sanctæ, in gratiam ejus exstructo, Christianè spectavit.

Denique, relato à Radzivillio Duce exemplo Caroli V. Imperatoris, desiderio videndæ S. Veronicæ (ad quam accessus nemini nisi S. Petri Canonico patet) Poloniæ Princeps accendebatur. Sed, cognito ejus desiderio, an in numerum Canonorum adsciscendus esset, in Consistorio agitatum est. Trepidantibus aliis, aliis tergiversantibus, aliis etiam an Carolo V. Imperatori Poloniæ Princeps Vladislaus comparandus esset, in dubium

bium vocantibus, Summus Pontifex dixit, *Carolo V. Imperatori, Poloniæ Principem Vladislaum sese equiparare, sicut omnes eos, qui triginta præliis Turcam fuderint.* Itaque, Pontificis sententia prævalente, accepto ad S. Petrum Canonicatus Privilegio, Poloniæ Princeps superpellicem candidum indutus, à duobus Canonicis, ad locum, in quo S. Veronica asservatur, deductus est: & Sacrosanctam Christi faciem hominibus, qui illuc affluerant, prope innumerabilibus, visendam è solito theatro exhibuit, ac, formato crucis signo, benedictionem impertivit.



## CAPVT SECVNDVM.

## ARGUMENTVM.

Continuatio Peregrinationis Vladislai IV. & ejus in Poloniam reditus.

## SUMMARIUM.

*Elapso Anno Domini 1624. Polonia Princeps Neapolim proficiscitur, & varijs ibi spectaculis honoratur. Romam reverso ensis bis acutus, & pileus holsericus consecratus à Pontifice illi offertur. Cum Pontifice prandet, & ab eo corporibus SS. Primi & Feliciani donatus, Florentiam proficiscitur. Summo honore à Magno Duce excipitur, & variis solennitatibus recreatur. Pisis & Livorno visis, Venetias proficiscitur. Ibi septimanis aliquot regaliter habitus, per Styriam, Viennam, & Nissam, in Poloniam revertitur. Ejus munificentia ubique passim collaudata.*

*Polonia  
Princeps  
Roma  
Neapolim  
proficiscitur.  
2. Jan:*

**H**is omnibus, Anno post Christum natum 1624. peractis, Poloniae Principi in mentem venit Neapolim quoq; lustrare. Quapropter Anno 1625. 1. Januarij die, per Radzivillium Ducem, felicia novi Anni auspicialatumque decursum Urbano VIII. Pontifici Maximo apprecatus, sequenti die, lustratis hortis Tyburtinis, Tusculo, & fontibus aquæ

que-ductibusq; Frescatinis, eo profectus est. Cum autē ad primos Regni Neapolitani limites, Fundos pervenisset, ecce Proregis Neapolitani (qui tunc erat Dux Albæ) Commissarius Dominus Johannes Deodati, nomine Proregis, salutatione, & prandio quoque, ante adventum Poloniae Principis regaliter præparato, excepit. Inde per felices illos Campaniæ agros, qui emollire Annibalem, fortes ejus exercitus, militares, ferreos, duosque Virorum animos olim potuere, Neapolim prope-  
ratur: quam 8. Jan: die, sub vesperam tandem ingressus est. Cujus adventus ubi Proregi innotuit, statim ad eum Sellæ gestamine delatus, salutationis officium coram explevit.

*Neapolim  
in-  
trat 8.  
Jan:*

Sequenti die miraculū resolutionis sanguinis S. Januarij, quod admoto ejus capite fieri solet, spectavit: tertia Puteolos, reliquiarū antiquitatis lustrandarum causa profectus est. Unde reversus, à Prorege, ad Palatium ejus iterum se conferente, ad spectacula in crastinum invitabatur. Itaque Poloniae Princeps, maturato sequenti die prandio, cum comitatu suo, ad Palatium Proregis, via secreta, per hortum (ut curiositati hominum, ad spectandum ipsum turmatim accurrentium sese eriperet) vectus, statim ad theatrum, ad spectandos ludos sibi præparatum, sese recepit; ipso Prorege in-

*Equestre  
Heroum  
certamen  
videt.  
11. Jan:*

Bb

parte,



parte, theatro Poloniæ Principis proxime subiecta, sub Majestate sessitante. Dato signo Poloniæ Principem advenisse, equites, qui præsentiam ejus exspectabant, præviis tympanis, tibiis, aliisque instrumentis bellicis, bini & bini, sumptuosissimo, & inadmirationem magnificentiâ composito virorum equorumque ornatu; circum sunt ingressi. Dubium profecto, magisne vestium concinnandarum industria, an ars instruendorum equorum ipsorumque pulchritudo, an vero liberalitas & magnificentia quinquaginta istorum Heroum, in effundendis sumptibus, eorumque dexteritas in equestribus exercitiis laudanda. Ita enim omnia hæc, mirifica prorsus vi, oculos intuentium perstringebant; ut singulis præcellentiâ deberi videretur. Dum ita suspensi spectantium animi admirationi Pompe illigantur, equites, factis aliquot gyris, velut prælii cuiuspiam præludiis, in diversas turmas sensim divisi, concursu sagittarum, hostilium in modum formatarum, veterum prælia figurabant. Quo concursu aliquoties iterato, in duas diversas turmas iterum digressi, paululum quieverunt. Deinde, dato signo, duo ex una turma simul erumpentes, alios duos ex adversa turma in arenam provocaverunt. Vocati in evocantes effusi, ictibus globorum terreorum ipsos petiere, quos

hi,

hi, vel clypeo apte objecto, caute declinaverunt, vel evitandi imperitia, facie in tergum versa, aliave corporis parte exceperunt. Hac alterna binorum, deinde quaternorum, ex utraque parte, evocatione, pugna ad unum continuata. Qua peracta, hastifragia contra duos rusticos, ad id decem scutatis conductos, armisque præmunitos, exercuere. Vergente jam die, ludi, specie severitatis Martiæ, exuti, in placidiores, choreas nempe, conversi: Hæ, cænante Poloniæ Principe Vladislao in Proregis Palatio (adfidente & ipso, prope Serenissimum Principem, Prorege) cæptæ, in multam deinde noctem protractæ sunt. Pro Poloniæ Principe Vladislao, locus theatri modo exstructus erat cancellis præmunitus, viaque, ad eum usque locum, asseribus tecta. Ipse Prorex, in capite aulæ collocatus, publicum ejus festi se præbuit spectatorem. Ad saltum neque vir, neque femina, egrediebatur, priusquam à choreæ Præsede (qui maturus & moribus & ætate vir erat) hæc primum, manu in medium producta, ille altâ voce postea vocaretur. Saltantibus Magister ejus artis adstibat, ut errores vel exemplo præveniret, vel monitione corrigeret. Peracto saltu, vir feminam in medio aulæ relinquebat, quam deinde ad suum locum Præsides ille reducebat. Contigit autem tunc

Bb 2

binas

binas simul saltasse, quarum uni reducendæ dum Præses ille manum porrigeret, altera, videns solam se remansuram, ipsum sequebatur, clamitans, ut & se reduceret: ita Seniculus, in medio duarum iuvenularum constitutus, risum omnibus excitavit.

Sequenti die Poloniæ Princeps, pedestri hesternorum Heroum concursu recreandus, iterum in Palatium Proregis proficiscebatur. Locus spectaculi erat aula illa, in qua, hesternæ nocte, choreæ ducebantur. Hic Poloniæ Princeps, è regione foeminarum, cancellis itidem tectus, constituebatur. Ipse Prorex, mediâ, inter foeminas, Majestate (in qua Angeli effigies, collo adamantes gestantis, mirifice fulgebat) confedit; iudicibus ludi, immediate sub theatro Poloniæ Principis, collocatis. Sic spectatoribus constitutis, Heroes illi bini & bini, præcedentibus singula paria tympanis quatuor, tubicinibus aliisque subsequenter, eorum scutiferis miro vestium armorumque splendore ornatis, aulam Junonio velut passu ingrediebantur: levataque in transitu ex humeris hasta Proregem venerati, in medio aulæ in gyrum conglobati steterunt. Tunc, factis pugne legibus, delectisq; æmulis, in diversas partes digrediebantur, facta, interjectu perticæ, partium separatione. Quid porro? Strepunt tympana, clangunt tubæ, ardent animi. Sic clausis

*Pedestre  
eorundem  
Heroum  
certamen  
videt 12.  
Jan:*

clausis galeis à singulis ex utraq; parte cōcursum: fractisque ternis à quolibet hastis, numeratis deinde gladiatorum ictibus cōmīnus decertatum. Iudicio de victoria lato, præmium victoriæ [quod plerumq; annulus erat, à quapiâ ex foeminis spectatricibus subministratus] præambulis tympanis fistulisque, alicui, quam victor nominabat, fæminæ porrigebatur.

Hoc spectaculo Poloniæ Princeps horis aliquot recreatus, ad Palatium suum tandem reversus, nocturna quiete, ad iter in crastinum Romam, se præparavit. Tunc eum, Proregis nomine, idem, qui antea, Iohannes Deodati, Proregis Oeconomus, per totam ditionem Neapolitanam, Fundos iterum comitatus est, & Pontificis Officialibus, in limitibus Poloniæ Principem honoris gratia expectantibus, quasi in manus tradidit. Ita Poloniæ Princeps iterum, à Domino Carolo Magalotti, curribus & equis Pontificijs exceptus, ab eodem rursus Romam, & ad Palatium S. Petri (ubi toto deinde commorationis tempore hospitium habuit) deductus est.

Tunc inter alia iterum, in honorem Poloniæ Principis, cum jam discessum pararet, illud æternæ memoria dignum. Cum moris sit ut quolibet Anno Iubilæi, ensis bis acutus, pileusque holose-

Bb 3

ricus 19. Jan.

*Neapolim  
discedit.  
13. Jan:*

*Romam  
redit.  
17. Jan.*

*Ensis &  
pileus cō-  
secratus  
illi à Pon-  
tificis of-  
fertur.*



ricus, pelle ermelinorum subductus, benedictione Papali sacratu, cuiuspiam Christianorum Principum offeratur, hoc quoque favoris genere, munificentiam in multis, erga Poloniae Principem, prolixè exercitam, Summus Pontifex cumulare voluit. Itaque, abolito ritu in hac occasione adhiberi hucusque consueto, compositaque, in gratiam Principis, post hac semper usurpanda, Cæremonia nova, in sacello Summi Pontificis interiore, juxta conclave ejus, gladius ille lateri Vladislai Principis à Summo Pontifice applicatus, à Magistro Cæremoniarum cingulo astringitur, ac deinde exsolutus Radzivillio Duci tenendus traditur. Pileus consecratus similiter capiti Principis à sua sanctitate impositus, curæ ejusdem Ducis committitur. Adhibitæ sunt in hoc actu cæremonia, orationesque, quas hodiernus Pontifex, exteris, ob inconcinnam, quam referebant, rudilitatem veteribus, de novo, ut dixi, composuit.

Cum Pontifex prædet.

Confecta hac cæremonia, Summus Pontifex & Poloniae Princeps Vladislaus, simul pransuri, ad aulam prandio delectam se contulerunt. Pontifici lavanti Princeps Poloniae, Ordinario Principum Regumque Christianorum more, mantile genu flexus porrexit. Accumbente Summo Pontifice ad mensam aliquanto eminentio-

tiozem, sub Majestate, Poloniae Princeps ad alteram mensam demissiozem, intervalloque se junctam, ad manum Pontificis aulæque dexteram, sedili ligneo, nulloque tegumento, collocabatur. Rarissimæ hujus solennitatis visendæ curæ, multos in Palatium Summi Pontificis pellexerat! & licet pauci intramitti ex singulari gratia viderentur, in eam tamen copiâ excrevere, ut tota aula oppleretur. Bibente Pontifice, omnes genu flexi, in terram procidere: ipse autem Poloniae Princeps, paululum assurgens, allevato ex capite pileo, potantem venerabatur. Poloniae Principi à Kazanovio vinum porrectum in simplici vitreo, sine orbe, aut quocunque, distillantis ex vitro vini, receptaculo. Frequens inter utrumque, per internuncios, in mensa conversatio. Submissa quoque à Summo Pontifice, ex mensa sua, Poloniae Principi fercula, in argumentum singularis benevolentia cedere. A prandio, Turcici, Tartarici, Moscoviticique, Regiæ Majestatis Poloniae, & ipsius Vladislai Principis, triumpho ac laudes, versibus pulcherrimæ harmonia subjectis, certante vocum exquisitissimarum instrumentorumque modulamine, decantata.

Quibus dum rapti circumstantium animi, <sup>Familia-  
rius cum  
Papa cub-</sup> velut æmula cælo suavitate, detinentur, ipse Summus

*doquitur,  
& ei va-  
bedis.* mus Pontifex in cameram proxime huic aulae  
conjunctam, cum Poloniae Principe Vladislao  
secedens, portæque adfidens, advocatum aliquan-  
tisper à sensu musicalis voluptatis animum,  
familiarioris cum Poloniae Principe conver-  
sationis, non facile redituræ dulcedini appli-  
cabat. Satijs laudum vocumq; admiratione au-  
ribus, Poloniae Princeps à Summo Pontifice ad  
conclave suum digressus, paulo ante cænam, ei  
valedicturus, redijt. Admissis (dum Serenissimus  
Poloniae Princeps Pontifici adsideret) ad oscula pe-  
dis omnibus comitatu Serenissimi attinentibus,  
& Poloniae Princeps, facta gratiarum actione  
humiliq; reverentia, abituriret, Summus Ponti-  
fex caput ejus arctissime complexus, utrinq; vul-  
tui suo, magno cum affectu, ac fere lachrymabun-  
dus, appressit, et, benedictione impertita, dimisit.

Abeunti à Summo Pontifice, à Cardinale  
Barberino oblata sunt corpora Sanctorum Primi  
*Corpora  
SS. Primi  
& Felici-  
ani ei of-  
feruntur.* & Feliciani Martyrum, Patronorum diei natalis  
Poloniae Principis Vladislai: particula item  
offis S. Sebastiani, pluribus, ad instar rosæ, cir-  
cumfuta gemmis. Radzivillio Duci corp<sup>o</sup> simili-  
ter S. Argentini donatum. Reliquis singulis da-  
tæ effigies Summi Pontificis aureæ argenteæque  
cum rosariis. Coena lautissima deinde Vladislaus  
Prin-

Princeps, cum comitatu suo, à Cardinale Barberi-  
no, exceptus est: cui etiam Cardinalis de Torres,  
amplissimi Poloniae Regni, & illustris Polonicæ  
nationis protector, interfuit.

Inde Poloniae Princeps 20. Jan: Roma profe-  
ctus, ad ipsos Hetruriæ fines, à D. Carolo Magalot-  
ti, Summi Pontificis nomine, deducebatur. Invi-  
taverat autem jam antea Vladislaum Principem  
Magnus Hetruriæ Dux. Ut primum ergo Statum  
ejus attingit, prope Radicofanum, Don Coloredo  
cum quadraginta nobilibus: prope S. Ciricium  
Princeps Don Lorenzo Patruus Magni Ducis: ac  
novissime, prope S. Cassanum, ipse Magnus Dux,  
cum duobus fratribus, Principe Don Carolo, &  
Principe Don Matthia, Poloniae Principi occurre-  
bat: salutatumq; in currum suum excipiens, in Or-  
gini Palatium deduxit. Præparata erat hic mensa  
pro Poloniae Principe separata, cui, multam post  
instantiam Poloniae Principis, Magnus Dux, cum  
Principibus fratribus accubuit. Hinc, præceden-  
tibus via ordinaria famulis, Serenissimi, per hortū  
Palatii Magni Ducis, Florentiam invehebantur.

Nullibi in Italia tantum lætitiæ, chorearum,  
& spectaculorum. Ut sileam enim pilarum ludum  
(quem Itali calce, à calcibus quibus pila protrudi  
solet, vocant) in honorem Poloniae Principis non



semel exhibitum: conflictus leonum, urforum,  
*A Magno* taurorum; aprumque frequentes: equestria de-  
*Duce va-* nique Heroum exercitia & certamina quotidiana:  
*rys spe-* tum vel, rarissimæ dexteritatis ingenique Co-  
*staculis* mœdiæ; in honorem Poloniæ Principis actæ, sin-  
*recreatur* gulis prope Scenis, mirifice oculos omnium ani-  
 mosq; recreaverunt. Et quid refert unam alteram-  
*Tragico-* ve è pluribus, tanquam ad gustum, lectori quoque  
*modis de* proponere? Inprimis Tragicomœdia; de marty-  
*S. Ursula* rio S. Ursulæ Sociarumq; virginum, in aula Pala-  
*sociarumq;* tii veteris majore exhibita, Scenarum elegantia &  
*Virginu.* varietate, actorum vocibus & habilitate, vestium  
 apparatusumq; omnium splendore & magnificen-  
 tia, in stuporem & fixam attentionem spectantium  
 animos, mira cum jucunditate, composuit. Stu-  
 penda hic Inferni consultantiumque Dæmonum  
 representatio: ejus subito in situm Coloniensem  
 mutatio: Civitatis Colonienfis facta veterum mo-  
 re testudine oppugnatio: Paradyfi artificiosissima  
 juxta ac jucundissima effiguratio: balletum deniq;  
 à Nobilibus Curia, personas Romanorum, Civium-  
 que Colonienfium, de Gauro Hunnorum Rege,  
 triumphantium, referentibus, exhibitum, oculos  
 mentesque adstantium mira voluptate perfudit.

*Comœdia* Inde in villa Serenissimæ Archiducis impe-  
*de Ruge-* riali, prope civitatem, Comœdia de Rugero, Al-  
*ro, Alci-*

cina,

cina, & Meliffa, pulcherrimo quoq; apparatu & *na, &*  
 theatro fuit decantata. In prima Scena Neptunus, *Meliffa.*  
 duobus Hyppopotamis per mare in rupe vectus,  
 comitante Vistula & aliis fluviorum imaginibus,  
 apparuit. In secunda, totum mare in fluctus undas-  
 que & scopulos igneos, præstigiis Alcinae deforma-  
 tum, circumnatantibus undiquaq; monstris infer-  
 nalibus & marinis. Inde arbores saltitantes loquen-  
 tesq; introductæ. Mutato deniq; mari in scopos  
 & saxa, arte Meliffæ, repagula Insulæ pandeban-  
 tur; unde octo virgines egressæ, chorea figurata,  
 lætitiâ, è liberatione conceptam, testabantur.  
 Quibus, paulo post, totidem juvenes, theatro de-  
 properantes, saltus alacritatisq; comites sese jun-  
 xere. Finito hoc saltu, effusisq; è Scenæ loco, in ar-  
 eam conjunctam, spectatoribus, equites viginti  
 quatuor in eandem aream progrediebantur, com-  
 positosq; ad numerum & cantum equorum pas-  
 sus, miris prorsus flexibus, in gyros choreales tor-  
 sere & retorere; sic ut difficile judicatu fuerit, ma-  
 jorne memoria & industria fuerit in equitibus, an  
 vero dexteritas in ipsis equis.

Deniq; in Palatio Cardinalis, transacto cho-  
 reis aliquanto tempore, diductisq; theatri velis, *lucenium,*  
 prævio tympano, Duce Marte, egressus Princeps *Virginu-*  
 Franciscus, manum Spartanorum juvenum in are-  
 nam deduxit: inter quos Princeps Johannes Caro-  
*que spar-*  
*tanarum*  
*certamē*

lus Eques Melitensis primas habuit, selecta juvenum, ad pugnam exercitatorum, cohorte stipatus. Ex alia theatri parte, Ductrice Pallade, Princeps Leopoldus, copiam virginum Spartanarum produxit, contra juvenes illos hastis certaturam. Utrisque partibus è regione sibi constitutis, Mars & Pallas, de præcellentia suæ quisque cohortis, versibus musicæ subjectis, in theatro altercantur; ac demum ad periculum virium prælio faciendum, devenitur, accensis in pugnam utrorumque animis. Ministrantur hastæ, librantur brachiorum composita agitatione ictus, concurritur, scite utrimque decertatur. Fervente conflictu, Cælum in theatro aperitur, & Jupiter, dato per fulmen signo, silentium indicens, victoriam, publico decreto, virginibus Spartanis attribuit. Recedentibus præliatoribus Diisque, & amoenissimo Cæli conspectu velis erepto, choreæ denuo inchoatæ.

*Polonia Princeps Florentia discedit. 13. Feb.* Hisce similibusque spectaculis, Poloniæ Princeps, septimanas aliquot varie recreatus, tandem iter suum prosequi decrevit. Sicut enim omnium aliarum rerum, ita deliciarum quædam quoque satietas est: quarum Magnos Principes citius, quam feriorum nausea subit. Itaque Poloniæ Princeps Florentia tandem discessit: sed sic quoque magnorum Principum illorum humanitatem, benevo-

lentiam, cultumque non evasit. Quippe Archiducissa, ipse Magnus Hetruriæ Dux, Madama, Princeps Laurentius, alique Principes, cum tota aula, honoris gratia comitabantur. Et tunc quidem, decem Florentia miliaribus (ut tanti Principis, jugi novitate, animus pasceretur) prandium, sub tentorio, patentibus campis sumptum. Inde Poloniæ Princeps ab Archiducissa, & ipso Magno Duce, in diversam à proposito sententiam tractus, Pisas prius, Livorum, & mare mediterraneum videre decrevit. Itaque sequenti die Pisas intravere. Ibi inter alia, in gratiam Poloniæ Principis, triremes novæ, tubis, tympanis, tibiis, & solennitatibus aliis, in elementum usui suo conveniens, actæ.

Pisas Livorum profecti, pretiosissima Magni Ducis trireme, quæ Cleopatæ & Antonii Regiam puppem, ad molles delicias omnino compactam, ornatu & artificio vinceret, ad medium usque miliare undas secavere. Mox triremes omnes Magni Ducis, quotquot in stationibus erant, anchoras levantes, in occursum navigaverunt, & Serenissimos tormentorum explosionibus veneratæ, cunctis navalibus exercitiis recreavere. Magnum tunc temporis hoc à Poloniæ Principe, ad solitæ clementiæ famam, & populi, cui olim, liberis omnium votis, imperaturus erat, efficax ad exemplum



*Vladislai Princeps multa Sarmatice mancipia libertati restituit.* quod plurima Sarmaticæ Nationis mancipia, ad triremes damnata, sua apud Magnum Ducem intercessionem, pristinae libertati restituerit. Horum à Turcis alij, alij à Tartaris Scythisque in extremam servitutem abducti, miserrimæ vitæ tædio libertatē præputio emerant: & mox, nefas! Christianorum spolijs inhiantes, pyratice opes & divitias anhelant. Sed proposito in exitum actis, à Magno Duce rursus, expugnatis eorum navigijs, ad triremes damnati fuerant, velut in quotidiana tormenta mortemq; continuam jussi superesse. Nunc autem clementia Serenissimi Poloniæ Principis, sceleris pœnitentia ducti, libertatem & religionem Christianam simul recuperaverunt.

*Venetias venit & variu ibi spectaculo hono- ratur.* Tandem Poloniæ Princeps, Archiducissæ, Magno Duci, Madamæ, & Laurentio Principi, valedictis, per Pisas & Florentiam recta Venetias proficiscebatur. Quas ubi post aliquot dies intravit, à magnæ Reipublicæ magnis Senatoribus, officiosissima oratione exceptus, omni officiorum genere honorabatur. Nam & toto commoratio- nis tempore, quod aliquot Septimanarum erat, Reipublicæ sumptibus, in Donati Palatio, regie fuit tractatus: & quicquid Sanctioris aut celebrioris in Urbe, deducuntibus Senatoribus, Poloniæ Principi paruit. Comœdiæ deinde, & spectacula

alia,

alia, in honorem Principis, diebus singulis fuere exhibita. Deniq; & in magno Canali Naumachia, in ejusdem Principis gratiam, fuit instituta. Hanc centeni aliquot Patricii ordinis adolescentes, facta, Senatorio jussu, vestibis pretiosissimis diversiq; coloris partium differentia, exhibuere. Mirum dictu quomodo & ornatus vestium, & juvenum invicem concurrentium docta agilitas, lenocinium mutuum sibi præstiterint. Adeoque & multorum judicio, hoc navale certamen, Naumachiis veterum, Romæ ab Imperatoribus olim exhibitis, & sumptu, & elegantia, & singulari concurrentium juvenum exercitio, fuit æquiparatum.

At jam vere novo redibat paulatim Sarmatiæ suæ sua quoq; felicitas, & vicina septem Trinobus Regna, Phœbus efficacioribus radiis, in æmulam Longobardiæ amœnitatem variabat. Itaque Poloniæ Princeps, ut Patriis quoque deliciis frueretur, cum per otium munitiones Palmæ Novæ lustrasset, Venetæ Reipublicæ valedicens, per munitissimum in Styria Græcium, Urbem natalitatis maternis charam, Viennam rediit. Ibi emergentes è præsentia ejus lætitiæ, morbo ejusdem Principis, in mæstitiam degeneraverunt. Sed paulatim, divina gratia, pristinae sanitati restitutus, Imperatoriis, jucunditatem anhelantibus, votis

fatis-



satisfecit. Novissime, in negotio Principis Caroli Ferdinandi Fratris sui, Nissam profectus, Episcopatum Vratislaviensem Serenissimo Fratri, & optatum peregrinationis suæ fructum, usum & experientiam, ad Serenissimos Parentes in Poloniam retulit.

Et hic est, humanissime Lector, famosissimæ hujus peregrinationis finis; cuius ego rarissimas solennitates, ob nimiam horum ubique frequentiam, omnes non attigisse fateor enim ingenue, me ad honorum, Poloniæ Principi Vladislao passim exhibitorum, varietatem & eminentiam, calamo styloque, non potuisse assurgere. Hoc unum ergo dixisse sufficiat, & viribus meis fuisse majores, & Principum, Urbiumque magnarum, sumptibus fere fuisse tractatum. Ea autem, vice versa, Regii Principis Vladislai ubique munificentia fuit, ut cum ad sumptus plurima, in excipiendo Principe, Duces, Magnates, Urbesque impendissent, plura tamen ipse donarit. Quin immo & authorem omni fide digniorem habeo, diversis in hac peregrinatione occasionibus, ut liberalitatem & magnificenciam suam ostenderet, à Poloniæ Principe Vladislao, ad centum quinquaginta millia, fuisse donata. Et recte hoc ad con-


Sen. de  
Vitalca-  
ta.

filium Sapientis Latini. In divitiis & temperantia,  
& liberalitas, diligentia, dispositio, & ma-  
gnificentia campum habeat  
patentem.

FINIS PARTIS PRIMÆ.








## AD LECTOREM.

**E**ST, benevole Lector, quod hic quoque te scire velim: videlicet in tres libros hanc etiam partem, Serenissimum VLADISLAUM IV. REGEM, repræsentantem, me distinxisse: Quorum primus electionem ejus, coronationem, & solennem legationem Romam: secundus totus bellicus, Moscos à Smolensci mœnibus pulsos, obsessores obsessos, ad pedes usque Regis humiliatos, & dilatatis Regni terminis pacem perpetuam initam; deinde Amurathem Turcarum Imperatorem, terrore adventus Regii, ad ignominiosam pacem compulsam, & Borussia liberatam: Tertius totus pacificus, Regnum visitatum, honorem doctis exhibitum, Cæciliam Renatam.


*AD LECTOREM.*

natam ductam & coronatam, & Principem Sigismundum Casimirum ex ea natum, continet. Neque de veritate hujus quoque partis dubitare te volo, quia à viris fide dignissimis, qui ipsi interfuerunt, accepi, & non minus, quam primam Partem, à gravissimo Senatore Poloniæ Regni, perlectam, ad typum dedi. Fruere itaque sine scrupulo, benevole Lector, & vale.



**GESTO.**





Staats-  
Bibliothek  
28. 7. 28  
Reparatur



